

傳之 危氏得効方小兒陰腫赤痛日夜啼  
叫數日退皮愈而復作用老杉木燒灰入膩  
粉清油調傳効 救急方廉瘡黑爛多年老  
杉木節燒灰麻油調隔箬葉攤貼紮定數易  
即愈 除轉筋脚氣外他用甚稀故不著簡  
誤

接骨木味甘苦平無毒主折傷續筋骨除風癢  
齟齒可作浴湯

疏○接骨木稟土氣以生故其味甘苦氣平  
無毒甘能入脾養血故主折傷續筋骨苦涼  
能除風濕浮熱故主風癢齟齒也千金方打  
傷瘀血及產婦惡血一切血不行或行不止  
竝煮汁服

主治參互

易簡方治折傷筋骨接骨木半兩乳香半錢  
芍藥當歸用芎自然銅各一兩為末化黃蠟

四兩投藥攪勻衆手丸如芡實大若止損傷酒化一丸若碎折筋骨先用此敷貼乃服無別用故不著簡誤

樺木皮味苦平無毒主諸黃疸濃煮汁飲之良疏○樺木皮生於西北陰寒之地故其味苦氣平無毒氣味俱薄降多升少陰也入足陽明經五疸皆濕熱鬱於陽明所致苦平能除濕熱故主諸疸也藏器以之治傷寒時行熱

毒瘡宗爽以之治肺風毒皆取其苦涼能散風邪熱毒之義耳

主治參互

靈苑方乳癰初發腫痛結硬欲破一服卽瘥以北來真樺皮燒存性研無灰酒服方寸匕卽臥覺卽瘥也 唐瑤經驗方乳癰腐爛靴內年久樺皮燒灰酒服一錢日一服 和劑局方肺風毒瘡遍身瘡疥如癘及癰癩瘙癢

面上風刺婦人粉刺並用樺皮散主之樺皮  
燒灰四兩枳殼去穰燒四兩荆芥穗二兩炙  
甘草一兩各爲末杏仁水煮過去皮尖二兩  
研如泥研勻每服二錢食後溫酒調下瘡疥  
甚者日三服

簡誤

脾胃弱易於作泄者忌之

木鼈子味甘溫無毒主折傷消結腫惡瘡生肌

止腰痛除粉刺黥黯婦人乳癰肛門腫痛

疏○木鼈子稟火上之氣感長夏暑熱之令  
以生故其味甘氣溫無毒味厚於氣可升可  
降陽也爲散血熱除癰毒之要藥夫結腫惡  
瘡粉刺黥黯肛門腫痛婦人乳癰等證皆血  
熱所致折傷則血亦瘀而發熱甘溫能通行  
經絡則血熱散血熱散則諸證無不瘳矣其  
止腰痛者蓋指濕熱客於下部所致而非腎

虛爲病之比也用者詳之

主治參互

孫用和秘寶方肛門痔痛用木鼈仁三枚砂盆搗如泥入百沸湯一盃乘溫先熏後洗日用三次仍塗少許 聖惠方耳卒熱腫木鼈子仁一兩赤小豆大黃各半兩爲末每以少許生油調塗之

簡誤

木鼈子味甘而氣則大溫本經雖云無毒然亦未免有毒但宜外用勿輕內服劉續霏雪錄云木鼈子有毒不可食昔薊門有人生二子恣食成痞其父得一方以木鼈子煮猪肉食之其幼子當夜死長子明日死其爲毒雖未如此之厲然亦必非純粹之物也

○番木鼈形小於木鼈而色白味苦氣寒性無毒主傷寒熱病咽喉痺痛消痞塊竝含之嚥

汁醫方摘要治喉痺作痛用番木鱉青木香  
山豆根等分爲末吹之

簡誤

番木鱉性大寒味至苦凡病人氣血虛弱脾  
胃不實者慎勿用之

釣藤微寒無毒主小兒寒熱十二驚癇

疏○釣藤稟春氣以生木經氣微寒無毒保  
升言苦甄權言甘平應是甘苦俱不甚氣味

悉和平者也爲手少陰足厥陰經要藥少陰  
主火厥陰主風風火相搏則爲寒熱驚癇此  
藥氣味甘寒直走二經則風靜火息而肝心  
寧寒熱驚癇自除矣甄權主小兒驚啼瘈瘲  
熱壅客忤胎風者亦此意耳

主治參互

得遠志茯神琥珀棗仁丹砂牛黃天竺黃犀  
角屑生地黃龍齒麥門冬金箔治小兒驚癇

瘰癧有痰加竹瀝南星橘紅 聖濟錄小兒  
驚熱鈞藤一兩消石半兩炙甘草二錢五分  
爲散每服半錢溫水服日三服 聖惠方卒  
得癩疾鈞藤炙甘草各二錢水五合煎二合  
每服棗許日五夜三 除小兒驚癩外無他  
用故不著簡誤  
赤檉木無毒主剝驢馬血入肉毒取以火炙熨  
之亦可煮汁浸之

疏○赤檉木稟春陽之氣以生故其色青而  
葉稍帶微赤凌冬不凋其味甘鹹其氣溫而  
無毒浮而升陽也入足陽明手太陰少陰經  
觀本經載其能解驢馬血入肉發毒者蓋以  
驢馬性熱故多毒生時汗氣沾人卽能爲病  
所以剝時熱血入肉亦能致毒此藥味甘鹹  
甘得土氣鹹得水氣故能入血解血分之毒  
也近世又以治痧癘熱毒不能出用爲發散

之神藥經曰少陰所至爲瘍癰正劉守真所謂諸痛癢瘡瘍皆屬心火之旨也蓋熱毒熾於肺胃則發斑癍於肌肉間以肺主皮毛胃主肌肉也此藥正入肺胃心三經三經毒解則邪透肌膚而內熱自消此皆開發升散甘鹹微溫之功用也

主治參互

同石膏知母薄荷荆芥玄參牛旁子麥門冬

竹葉連翹黃芩甘草之屬治癍癰發不出或雖發不透如熱甚毒熾舌生芒刺大渴譫語癍色紫黑者加入三黃石膏湯內大効 單用及兼各藥竝主痧癍首尾諸證 治一切風不問遠近用赤檉木葉半斤切荆芥半斤水五升煮二升澄清入白蜜五合竹瀝五合新甌盛之油紙封入重湯煮一伏時每服一小盞日三服 酒多致病長壽仙人柳曬乾

爲末每服一錢溫酒下 氣味甘溫性復無  
毒除痧瘳外他用甚稀故不著簡誤

水楊葉嫩枝味苦平無毒主久痢赤白搗和水  
絞取汁服一升日二大効

疏○水楊葉嫩枝生於涯涘之旁得水土之  
陰氣偏多故味苦氣平無毒久痢赤白腸胃  
濕熱也得苦涼之氣則濕熱散痢自止今人  
又用以治癰腫疔瘡多効魏直博愛心鑑云

痘瘡數日陷頂漿滯不行或風寒所阻者宜  
用水楊枝葉無葉用枝五斤流水一大釜煎  
湯溫浴之如冷添湯良久照見纍起有暈絲  
者漿行也如不滿再浴之力弱者只洗頭面  
手足如屢浴不起者氣血敗矣不可再浴始  
出及痒塌者皆不可浴痘不行漿乃氣滯血  
滯腠理閉密或風寒外阻而然浴令暖氣透  
達和暢鬱蒸氣血通徹每隨暖氣而發行漿



貫滿功非淺也若內服助氣血藥藉此升之其効更速直見一嫗在村中用此有驗即得其方行之百發百中慎勿易之誠有燮理之妙也

柞木皮味苦平無毒治黃疸病皮燒末服方寸七

疏○柞木卽鑿子木處處山中有之葉小而  
有細齒光滑而韌其木及葉皆皆有針刺經

冬不凋五月開碎白花不結子木心裏皆白色本經味苦氣平無毒然其性又善下達主黃疸病者蓋黃疸因濕熱鬱於腸胃而發此藥苦能燥濕微寒能除熱兼得下走利竅之性則濕熱皆從小便出而黃自退矣今世又以爲治難產催生之要藥亦取其下達利竅之性耳同魚膘人參千里馬百草霜牛膝白芷當歸益母草爲催生聖藥無別用故不著

參互及簡誤

櫻櫚皮平無毒止鼻洪吐血破癥治崩中帶下  
腸風赤白痢入藥燒灰用不可絕過

疏○櫻櫚皮稟微陽之氣以生故其味苦瀉  
氣平無毒本經主諸病皆燒灰用者凡血得  
熱則行得黑灰則止故主鼻洪吐血苦能瀉  
熱瀉可去脫故主崩中帶下及腸風赤白痢  
也止血固脫之性而能消瘀血故能破癥也

凡失血過多內無瘀滯者用之切當與亂髮  
灰同入更良如暴得吐血瘀滯方動暴得崩  
中惡露未竭濕熱下痢初發腸風帶下方熾  
悉不宜遽用卽用亦無効入藥須年久敗者  
良

木槿平無毒止腸風瀉血又止痢後熱渴作飲  
服之令人得睡入藥炒用

疏○木槿本經氣平無毒詳其主治應是味

苦氣寒清熱滑利之藥腸風瀉血濕熱留中  
也痢後作渴餘熱在經津液不足也夜臥少  
睡心經蘊熱虛煩不寧也苦寒能除諸熱滑  
利能導積滯故主如上等證今人用治癬瘡  
多取川中所產肉厚而色紅者彌良花功用  
相同作湯代茶兼能治風

主治參互

扶壽方牛皮癬川槿皮一兩大風子肉十五

筒半夏五錢剉河水井水各一盃浸六七宿  
入輕粉一錢秃筆掃塗覆以青衣數日有臭  
涎出妙忌澡浴 簡便方癬瘡有蟲川槿皮  
剪入肥皂浸水頻頻擦之或以槿皮浸汁磨  
雄黃尤妙

神農本草經疏卷之十五

人部

總二十五種今疏其要者十一種又陳藏

器三種

髮髮

亂髮

人乳汁

頭垢

人牙齒

人尿人中黃附

人溺

秋石附

溺白塗

婦人月水經衣

附

浣禪汁

婦人禪褙附

懷妊婦人爪甲

天靈蓋

人胞

胞衣水附

初生臍帶

髮髮味苦溫小寒無毒主五癰關格不通利小便水道療小兒癩大人瘰仍自還神化合鷄子

黃煎之消為水療小兒驚熱

雷斅云是男子二

色紅白於頂心剪下者入丸藥膏中用先以苦參水浸一宿鹿出入籠中以火煨赤放冷研用

疏○髮者血之餘也經曰男子八歲腎氣盛

齒更髮長是髮因人之血氣以為生長榮枯

也故血盛之人則髮潤而黑血枯之人則髮

燥而黃本經用髮髮之意為是故爾其味苦

氣溫別錄小寒無毒入手足少陰經大人瘰

小兒驚癩皆心肝二經血虛而有熱也髮為

血之餘故能入心入肝益血微寒而苦又能

泄熱所以療小兒驚癩及大人瘰也心與小

腸為表裏腎與膀胱為表裏心腎有熱則二

腑亦受病此藥能入心除熱入腎益陰則水

道利五癰關格俱通矣是以古人治驚多用  
茯苓琥珀竹葉之類取其分利心經之熱自  
小腸出也日華子主止血悶血暈金瘡傷風  
及煎膏長肉消瘀血者悉取其入心走肝益  
血除熱之功耳自還神化之事未見別方大  
抵以火煨之復化而凝成血質此卽自還神  
化之謂是因血而生復還爲血非神化而何  
○亂髮微溫主欬逆五淋大小便不通小兒驚  
癇止血鼻衄燒之吹內立已

疏○亂髮卽常人頭上墮下者其氣味所主  
與髮髮相似第其力稍不及耳以髮髮一時  
難得故別錄重出此條以便臨時取用療體  
實不甚相遠也

主治參互

和劑局方腸風黑散治腸風瀉血用亂髮一  
兩半荆芥二兩槐花槐角各一兩以上共煨

爲末枳殼甘草各一兩半爲末和前末勻每服二錢水一盞煎七分空心服溫酒調下亦得 劉禹錫傳信方孩子熱瘡亂髮一團如梨子大鷄子黃十箇煮熟同於銚子內熬至甚乾始有液出旋置盞中液盡爲度用敷瘡上外卽以苦參粉摻之神効 又方小兒斷臍卽用清油調髮灰傅之不可傷水臍濕不乾亦傅之効 千金方小兒驚啼亂油髮燒

研乳汁或酒服少許良 聖惠方鼻血不止血髮燒灰吹之 又方諸竅出血頭髮敗櫟陳蓮蓬竝燒灰等分每服三錢童便溫酒調下 婦人良方女人漏血亂髮洗淨燒研空心溫酒服一錢 入諸膏藥內能消毒止痛長肉生肌 肘後方女勞黃疸膏髮煎用猪膏半斤亂髮鷄子大三團和煎髮消藥成矣分再服病從小便中出也

簡誤

髮灰走血分而帶散其主諸血證亦是血見  
灰則止取其治標之義居多若欲全仗其補  
益未必能也經熬煨成末後氣味不佳胃弱  
者勿服入外科藥殊有神効

人乳汁主補五藏令人肥白悅澤

唐本注療目赤痛多淚解

獨肝牛肉毒合或濃汁飲之神効

疏○人乳乃陰血所化生於脾胃攝於衝任

未受孕則下爲月水既受孕則留而養胎已  
產則赤變爲白上爲乳汁此造化玄微之妙  
人身轉運之神也其味甘氣平無毒入心入  
腎入脾潤肺益壽延年之聖藥也氣血之液  
故能補五臟五臟得補則氣血充實而體自  
肥白悅澤也經曰目得血而能視乳爲血化  
故能療目赤痛多淚甘能解毒故又主解獨  
肝牛肉毒也



主治參互

攝生衆妙方接命丹治男婦氣血衰弱痰火上升虛損之證又治中風癱瘓手足疼痛不能動履等證用人乳二盃香甜白者爲佳以好梨汁一盃和勻銀石器內頓滾每日五更一服能消痰補虛生血延壽此以人補人之妙法也 聖惠方眼熱赤腫人乳半合古文錢十文銅器中磨令變色稀稠成煎瓶收日

點數次或以乳浸黃連蒸熱洗之 萬氏家抄方一切虛損勞證太乙神應丸人乳一碗磁器煮乾焙燥牛乳一碗同前製杜仲三兩破故紙二兩半白蘚皮白茯苓牛膝當歸各二兩黍米金丹一箇曬乾卽初生兒口中血珠共爲末蜜丸桐子大每服一九夜間噙化簡誤

乳屬陰其性涼而滋潤血虛有熱燥渴枯涸

者宜之若臟氣虛寒滑泄不禁及胃弱不思食脾虛不磨食竝不宜服

頭垢主淋閉不通

梳上者名百齒霜

疏○頭垢頭上垢膩也其性滑潤而下走故本經主淋閉不通及弘景療噎疾其味苦溫能走陽明故又主勞復及婦人吹乳也

主治參互

同白芷貝母半夏爲丸酒下治婦人吹乳

同山茨菰橘葉鼠糞人爪蒲公英柴胡山豆根白芷連翹貝母夏枯草忍冬藤治乳岩乳癰神効 類要方天行熱病後勞復含頭垢棗核大一枚良 外臺秘要預防勞復傷寒初愈欲令不勞復者頭垢燒研水丸梧子大飲服一九 衛生寶鑑婦人吹乳百齒霜以無根水丸梧子大每服三丸 數條之外無別用故不著簡誤

人牙齒平除勞治瘡蠱毒氣入藥燒用

疏○牙齒者腎之標骨之餘也經云男子三八腎氣平而真牙生五八腎氣衰而齒槁以腎主骨故也其味甘鹹氣熱有小毒其主除勞治瘡者蓋勞乃勞極精氣之絕腎家虧損所致也齒牙爲腎氣所生以類相從適還其本故主之也瘡亦因勞而發非夏傷暑秋爲瘡之比故亦主之味甘而鹹所以能解蠱毒

氣也今世又以之治痘瘡倒靨乳癰未潰爲必須之藥

主治參互

錢氏小兒方痘瘡倒靨人牙燒存性入麝香少許溫酒服半錢 聞人規痘疹論人牙散治痘瘡方出爲風寒外襲或變黑或青紫此倒靨也宜溫肌發散使熱氣復行而斑自出用人牙不拘多少瓦罐固濟煨過出火毒研

末出不快而黑陷者獐猪血調下一錢因誤服涼藥血滯倒陷者入麝香溫酒服之其効如神 肘後方乳癰未潰人牙齒燒研酥調敷之 直指方陰疽不發頭凹沉黯不疼無熱內服補散不起用人牙燒過穿山甲炙各一分爲末分作二服用當歸麻黃煎湯下外以薑汁和麪傅之

簡誤

近世用人牙治痘瘡陷伏稱爲神品然一槩用之貽害不淺夫齒者腎之標骨之餘也痘瘡則毒自腎出方長之際外爲風寒穢氣所冒腠理閉塞血滯不行毒不能出或變黑倒靨宜用此以酒麝達之竄入腎經發出毒氣使熱令復行而瘡自紅活蓋劫劑也若伏毒在心昏冒不省人事及氣虛色白痒塌不能作膿熱沸紫泡之證止宜解毒補虛苟誤用

此則鬱悶聲啞反成不治之證可不慎哉其  
除勞治瘧本經雖言之今世亦稀用  
人屎寒主療時行大熱狂走解諸毒宜用絕乾  
者搗末沸湯沃服之

疏○人之五穀入胃津液上升爲氣血糟粕  
下降而成糞其本原以化過但存極苦大寒  
之氣味耳入足陽明經經曰陽明實熱則登  
高而歌棄衣而走苦寒能除陽明之熱故療

時行大熱狂走也凡毒必熱必辛苦寒能除  
辛熱故又主解諸毒也蘇恭云新者封疔腫  
一日根爛蓋疔腫乃風火之毒氣結成得大  
寒極苦之氣則風火散根自爛也今世人又  
以之治痘瘡血熱紫黑倒靨者殊効

○糞清臘月截淡竹去青皮塞口納糞坑中積  
年得汁甚黑而苦主天行熱狂熱疾中惡蕈  
毒惡瘡瘟病垂死者皆瘥一名黃龍湯俗名

金汁

○人中黃卽多年廁坑中輓上所凝結黃泥是也藥性治療大約與人屎同解胃家熱毒有  
効

主治參互

斗門方熱病發狂奔走似癲如見鬼神久不  
得汗及不知人事者以人中黃入大罐內以  
泥固濟煨半日去火毒研末新汲水服三錢

未退再服 寇宗奭衍義大熱狂渴乾陳人  
屎爲末於陰地淨黃土中作五六寸小坑將  
末三兩匙於坑中以新汲水調勻良久澄清  
細細與飲卽解 儒門事親四靈無價散治  
痘瘡黑陷腹脹危篤者此爲劫劑用人糞貓  
糞猪犬糞等分臘月初旬收埋高燥黃土窖  
內至春取出砂罐盛之鹽泥固濟炭火煨令  
烟盡爲度取出爲末入麝香少許研勻瓷器

密封收之一歲一字二歲半錢三歲一錢蜜  
水調下須臾瘡起千金方疔腫初起刮破  
以熱尿傅之乾卽易 又方五色丹毒黃龍  
湯飲二合并塗之良 陶弘景解藥箭毒交  
廣夷人用焦銅爲箭鏃更以毒藥物汁漬之  
射人纔傷皮便死惟飲糞汁卽解

簡誤

傷寒溫疫非陽明實熱者不宜用痘瘡非火

熱鬱滯因而紫黑乾陷倒靨者不宜用以其  
苦寒之極耳

人溺療寒熱頭疼溫氣童男者尤良

疏○人溺乃津液之濁者滲入膀胱而出其  
味鹹氣寒無毒爲除勞熱骨蒸咳嗽吐血及  
婦人產後血暈悶絕之聖藥晉褚澄勞極論  
云降火甚速降血甚神飲溲溺百不一死服  
涼藥百不一生言其功力之優勝也經云飲

入於胃游溢精氣上輸於脾脾氣散精上歸於肺通調水道下輸膀胱故人服小便入胃亦隨脾之氣上歸於肺下通水道而入膀胱乃循其舊路也故能治肺病引火下行凡人精氣清者爲血濁者爲氣濁之清者爲津液清之濁者爲小便與血同類也故其味鹹而走血鹹寒能伏虛熱使火不上炎而血不妄溢是以能療諸血證也蘇恭主久嗽上氣失

聲及日華子止勞渴潤心肺療血悶熱狂撲損瘀血在內暈絕止吐血鼻衄皮膚皴裂難產胞衣不下諸證悉由此故本經主寒熱頭疼溫氣者鹹寒能除邪熱故耳法當熱飲熱則於中尚有真氣在其行自速冷則惟存鹹味寒性矣

主治參互

同枇杷葉天門冬麥門冬蘇子桑白皮沙參



五味子生地黃欬冬花百部治陰虛咳嗽聲  
 啞喉間血腥氣 同蘇木番降香續斷牛膝  
 丹皮蒲黃治內傷吐血或瘀血停留作痛  
 同澤蘭荆芥白芷續斷延胡索牛膝蘇木  
 黑豆治產後血暈虛者加人參 凡產後溫  
 飲一盃可免血暈至三日後止之 中暈昏  
 倒以熱小便灌下即活 聖濟總錄頭痛至  
 極童便一盞豉心半合同煎至五分溫服

孟詵必効方骨蒸發熱童便五升煎取一升  
 以蜜三匙和之每服二碗半日更服此後常  
 服自已小便輕者二十日重者五十日瘥  
 聖惠方絞腸沙痛童便乘熱服之即瘥 仲  
 景方中暑昏悶夏月在途中熱死急移陰處  
 就掬道上熱土擁臍上作窩令人溺滿煖氣  
 透臍即甦乃服地漿蒜水等藥 千金方金  
 瘡出血不止飲人尿五升 外科發揮折傷

跌撲童便入少酒飲之推陳致新其功甚大  
千金方火燒悶絕不省人事者新尿頓服  
二三升良 通變要法人咬手指瓶盛熱尿  
浸一宿卽愈 普濟方赤眼腫痛自己小便  
乘熱抹洗卽閉目少頃此以鹹寒內有真氣  
故能退去邪熱也

簡誤

人溺滋陰降火除骨蒸解勞乏治諸吐衄咯

血唾血其効甚速褚澄遺書云人喉有竅則  
咳血殺人喉不停物毫髮芥帶必欬血旣滲  
入愈滲則愈欬愈欬愈滲惟飲溲溺則百不  
一死若服寒涼則百不一生其爲肺腎有火  
者必須之物第其性稍寒惟不利於脾胃虛  
寒或溲泄及陽虛無火食不消者咸在所忌  
今世人類用秋石此乃水澄火鍊真元之氣  
盡失其功不逮童便多矣况難多服久服則

鹹能走血使血凝泣為病

溺白堊療鼻衄湯火灼瘡

疏○溺白堊即人中白乃人溺之積氣結成其味鹹氣涼無毒能瀉肝腎三焦膀胱有餘之火本經療鼻衄及大明治傳屍勞熱肺痿心膈熱吐血羸瘦渴疾者以其能入諸經瀉去火邪也涼能除熱故又治湯火灼瘡今人以之治口舌生瘡疔腫等證多効是其除熱

降火之驗也

主治參互

同冰片硼砂青黛黃檗牙硝白礬治口舌生瘡及小兒走馬牙疳口臭 經驗方鼻衄不止人中白焙乾入麝香少許溫酒調服立効 又方小兒口疳人中白煨黃檗蜜炙焦為末等分入冰片少許以青布拭淨搽之累効

婦人月水解箭毒并女勞復

陳藏器云經衣主金瘡血湧出炙熱

熨之又燒灰傅虎狼  
傷瘡及箭鐵毒入腹

疏○經云女子二七天癸至任脉通太衝脉  
盛月事以時下謂之天癸者乃天一所生之  
水也上應太陰下應海潮月有盈虧潮有朝  
汐故月事一月一行與之相符也其味鹹鹹  
爲水化凡毒得水則解故能解箭毒也女勞  
復者熱病新瘥後交感而得其證發熱煩躁  
少腹陰囊牽引而痛以前病餘熱未除陰精

復損故有是證月水乃陰中有陽之物能補  
陰除熱故主之也金瘡及虎狼傷瘡皆血分  
受傷爲病以類相從乃所以補其不足也童  
女首經名紅鉛能回垂絕之陽氣第一時難  
得耳如女子自受胎時筭至十四歲足卽於  
是日是時經至者此爲正鼎其經爲上藥用  
法招攝於經將至時真氣先到采入身中名  
得大藥可以接命卽首楞經所載精仙是也

絕非入爐交感亦非情想得通故亦成仙道耳

主治參互

扁鵲方丈夫熱病後交接復發忽卵縮入腹腹痛欲死燒女人月經赤衣爲末熱水服方寸七卽定并治女勞色疸 千金方男子陰瘡因不忌月事行房陰物潰爛用室女血衲瓦上燒存性研末麻油調傅 博物志交廣

夷人以焦銅和毒藥於箭鏃上中人卽沸爛須臾骨壞而死但服月水尿汁解之

簡誤

月水雖能治病然穢污不潔之物故女子入月時人宜遠之其昇丹煎膏治藥及小兒出痘切須避忌如犯之則藥不靈痘變壞也紅鉛其性質乃陽氣凝結而成火盛人不宜單服須多服人乳并入童溺乃佳

浣禪汁解箭毒并女勞復亦善 婦人禪襠主  
陰易病當陰上割取燒末服方寸七童女禪益  
佳若女患陽易卽須男子禪也陰易病者人患  
時行病起後交合陰陽便卽相著甚於本病其  
候小便赤濇寒熱甚頭痛腰痛耳鳴眼花服此  
便通利

疏○禪襠居下體得陰氣勝取其以類相從  
氣相感能導邪熱故主陰陽易病也

主治參互

仲景方陰陽易病身體重少氣腹裏急或引  
陰中拘急熱上衝胃頭重不欲舉眼中生花  
膝脛拘急者燒禪散主之取中禪近陰處燒  
灰水服方寸七日三服小便卽利陰頭微腫  
則愈男用女女用男 千金方胞衣不下以  
本婦禪覆井上卽下

懷妊婦人爪甲取細末置目中去翳障

疏○爪者筋之餘肝膽之外候也經曰多食辛則筋急而爪枯以辛能散真氣而走筋也本經獨用懷妊婦人者蓋婦人氣血充實乃能受孕取其有生長力緊之意也其味甘鹹氣平無毒目中腎障肝經血虛也爪甲乃肝之餘氣所生而性又帶散故點目能去腎障也寇宗奭以衆人甲刮取細末搐鼻內治鼻衄立愈兼能催生利小便止尿血散乳癰等

用

主治參互

聖惠方胞衣不下取本婦手足爪甲燒灰酒服又方一切目疾以木賊草擦取爪甲末同丹砂等分研勻以露水搜丸芥子大每以一粒點入目內或用乳汁和亦得并治飛絲入目

大靈蓋味鹹平無毒主傳尸尸疰鬼氣伏連及

瘴勞瘧寒熱無時者燒令黑細研白飲和服亦合丸散用

疏○天靈蓋乃死人腦蓋骨也不用他骨而用此者以人生時腦爲諸陽之會而此骨則一身衆骨之主也其主傳尸尸疰鬼氣伏連者取其同類之氣引出邪魅則其魂魄飛越不復附人故得瘥也久瘴勞瘧寒熱無時者亦邪惡之氣侵人也辟惡散邪是其能事故

亦主之

主治參互

同鬼白乾漆象膽獺肝丹砂胡黃連入滋陰藥內治傳尸勞 同牛黃象牙末蛙竹屑血竭乳香沒藥黃蠟明礬真珠作丸治楊梅結毒 痘瘡經驗方痘瘡陷伏灰平不長此係虛寒證用天靈蓋燒研酒服三分

○附化屍場上人骨取爲細末傳金瘡止血長



肉及惡瘡不收斂并能治打撲折傷人受杖時服之不痛不腫不爛

簡誤

天靈蓋治勞瘵者以其有尸鬼勞蟲爲害取其逐散邪也今人虛損勞怯皆係色欲過度損傷真陰實無鬼氣淹伏何得用此幽暗不祥之物治之哉其痘瘡虛寒陷伏或爲邪氣所觸發不出者不過借其陽氣所結之餘逐

散其邪以發出耳非正治也若血熱煩躁瘡乾紫黑者用之必致危殆不救慎之慎之

人胞主血氣羸瘦婦人勞損面黧皮黑腹內諸病漸瘦瘁者以五味和之如餠餌法與食之勿令知一名紫河車

疏○夫人有生之初攬父精母血以成胚胎外卽有衣一層裹之卽胞也至十月降生時隨兒後出其味甘鹹氣溫無毒血氣羸瘦婦

人勞損面黧皮黑腹內諸病漸瘦瘁者皆榮血不足精氣虧損也此藥得精血之氣而結能從其類以補之是以主諸證也今世以之治男女一切虛損勞極爲益血補精氣之用

主治參互

同人參黃耆鹿茸白膠當歸補骨脂五味子巴戟天治真陽虛極畏寒足冷 吳球大造丸治虛勞骨蒸女人無子及多生女月水不

調小產難產服之必主有子危疾將絕者一二服可更活一二日其補氣血之功力可見也又服耳目聰明鬚髮烏黑延年益壽有奪造化之功故名大造丸用紫河車一具男用女胎女用男胎初生者米泔洗淨淡酒蒸熟搗攪研末敗龜板童便浸三日酥炙黃二兩黃檗杜仲各一兩半牛膝一兩二錢生地黃二兩半入砂仁六錢白茯苓二兩絹袋盛入

瓦罐酒煮七次去茯苓砂仁不用杵地黃爲膏聽用天門冬麥門冬人參各一兩二錢淨夏月加五味子七錢俱忌鐵器爲細末地黃膏加酒米糊丸小豆大每服八九十九空心鹽湯下女人去龜板加當歸二兩男子遺精女人漏下竝加牡蠣粉一兩去人參

簡誤

人胞乃補陰陽兩虛之藥以其形質亦得男女坎離之氣而成如陰陽兩虛者服之有反本還元之功誠爲要藥也然而陰虛精涸水不制火發爲咳嗽吐血骨蒸盜汗等證此屬陽盛陰虛法當壯水之主以制陽光不宜服此竝補之劑以耗將竭之陰也胃火齒痛法亦忌之

○胞衣水味辛無毒主小兒丹毒諸熱毒發寒熱不歇狂言妄語頭上無辜髮豎虛痞等證

天行熱病飲之立効此卽胞衣埋地下久遠化爲水者得地中之陰氣其氣必寒辛寒而走足陽明經故主如上諸證也南人以甘草升麻和入胞籠盛埋之三五年後掘出取爲藥也

初生臍帶主瘧燒爲灰飲下之

疏○臍者命蒂也當心腎之中爲真元歸宿之處胎在母腹臍連於胞喘息呼吸滋養之

妙從此而通胎出母腹臍帶剪斷則一點真元之氣從此而歸入命門丹田故臍爲命蒂而臍帶亦真氣會聚之所也本經以之治瘧者應是久瘧虛寒之甚藉其氣以補不足也今世以小兒脫下臍帶燒灰與服可解胎中一切毒及免驚風痘患亦取裨補真元耳

主治參互

全幼心鑑臍汁不乾綿裹落下臍帶燒研一

錢入當歸頭末一錢麝香一字摻之 保幼  
大全預解胎毒臍帶燒灰以乳汁調服或入  
辰砂少許可免痘患無毒而主療甚稀不著

簡誤

人精 塗金瘡血出和鷹屎滅癩  
陰毛 嬾人陰毛主五淋及陰陽易男子陰毛主蛇咬口含二十莖噉汁吞下令毒不  
入腹 橫生逆產用夫毛二十七莖燒研猪脂調為丸豆大吞之

神農本草經疏卷之十五



神農本草經疏卷之十六

獸部上品

總二十種今疏其要者十種

龍骨

齒附

麝香

牛黃

熊脂

膽附 掌

象牙

膽附 虫反

白膠

阿膠

牛乳

酥

乳腐

龍骨味甘平微寒無毒主心腹鬼疰精物老魅

欬逆洩痢膿血女子漏下癥瘕堅結小兒熱氣  
驚癇療心腹煩滿四肢枯痿汗出夜臥自驚恚  
怒伏氣在心下不得喘息腸癰內疽陰蝕止汗  
縮小便溺血養精神定魂魄安五藏 白龍骨  
療夢寐洩精小便洩精 齒主小兒大人驚癇  
癩疾狂走心下結氣不能喘息諸瘧殺精物小  
兒五驚十二癇身熱不可近大人骨間寒熱又  
殺蠱毒 得牛黃人參良貴  
石膏忌魚及鐵

疏○龍稟陽氣以生而伏於陰爲東方之神  
乃陰中之陽鱗蟲之長神靈之物也故其骨  
味甘平氣微寒無毒內應乎肝入足厥陰少  
陽少陰兼入手少陰陽明經神也者兩精相  
合陰陽不測之謂也神則靈靈則能辟邪惡  
蠱毒魘魅之氣及心腹鬼疰精物老魅遇之  
則散也欬逆者陽虛而氣不歸元也氣得斂  
攝而歸元則欬逆自止其性瀄以止脫故能

止洩痢膿血因於大腸虛而又不得止及女子漏下也小兒心肝二臟虛則發熱熱則發驚癇驚氣入腹則心腹煩滿歛攝二經之神氣而平之以清其熱則熱氣散而驚癇及心腹煩滿皆自除也肝氣賊脾脾主四肢故四肢痿枯肝寧則熱退而脾亦獲安故主之也汗者心之液也心氣不收則汗出肝心腎三經虛則神魂不安而自驚收斂三經之神氣

則神魂自安氣得歸元升降利而喘息自平汗自止也肝主怒肝氣獨盛則善恚怒魂返乎肝則恚怒自除小腸爲心之腑膀胱爲腎之腑二經之氣虛脫則小便多而不禁臟氣斂則腑亦隨之故能縮小便及止夢寐洩精小便洩精兼主溺血也其主養精神定魂魄安五臟者乃收攝神魂閉滯精氣之極功也又主癥瘕堅結腸癰內疽陰蝕者以其能引



所治之藥黏着於所患之處也。按龍骨入心腎腸胃龍齒單入肝心故骨兼有止瀉瀉精之用齒惟鎮驚安魂魄而已凡用龍骨先煎香草湯洗二度搗粉絹袋盛之用燕子一隻去腸肚安袋於內懸井上面一宿取出研粉入補腎藥中其効如神又法酒浸一宿焙乾研粉水飛三度用如急用以酒煮焙乾或云凡入藥須水飛過曬乾每觔用黑豆一斗

煮一伏時曬乾用否則着人腸胃晚年作熱也

### 主治參互

仲景方同牡蠣入柴胡桂枝各湯內取其收斂浮越之正氣固脫而鎮驚。同遠志等分爲末煉蜜丸如梧子大硃砂爲衣每服三十丸蓮心湯下治勞心夢遺。梅師方睡卽洩精白龍骨四分韭子五合爲散空心酒服方

寸七、又方泄瀉不止白龍骨白石脂等分  
爲末水丸梧子大紫蘇木瓜湯下量大人小  
兒用亦治久痢休息 姚和衆方久痢脫肛  
白龍骨粉撲之 龍齒同荆芥澤蘭牡丹皮  
蘇木人參牛膝紅花蒲黃當歸童便治產後  
惡血撲心妄語顛狂如傷寒發狂者切不可  
認作傷寒治誤則殺人 同牛黃犀角鈞藤  
鈞丹砂生地黃茯苓神琥珀金箔竹瀝天竹黃

蘇合香治大人小兒驚癇癩疾

簡誤

龍骨味瀋而主收斂凡洩痢腸癖及女子漏  
下崩中溺血等證皆血熱積滯爲患法當通  
利疎泄不可使用止瀋之劑恐積滯瘀血在  
內反能爲害也惟久病虛脫者不在所忌  
麝香味辛溫無毒主辟惡氣殺鬼精物溫瘧蠱  
毒癰瘡去三蟲療諸凶邪鬼氣中惡心腹暴痛

脹急痞滿風毒婦人難產墮胎去面黧音孕目中  
膚翳久服除邪不夢寤魘寐通神仙 忌大蒜

疏○陶弘景云麝常食栢葉又噉蛇予以爲  
其香必非因噉蛇而結蘇頌乃云夏月食蛇  
多至寒則香滿入春臍內急痛自以爪剔出  
陶云五月得香往往有蛇皮骨豈有食蛇逾  
一年而皮骨尚不化者乎不知麝乃山獸好  
食香水芳草如栢葉之類故其氣聚於臍而

結成是香或遇蛇亦噉但不結香耳如必噉  
蛇多而後有香則此藥必大毒難近之物安  
得味辛氣溫無毒耶甄權言苦辛其香芳烈  
爲通關利竅之上藥凡邪氣着人淹伏不起  
則關竅閉塞辛香走竅自內達外則毫毛骨  
節俱開邪從此而出故主辟惡氣殺鬼精物  
凶邪蠱毒溫瘧中惡心腹暴痛脹急痞滿風  
毒諸證也其主癩瘞者借其氣以達於病所

也苦辛能殺蟲故主去三蟲辛溫主散故能去面黧及目中膚翳性能開竅故主難產墮胎也走竄之性而云久服除邪不夢寤魘寐通神仙者凡香皆能辟除惡氣而通神明故有是功能也日華子云納子宮煖水臙止冷帶疾藥性論主小兒驚癇客忤蝕一切癰疽膿水今人又用以治中風中氣中惡痰厥猝仆兼人膏藥傳藥皆取其通竅開經絡透肌

骨之功耳

主治參互

同犀角牛黃琥珀龍齒遠志升砂鉛丹金箔  
菖蒲真珠茯神天竺黃治心氣虛怯驚邪癲  
癇或夢寐紛紜鬼交鬼疰及小兒急驚大人  
中惡等證 同白及白歛紅白藥子雄黃烏  
雞骨煨乳香沒藥冰片爲末傳一切癰疽疔  
腫有神 濟生方中風不省麝香二錢研末

入清油二兩和勻灌之卽甦 又方食諸果  
 成積傷脾作脹氣急用麝香一錢生桂末一  
 兩飯和丸菘豆大大人十五丸小兒七丸白  
 湯下蓋果得麝卽落木得桂卽枯故也 夏  
 子益奇疾方口內肉毬根如線五寸餘如釵  
 股吐出乃能食物捻之則痛徹心者麝香一  
 錢研水服之日三自消 續千金方催生易  
 產麝香一錢水研服 經驗方鼠咬成瘡麝

香封之妙并治蠶咬成瘡

簡誤

麝香走竄飛揚內透骨竅臟腑外徹皮肉及  
 筋其性能射故善穿透開散東垣云凡風病  
 在骨髓者用之使風邪得出若在肌肉用之  
 反引風入骨丹溪云五臟之風不可用麝香  
 以瀉衛氣二公之言誠得其旨矣凡似中風  
 小兒慢脾風與夫陰陽虛竭發熱吐血盜汗

自汗氣虛眩暈氣虛痰熱血虛痿弱血虛目  
 翳心虛驚悸肝虛癰瘕產后血暈胎前氣厥  
 諸證之屬於虛者法當補益槩勿施用卽如  
 不得已欲借其開通關竅於一時亦宜少少  
 用之勿令過劑姓省開通之後不可復用矣  
 孕婦不宜佩帶勞怯人亦忌之李廷飛云不  
 可近鼻有白蟲入腦患癩久帶其香透關令  
 人成異疾

牛黃味苦平有小毒主驚癇寒熱熱盛狂瘕除  
 邪逐鬼療小兒百病諸癰熱口不開大人狂癩  
 又墮胎久服輕身增年令人不忘人參為之使  
惡常山畏牛  
 漆 膝 乾  
 疏○牛為土畜其性甘平惟食百草其精華  
 凝結為黃猶人身之有內丹也故能解百毒  
 而消痰熱散心火而療驚癇為世神物諸藥  
 莫及也凡牛生黃則夜視其身有光皮毛潤

牛有黃則兩眼紅鳴  
 吼飲水不好始水急以  
 盆水置棧外引之飲  
 飲不能渴甚必自吐  
 黃來侯者喝而隨之  
 與生黃家貴次有角  
 黃心黃肝黃胆黃各  
 從所得為名  
 牛角能治瘧血之崩赤  
 白帶下冷痢吐瀉  
 耳中垢數能傷  
 口中涎主苦胃  
 鼻茶以叶卷燒及臭  
 下生痰敷妙  
 口中胎汁喉潤皆道  
 可治

澤眼如血色蓋得氣之精而形質變化自有異也或云牛病乃生黃者非也本經味苦氣平別錄有小毒吳普云無毒然必無毒者爲是入足厥陰少陽手少陰經其主小兒驚癇寒熱熱盛口不能開及大人癲狂癇瘕者皆肝心二經邪熱膠痰爲病心熱則火自生焰肝熱則木自生風風火相搏故發如上等證此藥味苦氣涼入二經而能除熱消痰則風

火息神魂清諸證自瘳矣鬼邪侵着因心虛所致小兒百病多屬胎熱入心養神除熱解毒故悉主之也性善通竅故能墮胎善除熱益心故能令人不忘非久服多服之藥其云輕身延年者蓋指病去則身自輕安而得盡其天年也

主治參互

同犀角琥珀天竺黃鈞藤鈎朮神真珠金箔

麝香丹砂治小兒驚癇百病 入外科內服  
藥能解疔腫癰疽毒并可入傳藥止痛散毒  
如神 同犀角生地黃牡丹皮竹葉麥門冬  
治小兒五色丹毒 同鍾乳石真珠猪牙皂  
角象牙末白殭蠶紅鉛片腦明礬沒藥蛙竹  
屑天靈蓋爲丸十茯苓湯下治結毒有神  
姚和衆方小兒初生三日去驚邪辟惡氣以  
牛黃一豆許以蜜少許研勻綿蘸令兒吮之

一日令盡 外臺秘要小兒七日口噤牛黃  
爲末以淡竹瀝化一字灌之更以猪乳滴之  
錢氏小兒方初生胎熱或身體黃者以真  
牛黃一豆大入蜜調膏乳汁化開時時滴兒  
口中兼治腹痛夜啼 總微錄小兒熱驚或  
驚癇嚼舌迷悶仰目牛黃一杏仁大竹瀝薑  
汁各一合和勻與服 又方小兒積熱毛焦  
臍語欲發驚者牛黃六分硃砂五錢同研以



犀角磨汁調服一錢 王氏痘疹方痘瘡黑陷牛黃二粒朱砂一分研末蜜浸臘脂取汁調搽并可內服

簡誤

牛黃治小兒百病之聖藥蓋小兒稟純陽之氣其病皆胎毒痰熱所生肝心二經所發此藥能化痰除熱清心養肝有起死回生之力惟傷乳作瀉脾胃虛寒者不當用

熊脂味甘微寒微溫無毒主風痺不仁筋急五藏腹中積聚寒熱羸瘦頭瘍白禿面疝飽食飲吐嘔久服強志不饑輕身長年

疏○詩云惟熊惟羆男子之祥取其爲陽獸而強力壯毅也本經味甘氣微寒別錄微溫無毒其主風痺不仁筋急者蓋風爲陽邪熊爲陽獸其氣溫能通行經絡其性潤能滋養肝脾故主之也滑澤而通行故主五藏腹中

積聚及食飲吐嘔甘寒而強力故能主寒熱  
羸瘦輕身性潤而疎風故能主頭瘍白禿面  
疝胞也久服強志不饑長年甚言其補虛壯  
筋骨之功耳熊掌乃八珍之一食之可禦風  
寒益氣力肉與脂同功河間云熊肉振羸是  
因其氣有餘以補不足者也

○熊膽味苦寒無毒療時氣熱盛變為黃疸暑  
月久痢疔蠱心痛疰忤藥性論小兒疰疔殺蟲治惡瘡

胆唯清真試以益水以虛先  
封中而得胆末少許投虛  
上塵即兩邊分製胆則一  
錦運行以真也

疏○熊膽氣味與象膽同其所主亦相似時  
氣熱盛變為黃疸熱邪在足太陰也久痢疔  
蠱溼熱在手陽明也心痛疰忤熱邪在手少  
陰也入三經而除熱邪故能療諸證也極苦  
而寒故又能殺蟲治惡瘡點痔

主治參互

齊東野語赤目障翳熊膽丸以膽少許化開  
入片腦一二釐研勻點上絕妙 聖惠方小

兒鼻蝕熊膽半分湯化抹之 外臺秘要十  
年痔瘡熊膽塗之神効一切方不及也或加  
入片腦少許以豬膽汁和塗亦妙 保幼大  
全諸疔羸瘦熊膽使君子末等分研勻瓷器  
蒸溶蒸餅丸麻子大每米飲下二十九

簡誤

凡膽皆極苦寒而能走肝膽二經瀉有餘之  
熱蓋以類相從也小兒疔積多致目內生翳

障者以肝脾二臟邪熱壅滯則二臟之氣血  
日虛閉塞日甚故也用此瀉肝膽脾家之熱  
則內邪清而外障去矣如不因疔證而目生  
翳障及痘後蒙閉者多因肝腎兩虛宜滋陰  
養血清熱爲急諸膽皆不得用有痼疾者不  
可食熊肉令終身不愈

象牙無毒主諸鐵及雜物入肉刮取屑細研和  
水傅瘡上立出

疏○象牙本經無氣味日華子云平海藥云  
寒應是甘寒無毒之物象性勇猛而牙善蛻  
故能出一切皮肉間有形滯物如經所言也  
又能治邪魅驚悸風癩及惡瘡拔毒長肉生  
肌去漏管等用

主治參互

同明礬黃蠟牛角鯁鉛花金頭蜈蚣蝟皮猪  
懸蹄治通腸漏能去漏管 治楊梅結毒載

牛黃條內 王氏痘疹方痘疹不收象牙屑  
銅銚炒黃紅色爲末每服七八分白湯下  
又方鍼箭入肉象牙末水和傳之卽出也  
日華子治小便不通象牙生煎服之小便過  
多燒灰飲下

○象膽主明目及治疔治瘡腫以水化塗之治  
口臭以綿裹少許貼牙根平旦漱去數度卽  
瘥

疏○象膽苦寒之物也入肝脾二經肝熱則目不明脾家鬱熱則成疔積或口臭苦寒除二經之熱故能主諸證苦寒涼血解毒故又能主瘡腫也今世治疔證癩瘡傳屍多用之總取其苦寒能殺疔蟲癩蟲兼除臟腑一切熱結也

主治參互

同獺肝盧會乾漆胡黃連青黛鬼白丹砂入

滋腎藥內治傳屍癩瘡 聖濟總錄內障目翳用象膽半兩鯉魚膽七枚熊膽一分牛膽半兩麝香一分石決明一兩爲末糊九菉豆大每茶下十九日二

○象皮其性最易收斂人以鈎刺插入皮中拔出半日其瘡卽合故入膏散爲長肉合金瘡之要藥

簡誤

象膽苦寒之極不利脾胃凡疴證脾弱者目  
病血虛者咸不宜多服象牙及皮氣味和平  
於臟腑無迕故不著簡誤

白膠味甘平溫無毒主傷中勞絕腰痛羸瘦補  
中益氣婦人血閉無子止痛安胎療吐血下血  
崩中不止四肢酸疼多汗淋露折跌傷損久服  
輕身延年一名鹿角膠

得火良畏大黃

疏○白膠是熬鹿角而成故其味甘氣平別

錄溫無毒氣薄味厚降多升少陽中之陰也  
入足厥陰少陰手少陰厥陰經經曰勞則喘  
且汗出內外皆越中氣耗矣故凡作勞之人  
中氣傷絕四肢作痛多汗或吐血下血皆肝  
心受病此藥味甘氣溫入二經而能補益中  
氣則絕傷和四肢利血自止汗自斂也折跌  
傷損則血瘀而成病甘溫入血通行又兼補  
益故折跌傷損自愈婦人血閉無子及崩中

淋露胎痛不安腰痛羸瘦者皆血虛肝腎不足之候溫肝補腎益血則諸證自退而胎自得所養也血氣生真陽足故又服能輕身延年耳更治尿血溺精瘡瘍腫毒及漏下赤白婦人久服能令有子

主治參互

同牛膝牡丹皮麥門冬地黃真蘇子鬱金白芍藥當歸童便續斷治勞傷吐血 同山茱

黃枸杞子鹿茸地黃麥冬杜仲補骨脂懷山藥車前子五味子巴戟天蓮鬚治腎虛陽痿精寒無子加入當歸紫石英治婦人血閉子宮冷服之受孕 外臺秘要虛勞尿精及尿血白膠二兩炙酒二升頓和溫服 肘后方妊娠卒下血以酒煮膠二兩消盡頓服

簡誤

鹿乃仙獸純陽之物也其治勞傷羸瘦益腎

添精煖腰膝養血脈強筋骨助陽道之聖藥也然而腎虛有火者不宜用以其偏於補陽也上焦有痰熱及胃家有火者不宜用以其性熱復膩滯難化也凡吐血下血係陰虛火熾者柴不得服

阿膠味甘平微溫無毒主心腹內崩勞極洒洒如瘧狀腰腹痛四肢酸疼女子下血安胎丈夫小腹痛虛勞羸瘦陰氣不足脚酸不能久立養

肝氣久服輕身益氣一名傅致膠

得火良薯蕷爲之使畏大

黃凡用以蛤粉炒或酒化成膏亦得

疏○阿膠舊云煮牛皮作之藏器與蘇頌皆云是烏驢皮其說爲的其功專在於水按阿井在山東兗州府東阿縣乃濟水之伏者所注其水清而重其色正綠其性趨下而純陰與衆水大別本經味甘氣平別錄微溫熱毒元素云性平味淡氣味俱薄可升可降陽中



陰也入手太陰足少陰厥陰經其主女子下  
血腹內崩勞極洒洒如瘧狀腰腹痛四肢酸  
疼胎不安及丈夫少腹痛虛勞羸瘦陰氣不  
足脚酸不能久立等證皆由於精血虛肝腎  
不足法當補肝益血經曰精不足者補之以  
味味者陰也補精以陰求其屬也此藥得水  
氣之陰具補陰之味俾入二經而得所養故  
能療如上諸證也血虛則肝無以養益陰補

血故能養肝氣入肺腎補不足故又能益氣  
以肺主氣腎納氣也氣血兩足所以能輕身  
也今世以之療吐血衄血血淋尿血腸風下  
血血痢女子血氣痛血枯崩中帶下胎前產  
後諸疾及虛勞咳嗽肺痿肺癰膿血雜出等  
證神効者皆取其入肺入腎益陰滋水補血  
清熱之功也

主治參互

同天麥門冬栝樓根白藥子五味子桑白皮  
剪草生地黃枸杞子百部蘇子白芍藥治肺  
腎俱虛咳嗽吐血 同杜仲枸杞子白芍藥  
山藥麥門冬地黃黃耆人參青蒿續斷黃檗  
治婦人崩中漏血 同白芍藥炙甘草麥冬  
地黃白膠當歸枸杞子杜仲續斷治婦人胎  
痛或胎漏下血 直指方老人虛秘阿膠炒  
二錢葱白三根水煎化入蜜二匙溫服 仲

景方黃連阿膠湯治少陰病得之二三日以  
上心中煩不得臥者用阿膠三兩黃連四兩  
黃芩一兩芍藥二兩雞子黃二枚以水五升  
先煮三物取二升去滓內膠烱盡小冷內雞  
子黃攪令相得溫服七合日三、和劑局方  
治腸胃氣虛冷熱不調下痢赤白裏急後重  
腹痛小便不利用阿膠二兩炒黃連三兩茯  
苓二兩爲末搗丸梧子大每服五十九丸米湯

下口三 千金翼吐血不止阿膠炒二兩蒲  
黃六合生地黃三兩水五升煮三升分服兼  
治衄血 梅師方妊娠下血不止阿膠三兩  
炙爲末酒一升煎化服卽愈 產寶方膠艾  
湯妊娠胎動阿膠艾葉各二兩葱白一升水  
四升煮一升分服

簡誤

此藥多偽造皆雜以牛馬皮舊革鞍靴之類

其氣濁穢不堪入藥當以光如瑩漆色帶油  
綠者爲真真者折之卽斷亦不作臭氣夏月  
亦不甚溼軟如入調經丸藥中宜入醋重湯  
頓化和藥其氣味雖和平然性黏膩胃弱作  
嘔吐者勿服脾虛食不消者亦忌之

牛乳微寒補虛羸止渴

乳腐味甘微寒無毒主潤五藏利大小便益十  
二經脉

疏○牛乳乃牛之血液所化其味甘其氣微寒無毒甘寒能養血脈滋潤五藏故主補虛羸止渴及乳腐所主皆同也日華子主養心肺解熱毒潤皮膚者亦此意耳肝味苦甘氣和平食之能補肝治雀盲

主治參互

同人乳羊乳梨汁蘆根汁蔗漿熬膏治反胃噎膈大便燥結宜時時飲之兼能止消渴

夏子益奇疾方肉人恠病人頂生瘡五色如櫻桃狀破則自頂分裂連皮剝脫至足名曰肉人常飲牛乳自消

簡誤

患冷氣人忌之與酸物相反令人腹中癥結脾胃作泄者亦不得服

酥微寒補五藏利大腸主口瘡

疏○酥乃牛乳所出乳之精華也其味甘氣

微寒無毒性滑澤五臟皆屬陰酥乃陰血之精華故能補五藏血枯火盛大腸燥結及口舌生瘡其寒除熱補血故主利大腸口瘡也按酥酪醍醐總成於牛乳但有精粗之別耳其性大抵皆滋潤滑澤宜於血熱枯燥之人其功不甚相遠故二物不復載

### 主治參互

凡一切藥用酥炙者取其潤燥兼能益精髓

補血脈又有滲入骨肉使骨易糜之功 外臺秘要一切肺病咳嗽膿血不止用好酥五十斤煉三遍當出醍醐每服一合日三服以瘡爲度神効

### 簡誤

性能利竅驟食之使人遺精

神農本草經疏卷之

國家圖書館, NATIONAL CENTRAL LIBRARY, TAIWAN, R.O.C

神農本草經疏卷之十七

獸部中品

總十七種今疏其要者九種

白馬莖

尿溺附

鹿茸

角髓腎附

牛角鯁

膽肉附

羖羊角

肝腎肉附

狗陰莖

頭骨血肉

附

羚羊角

犀角

虎骨

兔頭骨

腦肝肉附

白馬莖味鹹甘平無毒主傷中脉絕陰不起強



志益氣長肌肉肥健生子小兒驚癇陰乾百日用

疏○馬火畜也其陰莖又純陽之物也故能主男子陰痿堅強房中藥多用之本經味鹹氣平別錄甘無毒察其功用氣平應作溫非甘溫則不主傷中脉絕以甘能補血脉溫能通經絡故耳陽衰則陰不起而生長之道絕鹹溫走下焦補助真陽則陰自起精自煖故

能令人有子也氣屬陽陽得補故能益氣腎藏志腎氣足故能強志甘溫補血脉而助真氣故又能長肌肉肥健也別錄又主小兒驚癇者似非其所長應是誤入耳凡收當取銀色無病白馬春月游牝時力勢正強者生取陰乾百日用時以銅刀切片將生羊血拌蒸半日去血晒乾判用

主治參互



得肉菘蓉巴戟天山茱萸兔絲子真陽起石  
人參鹿茸狗陰莖作丸治真陽虛脫陰痿不  
起下元冷憊等證

簡誤

馬陰莖乃純陽之物也凡陰虛火盛者不得  
服人但喜其溫煖滋助陽道少年多慾者房  
中術用之仗其力勢恣欲無節以致損竭真  
陰多成勞瘵不可不戒也

○馬通微溫主婦人崩中止渴及吐下血鼻衄  
金瘡止血

疏○白馬通本經雖云微溫然必是苦而涼  
者也惟其苦涼所以能療諸血熱證止渴及  
孟詵主陰陽易垂死者絞汁服也

○白馬溺味辛微寒主消渴破癥堅積聚男子  
伏梁積疝婦人瘕疾銅器盛飲之

疏○白馬溺昔有人與其奴皆患心腹痛病

奴死剖之得一白鼈赤眼仍活以諸藥納口中終不死有人乘白馬觀之馬尿墮鼈而鼈縮遂以灌之卽化成水其人乃服之疾亦愈觀其氣味不應有如是之功乃知物性畏忌各有所制如刀柄之刈三稜而化爲水正以遇其所制之物故也本經云氣微寒然詳其用必是微溫味應帶鹹辛鹹溫具足所以能療經所言諸證

主治參互

千金方食髮成瘕咽中如有蟲上下者白馬尿飲之佳 鮑氏方利骨取牙白馬尿浸茄稗三日炒爲末點牙卽落

簡誤

無積聚癥瘕者不得服胸中虛痞誤作伏梁服之有損

鹿茸味甘酸溫微溫無毒主漏下惡血寒熱驚

癩益氣強志生齒不老療虛勞洒洒如瘧羸瘦  
 四肢酸疼腰脊痛小便利洩精溺血破留血在  
 腹散石淋癰腫骨中熱疰瘰瘰應作瘍○凡用  
 茸端如瑪瑙紅玉破之肌如朽木者最良  
 先以酥薄塗勻於烈炎中燎去毛再炙

疏○鹿茸稟純陽之質含生發之氣故其味  
 甘氣溫別錄言酸微溫氣薄味厚陰中之陽  
 也入手厥陰少陰足少陰厥陰經婦人衝任  
 脉虛則為漏下惡血或瘀血在腹或為石淋

男子肝腎不足則為寒熱驚癇或虛勞洒洒  
 如瘧或羸瘦四肢酸疼腰脊痛或小便數利  
 洩精溺血此藥走命門心包絡及腎肝之陰  
 分補下元真陽故能主如上諸證及益氣強  
 志生齒不老也癰腫疽瘍皆榮氣不從所致  
 甘溫能通血脉和腠理故亦主之日華子主  
 補男子腰腎虛冷脚膝無力夜夢鬼交精溢  
 自出女人崩中漏血赤白帶下炙末空心酒

服方寸七

主治參互

同牛膝杜仲地黃山茱萸補骨脂巴戟天山藥肉蓯蓉兔絲子治腎虛腰痛及陰痿不起。澹寮方班龍丸治諸虛用鹿茸酥炙鹿角膠炒成珠鹿角霜陽起石煨紅醋淬肉蓯蓉酒浸酸棗仁柏子仁黃耆各一兩地黃九蒸八錢朱砂半錢各爲末酒糊丸梧子大每空

心酒下五十九昔西蜀市中有一道人貨之一名茸珠丹每醉高歌曰尾閭不禁滄海竭九轉靈丹都漫說惟有班龍頂上珠能補玉堂關下穴朝野遍傳之卽此方也 普濟方鹿茸酒治陽事虛痿小便頻數面色無光用嫩鹿茸一兩去毛切片山藥末一兩絹袋裹置酒甕中七日後開甕日飲三盃將茸焙乾作丸服 本事方陰虛腰痛不能反側鹿茸

兔絲子各一兩苗朮半兩為末以羊腎二對  
 和酒煮爛搗如泥和丸梧子大陰乾每服三  
 五十九酒下日三服 濟生方室女白帶因  
 衝任虛寒者鹿茸酒蒸焙二兩金毛狗脊白  
 歛各一兩為末用艾煎醋打米糊丸梧子大  
 每酒下五十九日二服 簡誤同白膠

○鹿角味鹹無毒主惡瘡癰腫逐邪惡氣留血  
 在陰中除小腹血急痛腰脊痛折傷惡血益

氣 杜仲為之使

疏○鹿山獸屬陽夏至解角者陰生陽退之  
 象也麋澤獸屬陰冬至解角者陽生陰退之  
 象也是以麋茸補陰鹿茸補陽角亦如之凡  
 角初生軟嫩者為茸稟壯健之性故能峻補  
 腎家真陽之氣熬成白膠則氣味甘緩能通  
 周身之血脉生角則味鹹氣溫惟散熱行血  
 消腫辟惡氣而已鹹能入血軟堅溫能通行

散邪故主惡瘡癰腫逐邪惡氣及留血在陰  
中少腹血急痛折傷惡血等證也肝腎虛則  
爲腰脊痛鹹溫入腎補肝故主腰脊痛氣屬  
陽補陽故又能益氣也日華子云水磨服治  
脫精尿血夜夢鬼交醋磨汁塗瘡瘍癰腫熱  
毒火灸熱熨小兒重舌鵝口瘡孟詵云蜜炙  
研末酒服輕身強骨髓補陽道絕傷又治婦  
人夢與鬼交者酒服一撮卽出鬼精燒灰治  
女子胞中餘血不盡欲死者悉取其入血行  
血散熱消腫補陽辟邪之意也

主治參互

濟生方骨虛勞極面腫垢黑脊痛不能久立  
血氣衰憊髮落齒槁甚則喜唾用鹿角屑二  
兩牛膝一兩半爲末煉蜜丸梧子大每服五  
十九空心鹽湯下 肘後方腎虛腰痛如錐  
刺不能動搖鹿角屑三兩炒黃研末空心溫

酒服方寸七日三子母秘錄產後腹痛瘀血不盡者鹿角燒研豉汁服方寸七日三并治產後血暈千金方蹉跌損傷血瘀骨痛鹿角末酒服方寸七瀕湖方癰癤腫痛毒鹿角尖磨濃汁塗之

簡誤

無瘀血停留者不得服陽盛陰虛者忌之胃火齒痛亦不宜服

○髓味甘溫主丈夫女子傷中絕脉筋急痛欬逆以酒和服之良

疏○髓者精血之純懿內充以實骨者也鹿稟純陽故其髓味甘氣溫性能補血而潤燥所以主一切血脉不和如傷中脉絕筋急痛及欬逆也日華子同蜜煮服壯陽道令人有子同地黃汁煎膏服填骨髓壯筋骨治嘔吐者亦此意也

○腎平主補腎氣

疏○鹿性淫一牡常御百牝腎氣有餘故也故服之能壯陽道補腎家不足

○鹿肉甘溫補中強五臟益氣力生者療口僻割薄之

疏○鹿所食多芳草其性質芳潔氣味醇和故其肉味甘氣溫無毒與他肉不同也性能益脾胃通血脉故主補中強五臟益氣力也

生者療中風口僻亦取其有通血脉之功血脉通則口僻自正也

牛角鯁下閉血瘀血疼痛女人帶下燔之味苦無毒

疏○牛角鯁乃角中嫩骨也爲筋之粹骨之餘入足厥陰少陰血分之藥兼入手陽明經若能泄溫能通行故主婦人帶下及閉血瘀血疼痛也



主治參互

同猪懸蹄狷皮金頭蜈蚣蛙竹屑明礬白蠟  
去漏管 近效方大便下血黃牛角鯁一具  
煨末煮豉湯服二錢日三 塞上方鼠瘦痔  
疾牛角鯁燒灰酒服方寸七

○膽味苦大寒無毒除心腹熱渴利口焦燥益  
目精可丸藥

疏○膽牛食百草其精華萃於膽其味苦其  
氣大寒無毒經云寒以勝熱苦以泄結故主  
心腹熱及渴利口焦燥也肝開竅於目肝熱  
則目睛不明入肝泄熱故益目精也近世以  
南星末釀入陰乾治驚風有奇功者取其苦  
寒製南星之燥俾善於豁痰除熱耳

簡誤

脾胃虛寒者忌之目病非風熱者不宜用

○牛肉味甘平無毒主安中益氣養脾胃

疏○牛土畜也黃中央正色也經云中央色黃入通於脾故爲益脾胃之藥脾胃得所養則中自安氣自益矣丹溪朱氏有倒倉法非爲其有吐下之力也特飲之既滿或上湧下泄爾此蓋借其補以爲瀉故積聚去而腸胃得所養亦奇法也但病非關腸胃者不宜服凡牛病死及黑身白頭獨肝者皆不宜服合猪肉及黍米酒食竝生寸白蟲合韭薤食令

人熱病合生薑食損齒又云牛乃稼穡之資不可多殺及食若以之療病則藥物甚多以之供饌核則肥甘不少似可無此一物也好生君子其念及而力戒之當有冥福耳  
殺羊角味鹹苦溫微寒無毒主青盲明目殺疥蟲止寒洩辟惡鬼虎狼止驚悸療百節中結氣風頭痛及蠱毒吐血婦人產後餘痛久服安心益氣輕身取之時勿中溼溼卽有毒

疏○羊角乃肺肝心三經藥也而入肝爲正  
本經鹹溫別錄苦微寒甄權大寒察其功用  
應是苦寒居多非苦寒則不能主青盲驚悸  
殺疥蟲及風頭痛蠱毒吐血也蓋青盲肝熱  
也驚悸心熱也疥蟲溼熱也風頭痛火熱上  
升也蠱毒吐血熱毒傷血也苦寒總除諸熱  
故能療如上等證也驚悸平則心自安熱傷  
氣熱除則氣自益其主百節中結氣與婦人

產後餘痛亦指血熱氣壅者而言本經又主  
止寒洩及辟惡鬼虎狼未解其義俟博物者  
詳之

主治參互

子母秘錄產後寒熱心悶脹極百病殺羊角  
燒末酒服方寸匕 普濟方治小兒癩疾方  
同上

○羊腎補腎氣益精髓

疏○羊腎補腎氣者以其類相從借其氣以補其不足也腎得補則精髓自益矣

主治參互

羊腎一對去脂切肉菹容一兩酒浸一夕去皮膜和作羹加五味食治勞傷陽虛無力

○羊肉味甘大熱無毒主緩中宇乳餘疾及頭腦大風汗出虛勞寒冷補中益氣安心止驚

反牛夏

煮羊肉忌和醬生癩及黃痢疾

疏○羊得火土之氣以生故其味甘氣大熱無毒素問言苦亦以其性熱屬火耳李杲云補可去弱人參羊肉之屬是已羊肉有形凡形氣痿弱虛羸不足者宜之其主宇乳餘疾者蓋產後大虛血氣暴損得甘熱之物補助陽氣則陰血自長餘疾自除矣中氣虛則心不安或驚惕陽氣弱則頭腦大風汗出補中則中自緩故能安心止驚益氣則陽自足故

能療頭腦大風汗出及虛勞寒冷也

主治參互

金匱要略羊肉湯治寒勞虛羸及產後心腹  
疝痛用肥羊肉一斤水一斗煮汁八升入當  
歸五兩黃耆八兩生薑六兩煮取二升分四  
服 又方產後虛羸腹痛冷氣不調及腦中  
風汗自出白羊肉一斤治如常調和食之  
飲膳正要壯胃健脾羊肉三斤切梁米二升

同煮下五味作粥食 千金方損傷青腫用

新羊肉貼之

簡誤

羊肉味甘大熱脾胃虛寒羸瘦氣乏者宜之  
然天行熱病後溫瘧熱痢後食之必致發熱  
難療妊婦食之令子多熱與夫癰腫瘡瘍消  
渴吐血嘈雜易饑等證咸不宜服又銅器煮  
食之男子損陽女子暴下物性之異如此不

可不知也

○羊肝性冷療肝風虛熱目赤暗無所見生食子肝七枚神効或切薄片水浸傳之

疏○羊肝補肝以類相從肝開竅於目肝熱則目赤痛失明補肝除熱所以能明目及治諸目疾也

主治叅誤

醫鏡翳膜羞明有淚肝經有熱也用青羊子

肝一具竹刀切和黃連四兩爲丸梧子大食遠茶清下七十九日三服忌鐵器猪肉冷水○羊血主女人中風血虛悶產後血暈悶欲絕者生飲一升卽活

疏○血爲水化故其味應鹹氣平無毒女人以血爲主血熱則生風血虛則悶絕鹹平能補血涼血故主女人血虛中風及產後血悶欲絕也性能解丹石毒如丹砂水銀汞粉生

銀礪砂砒霜硫黃鍾乳礬石陽起石等類凡覺毒發刺飲一升卽解凡服地黃何首烏諸補藥者須忌之

牡狗陰莖味鹹平無毒主傷中陰痿不起令強熱大生子除女子帶下十二疾一名狗精六月上伏取陰乾百日

疏○狗陰莖氣味與馬陰莖同其所主亦相似性專補右腎命門真火故能令陽道豐隆

精煖盈溢使人生子也女子帶下十二疾皆衝任虛寒所致鹹溫入下焦補煖二脉故亦主之也

主治參互

同兔絲子覆盆子魚膠車前子巴戟天肉蓯蓉鹿茸沙苑蒺藜山茱萸能益陽煖精使人有子

簡誤

陽事易舉者忌之內熱多火者勿服

○頭骨主金瘡止血

燒灰用黃狗者良餘骨燒灰生肌敷馬瘡及療諸瘡

瘦妬乳癰腫

疏○狗頭骨本經無氣味察其功用應是甘鹹溫之物鹹能入血甘能補血溫能和血故主金瘡止血也

主治參互

同血竭乳香沒藥蚺蛇膽麝蟲天靈蓋自然

銅治跌撲損傷有神臨杖時服之護心止痛

杖後服之生肌長肉 千金方治小兒久痢

狗頭骨燒灰白湯服非久痢虛寒者勿用

利濟局方狗頭骨丸治久痢臍腹疔痛所下

雜色晝夜不止或其人久虛所下腸垢謂之

惡痢竝能治之赤石脂乾薑各半兩肉豆蔻

煨附子炮去皮各一兩狗頭骨灰一兩爲末

醋和丸如桐子大每服六七十丸空心米飲



下非陰臟人及陽虛極者不宜用 聖惠方  
赤白帶下不止者狗頭骨燒存性爲末每酒  
服一錢日三 經驗方產後血不定奔四肢  
以狗頭骨灰酒服二錢甚效 衛生易簡方  
打損接骨狗頭骨灰熱醋調塗傷處暖臥  
壽域方惡瘡不愈狗頭骨灰黃丹等分敷之  
同白歛等分爲末生白酒調服五錢治少  
腹癰有神

○白狗血味鹹無毒主癩疾發作

疏○癩疾屬手少陰少陰主血藏神血虛而  
神自不寧故發是證此物入心補血以類相  
從故主癩疾發作也

簡誤

犬性熱以其稟火土之氣故助陽陽勝則發  
熱動火生痰發渴凡病人陰虛內熱多痰多  
火者慎勿食之天行病後尤爲大忌治痢亦

非所宜

○肉味鹹酸溫主安五藏補絕傷輕身益氣  
疏○犬火畜也其味鹹酸氣溫無毒乃脾胃  
家肉也五臟皆賴脾胃以養脾胃得補故主  
安五臟五臟安而身自輕氣自益絕傷自補  
矣日華子土補胃氣壯陽道暖腰膝益氣力  
孟詵主補五勞七傷益陽事補血脈厚腸胃  
實下焦填骨髓者皆取其溫暖脾胃之功則

氣血生長腰腎受庇陽道壯健而下焦煖也

主治參互

乾坤秘韞戊戌丸治男子婦人一應諸虛不  
足大補元氣用黃童子狗一隻去皮毛肚腸  
同外腎於砂鍋內以酒酢八分水二升入地  
骨皮一斤肉從容各半斤同煮一日去藥再  
煮一夜去骨再煮肉如泥搗細入當歸末四  
兩蓮肉蒼朮末各一斤山藥兔絲子末各十

兩甘草末八兩和杵千下丸梧子大每空心  
酒下六七十九 危氏方痔漏有蟲用熟犬  
肉蘸藍汁空心食七日効

簡誤

氣壯多火陰虛之人不宜食凡犬肉不可炙  
食令人消渴妊婦食之令子無聲熱病後食  
之殺人道家以犬爲地厭忌食

羚羊角味鹹苦寒微寒無毒主明目益氣起陰  
去惡血注下辟蠱毒惡鬼不祥安心氣常不魘  
寐療傷寒時氣寒熱熱在肌膚溫風注毒伏在  
骨間除邪氣驚夢狂越僻謬及食噎不通久服  
強筋骨輕身起陰益氣利丈夫

疏○羊火畜也而羚羊則屬木本經味鹹氣  
寒別錄苦微寒無毒氣薄味厚陽中之陰降  
也入手太陰少陰足厥陰經少陰爲君主之  
官虛則神明不守外邪易侵或蠱毒惡鬼不

祥或邪氣魘寐驚夢狂越僻謬矜羊性靈能  
通神靈逐邪氣心得所養而諸證除矣其主  
傷寒時氣寒熱熱在肌膚溫風注毒伏在骨  
間者皆厥陰爲病厥陰爲風木之位風熱外  
邪傷於是經故見諸證入肝散邪則諸證自  
除經曰壯火食氣又曰熱則骨消筋緩火熱  
太甚則陰反不能起而筋骨軟鹹寒入下焦  
除邪熱則陰自起氣自益筋骨強身自輕也

肝熱則目不明肝藏血熱傷血則惡血注下  
肝在志爲怒病則煩滿氣逆噎塞不通苦寒  
能涼血熱下降能平逆氣肝氣和而諸證無  
不瘳矣

主治參互

同犀角丹砂牛黃琥珀天竺黃金箔茯苓神遠  
志釣藤鈎竹瀝治驚邪魘寐及癩癩狂亂等  
疾。同枸杞子甘菊花決明子穀精草生地

黃五味子黃檗蜜蒙花木賊草女貞實治肝  
腎虛而有熱以致目昏生翳 外臺秘要噎  
塞不通羚羊角為細末飲服方寸七 千金  
方產後煩悶汗出不識人羚羊角燒末東流  
水服方寸七未愈再服

簡誤

凡肝心二經虛而有熱者宜之虛而無熱者  
不宜用凡用有神羊角甚長有二十四節挂

痕甚明內有天生木胎此角有神力抵于牛  
入藥不可單用須要不拆元對繩縛鐵銼銼  
細末盡處須重重密密裹恐力散也避風搗篩  
極細更研萬匝如飛塵後入藥免刮人腸

犀角味苦酸鹹寒微寒無毒主百毒蠱疰邪鬼  
瘴氣殺鉤吻鳩羽蛇毒除邪不迷惑魘寐療傷  
寒溫疫頭痛寒熱諸毒氣久服輕身駿健升麻  
松脂

為之使惡鳥頭忌鹽凡欲作末先鋸  
屑置人懷中一宿搗之應手成粉

疏○犀亦神獸也故其角之精者名通天夜  
視有光能開水辟邪禽獸見之皆驚駭辟易  
本經味苦氣寒無毒別錄酸鹹微寒李珣大  
寒味厚於氣可升可降陽中之陰也入足陽  
明兼入手少陰經陽明爲水竅之海無物不  
受又口鼻爲上下陽明之竅邪氣多從口鼻  
而入凡蠱毒鬼瘴與火風火邪熱氣之侵人  
也必先入於是經犀角爲陽明經正藥其性

神靈而寒故能除邪鬼省魘寐其味苦寒能  
散邪熱解諸毒故主百毒蠱疰瘴氣殺鉤吻  
鳩羽蛇毒及傷寒溫疫頭痛寒熱等證也邪  
熱去則心經清明人自不迷惑胃亦遂安而  
五臟皆得所養故能令人駿健及久服輕身  
也藥性論主鎮心神解大熱散風毒治發背  
癰疽瘡腫療時疾熱如火煩毒入心狂言妄  
語日華子治心煩止驚鎮肝明目海藥主風

毒攻心 耗熱悶 小兒疔豆 風熱驚癇 孟詵  
主中惡 心痛中 飲食藥毒 心風煩悶 中風失  
音及今人 用治吐血 衄血下血 傷寒畜血 發  
狂譫語 發黃發斑 痘瘡稠密 熱極黑陷 等證  
神効皆取 其入胃入 心散邪清 熱涼血解 毒  
之功耳

主治參互

同鬼白麝香 龍齒茯神 蘇合香 沉水香 天靈

蓋丹砂 雄黃能辟 鬼疰邪氣 同丹砂 琥珀  
金箔 天竺黃 牛黃 鈞藤 鈞鈴 羊角 真珠 麝香  
治大人 小兒 風熱 驚癇 磨汁 同生 地黃 紅  
花子 麥門冬 紫草 白芍藥 鼠黏子 治痘瘡 血  
熱初見 點紅 豔壯 熱口 渴煩 躁狂 語多 服可  
保無虞 磨汁 同鬱金 童便 生地黃 麥門冬  
炙甘草 白芍藥 紫蘇子 剪草 丹參 白藥子 治  
吐血 衄血 犀角 地黃 湯治 傷寒 畜血 發黃

或熱盛吐血 入紫雪丸治大人小兒顛狂  
溫疫蠱毒邪魅一切煩熱爲病 入抱龍丸  
治小兒恍惚驚悸痰涎壅塞 入至寶丹治  
中風不語中惡氣絕一切神魂恍惚癲狂擾  
亂等證 聖濟總錄吐血不止似鵝鴨肝用  
生犀角桔梗各一兩爲末每酒服二錢 廣  
利方治小兒驚癇不知人嚼舌仰目者犀角  
磨濃汁服之立効 錢氏小兒方痘瘡稠密

生犀角於澀器中新汲水磨濃汁冷飲之  
千金方癰疽毒瘡喜着十指狀如代指根深  
至肌能壞筋骨毒氣入藏殺人宜燒鐵烙之  
或灸百壯日飲犀角汁瘡 聖惠方下利鮮  
血犀角地榆金銀花各一兩升麻五錢爲末  
煉蜜丸彈子大每服一九水一升煎五合去  
滓溫服此熱毒伏於心經故也宜加丹砂滑  
石末以金銀藤花葵子煎藥更効



簡誤

痘瘡氣虛無大熱者不宜用傷寒陰證發躁因陰寒在內逼其浮陽失守之火聚於胸中上衝咽噎故面赤手溫煩嘔喜飲涼物食下良久復吐出惟脉沉細足冷雖渴而飲水不多且復吐出為異於陽證耳不宜誤用犀角涼劑妊婦勿多服能消胎氣

虎骨主除邪惡氣殺鬼疰毒止驚悸去惡瘡鼠

瘦頭骨尤良

畏蠶漆罽椒磁石

疏○虎西方之獸山獸之君屬金而性最有力語云風從虎者風木也虎金也木受金制焉得不從故虎嘯而風生自然之道也所以能治風病攣急屈伸不便走疰骨節風毒驚癇癩疾等證其性雖死而脛猶竚立不仆故脛骨治脚膝無力及手足諸風多効取以類相從借其氣有餘以補不足也本經無氣味

藥性論云味辛微熱無毒稟勇猛之氣其味更辛散而通行故主辟邪惡氣殺鬼疰毒止驚悸也惡瘡鼠瘦亦風邪浸淫所致消散風邪則惡瘡鼠瘦自除矣

主治參互

同牛膝木瓜地黃山藥山茱萸黃檗枸杞子麥門冬五味子治腰脚無力筋骨疼痛或痿弱不能步履同草薺獨活防已蒼朮牛膝

何首烏薏苡仁木瓜刺蒺藜治風寒溼邪着於經絡以致偏痺不仁同當歸白芍藥炙甘草續斷牛膝白膠麥門冬地黃治遍身骨節痛永類鈴方健忘驚悸預知散用虎骨酥炙白龍骨遠志等分爲末每服三錢生薑湯下日三久則令人聰慧李絳兵部手集虎骨治臂脛疼痛不計深淺皆効用虎脛骨二兩酥炙碎羚羊角屑一兩芍藥二兩切以

無灰酒浸之養至十日秋冬倍之每日空腹  
飲一盃若要速服卽入磁銀器中以火煖養  
二三日卽可服也 聖濟總錄歷節痛風虎  
脛骨炙三兩沒藥七錢爲末每服二錢溫酒  
下日三 小品方惡犬咬傷虎骨刮末水服  
并傳之

簡誤

凡血不足以養筋以致筋骨疼痛者宜少用

兔頭骨平無毒主頭眩痛癩疾 腦主塗凍瘡

肝主目暗 肉味辛平無毒主補中益氣

疏○兔屬金得太陰之精故其性喜望月兔  
至秋深時可食者金氣全也其肉味辛氣平  
無毒然詳其用味應有甘氣應作涼經曰裏  
不足者以甘補之又曰熱傷氣味甘而氣涼  
所以能補中益氣也肝爲風木之位太過則  
搖動撼物兔屬金而頭骨在上尤得氣之全

故能平木邪療頭眩痛癩疾也肝開竅於目  
兔目不瞬而瞭然其肝氣足也故能主目暗  
河間云兔肝明目因其氣有餘以補不足也  
腦爲髓之至精性溫而滑潤故主塗凍瘡皸  
裂及世人用爲催生利胎之聖藥也血味鹹  
寒能涼血活血解胎中熱毒亦能催生易產  
屎一名明月砂明目治目中翳膜勞瘵五疳  
痔瘻殺蟲解毒

主治參互


博濟方催生散用臘月兔腦攤紙上夾勻陰  
乾剪作符子於面上書生字一箇候產母痛  
極時用釵股夾定燈上燒灰煎丁香酒調下  
和劑局方催生丹麝香乳香母丁香爲末  
臘月兔腦和丸如次實大陰乾密封每一丸  
溫水下卽時產下隨男女左右手中握藥丸  
是驗 劉氏保壽堂方兔血丸小兒服之終

身不出痘瘡卽出亦稀少臘月八日取生兔一隻刺血和蕎麥麩少加丹砂雄黃四五分候乾丸菜豆大初生小兒以乳汁化下二三丸遍身發出紅點是其徵驗也但兒長成常以兔肉啖之尤妙 藺氏經驗方痘後目翳直往山中東西地上不許回顧尋兔屎二七粒以雌雄檳榔各一箇同磨不落地井水調服百無一失其效如神

### 簡談

妊娠不宜食兔肉令子缺唇且能致產不順性寒屬陰陽虛無熱者不宜服多服則損元氣痿陽事不宜合白雞獺肉薑橘芥同食八月至十月可食餘月傷人神氣

神農本草經疏卷之十七



國家圖書館, NATIONAL CENTRAL LIBRARY, TAIWAN, R.O.C.

神農本草經疏卷之十七

神農本草經疏卷之十八

獸部下品

總二十一種今疏其要者四種

猪懸蹄

足腎膽膚肝  
肪膏附

麋角

茸附


獺肝

膾肭臍

猪懸蹄主五痔伏熱在腸腸癰內蝕

疏○猪水畜也在辰屬亥在卦屬坎其肉氣

味雖寒然而多食令人暴肥性能作溼生痰



易惹風熱殊無利益耳其懸蹄乃蹄甲之懸起不着地者本經無氣味然為鹹寒無毒之物入手足陽明經藥也溼熱下注則為五痔內蝕熱壅血滯則為腸癰鹹寒能除腸胃之熱故主之也

主治參互

得牛角鯉槐角子狷皮象牙末金頭蜈蚣蛙竹屑明礬地榆青黛白蠟治通腸漏令漏管

自出 錢氏小兒方痘後目翳半年已上者一月取効用猪懸蹄三兩瓦瓶固濟煨蟬蛻一兩羚羊角三錢為末每歲一字三歲已上三錢溫水服日三

○猪四足小寒主傷撻諸敗瘡下乳汁

疏○乳屬陽明陽明脉弱則乳汁不通能益陽明經氣血故能下乳傷撻敗瘡必血熱作痛氣寒而味甘鹹故涼血止痛也又煮湯為



洗潰瘍之要藥

主治參互

廣濟方婦人乳無汁者以猪蹄四枚水二斗  
煮一斗去蹄入土瓜根通草漏蘆各三兩再  
煮六升去滓內葱白豉作粥或羹食之身體  
微熱有少汗出佳未通再作 梅師方癰疽  
發背乳發初起母猪蹄一隻通草六分綿裹  
煮羹食之 外科精要洗癰疽有猪蹄湯

○腎冷和理腎氣通利膀胱

疏○猪腎味鹹氣冷能瀉腎氣腎虛寒者不  
宜食本經主理腎氣乃借其同氣以引導之  
耳不言補而言理其意有在矣腎與膀胱爲  
表裏故復能利膀胱也今人誤認以爲補腎  
恣意食之大爲差謬不覩日華子云久食令  
人無子孟詵云久食令人傷腎其非補腎之  
物明矣

○膽主傷寒熱渴

疏○膽味苦氣寒經曰熱淫於內寒以勝之  
苦以泄之故主傷寒熱渴也

主治參互

仲景膽導法以猪膽汁和醋少許灌穀道中  
通大便神効入猪牙皂角細末二分攪勻更  
速蓋酸苦益陰潤燥而瀉便也 又治少陰  
下利不止厥逆無脉乾嘔煩者以白通湯加

猪膽汁主之使其氣相從無拒格之患此寒  
因熱用熱因寒用之義也葱白四莖乾薑一  
兩生附子一枚水三升煮一升入人尿五合  
猪膽汁一合分服 入雄黃末三四分蜈蚣  
末二分套指縛緊治天蛇毒有効 梅師方  
熱病蠱蝕上下用猪膽汁一枚醋一合煎沸  
服蟲立死 外臺秘要湯火傷瘡猪膽調黃  
礬末塗之

○膚仲景治足少陰下利咽痛胸滿心煩者有猪膚湯用猪膚一斤水一斗煮五升取汁入白蜜一升白粉五合熬香分服成無已註云猪水畜也其氣先入腎解少陰客熱加白蜜以潤燥除煩白粉以益氣斷利也

○肚主補中益氣止渴利

疏○猪肚屬土故其味必甘氣微溫無毒乃猪一身無害之物爲補脾胃之要品脾胃得

補則中氣益利自止矣日華子主補虛損蘇頌主骨蒸勞熱血脈不行皆取其補益脾胃則精血自生虛勞自愈根本固而五臟皆安也

主治參互

普濟方水瀉不止用猪肚一枚煮爛入平胃散搗丸服効 仲景方猪肚黃連丸治消渴用雄猪肚一枚入黃連末五兩栝樓根白朮

米各四兩知母三兩麥門冬二兩縫定蒸熟  
搗丸梧子大每服三十九米飲下 千金方  
溫養胎氣胎至九月消息用猪肚一枚如常  
着五味煮食至盡 又猪肚丸黃連一味爲  
細末量肚大小實之煮令極爛搗勻爲丸梧  
子大治臟毒下血 又方治腹脹大用烏葶  
去皮入雄肚線縫砂器煮糜食之勿入鹽  
○肪膏主煎諸膏藥解班猫茺青毒

疏○肪膏卽脂油也味甘寒性滑澤能涼血  
解毒潤燥故主煎諸膏藥及解班猫茺青毒  
也又能利腸胃通大小便能散風熱療惡瘡

主治參互

肘後方膏髮煎治女勞黃疸見髮髮條兼能  
治五疸 萬氏方肺熱暴瘡猪脂油一斤煉  
過入白蜜一斤再煉少頃濾淨冷定不時挑  
服一匙卽愈

○脛一名腎脂生兩腎中間似脂非脂似肉非肉乃人物之命門三焦發原處也陳藏器主肺痿咳嗽和棗肉浸酒服亦能主疰癖羸瘦蘇頌主肺氣乾脹喘急潤五藏去皴皸黧黯等證蓋是甘寒滑澤之物甘寒則津液生滑澤則垢膩去故主如上諸證也男子多食損陽薄大腸其能專在去垢膩可用以浣垢衣俗名豬胰子

按猪爲食味中常用之物臟腑腸胃咸無棄焉然其一身除肚膏外餘皆有毒發病人習之而不察也壯實者或暫食無害有疾者不可不知其忌故列其害於後○肉多食令人虛肥生痰熱熱病後食之復發不宜與薑同食食則發大風病○頭肉有病者食之生風發疾○腦食之損男子陽道臨房不能行事酒後尤不可食○血能敗血損陽服地黃何

首烏諸補藥者尤忌之多食耗心氣不可合  
吳茱萸食○肝餌藥人不可食合魚鱸食生  
癰疽合鯉魚腸子食傷人神延壽書云猪臨  
宰驚氣入心絕氣歸肝俱不可多食必傷人  
○脾孫思邈云凡六畜脾人一生莫食之○  
肺不可與白花菜合食令人氣滯發霍亂八  
月和飴食至冬發疽○腎久食令人傷腎少  
子冬月不可食損人真氣兼發虛壅○脛男

子多食損陽○腸多食動冷氣○鼻唇多食  
動風○舌多食損心

麋角甘無毒主痺止血益氣力

疏○麋屬陰好遊澤畔其角冬至解者陽長  
則陰消之義也爲補左腎真陰不足虛損勞  
乏筋骨腰膝酸痛一切血液衰少爲病故主  
止血益氣力及除痺也痺雖風寒溼合而成  
疾然外邪易入者由氣血先虛經絡因之壅

滯血脈不通故也麋角入血益陰榮養經絡  
故主之也茸功用相同而補陰之力更勝

主治參互

千金方麋角丸補心神安五臟填骨髓理腰  
脚能久立聰明耳目髮白更黑返老還少麋  
角取當年新角連腦頂者不論具數去尖一  
大寸截斷於淨盆中水浸每夜換易軟即將  
出削去皺皮以鎊鎊取白處至心卽止以清

米泔浸兩宿取出曝乾以無灰酒於大甕器  
中浸兩宿其藥及酒俱入淨釜中初用武火  
煎一食頃後以文火微煎如蟹眼柳木不住  
手攪時時添酒以成膏爲度煎時皆須平旦  
下手不得經宿仍看屑如稀膠卽以牛乳五  
升酥一升以次漸下後項藥另以麋角炙令  
黃爲末檳榔通草秦艽肉蓯蓉人參兔絲子  
甘草各一兩爲末將膠再煎一食頃似稀粥

卽止火投諸藥末和勻約稠黏堪作丸傾出  
衆手一時丸梧子大空腹酒下三十九日加  
一九至五十九爲度日二服至一百日忌房  
事服經一月腹內諸疾自相驅逐有微利勿  
怪服至二百日面皺光澤一年齒落更生強  
記身輕二年令人肥飽少食不老神仙合時  
須在淨室勿令陰人雞犬孝子等見 楊氏  
家藏方二至丸補虛損生精血去風溼壯筋

骨用鹿角鎊細以真酥一兩無灰酒一升慢  
火炒乾取四兩麋角鎊細以真酥二兩米醋  
一升慢火炒乾取四兩蒼耳子酒浸一宿焙  
半斤山藥白茯苓黃耆蜜炙各四兩當歸五  
兩肉蓯蓉酒浸焙遠志人參沉香各二兩五  
味子一兩通爲末酒煮糯米糊丸梧子大每  
服五十九溫酒鹽湯任下日二服

簡誤



陽氣衰少虛羸畏寒者勿用肉多食令人弱  
房

獺肝味甘有毒主鬼疰蠱毒却魚鯁止久嗽燒  
服之

疏○獺水中之獸也本經味甘有毒藥性論  
鹹微熱無毒詳其功用應是鹹勝甘劣微溫  
小毒之物入肝入腎之藥也經曰邪之所湊  
其氣必虛虛損勞極則五臟之神俱不安鬼

邪相挾而爲病久嗽者亦勞極所致水不勝  
火火氣上炎肺爲賊邪所干也鹹味潤下俾  
火氣下降則肺自清總之此藥能益陰氣補  
虛損保勞極故主如上諸證也甘鹹善於解  
毒故又主蠱毒獺性嗜魚故能却魚鯁也大  
抵其功長於治傳尸勞及鬼疰邪惡有效故  
張仲景治冷勞有獺肝丸崔氏治九十種蠱  
疰傳尸骨蒸伏連殮諸鬼毒癘疾有獺肝

九皆妙

主治參互

同盧會乾漆象膽青黛胡黃連啄木鳥頭狐  
脾虎胃丹砂天靈蓋治傳尸勞能殺勞蟲  
孟詵尸症一門悉患者獺肝一具燒水服方  
寸七日再 葛洪尸症鬼症乃是五尸之一  
又挾諸鬼邪爲害其病變動乃有三十六種  
至九十種大畧使人寒熱沉沉默默不知病

之所苦而無處不惡積月累年淹滯至死死  
後傳人乃至滅門覺有此候惟以獺肝散服  
之有效法如上除傳尸勞證外無他用故不  
著簡誤

膾膈臍味鹹無毒主鬼氣尸症夢與鬼交鬼魅  
狐魅心腹痛中惡邪氣宿血結塊疰癖羸瘦名一

海狗腎雷云此物多僞者真者有一對則兩重  
薄皮裏丸核其皮上有肉黃毛三莖共一穴溼  
潤常如新或置睡犬旁其犬忽驚跳若狂者真  
也與水烏龍似以此別之凡用酒浸一宿紙裹

本草

卷十八

綠君亭

炙香割成酒  
煎熟

疏○膾肭海獸也得水中之陽氣故其味鹹  
無毒藥性論大熱李珣甘香美大溫其味與  
獾肝相似第其氣倍熱耳所主鬼氣尸疰夢  
與鬼交鬼魅狐魅心腹痛中惡邪氣者蓋因  
真陽虛則神明不振幽暗易侵故諸邪惡纏  
疰爲病此藥專補陽氣則陰邪自辟所以能  
療如上等證也鹹能入血軟堅溫熱能通行

消散故又主宿血結塊及疰癖羸瘦也近世  
房術中多用之以其鹹溫入腎補虛煖腰膝  
固精氣壯陽道也

主治參互

同陽起石肉蓯蓉巴戟天兔絲子山茱萸鹿  
茸能壯陽道益精 和劑局方有膾肭臍丸  
治諸虛勞損鬼疰邪惡夢與鬼交精氣乏絕  
等證

簡誤

膾肭臍性熱助陽爲腎氣衰竭精寒痿弱之  
要藥然而陰虛火熾強陽不倒或陽事易舉  
及骨蒸勞嗽等候咸在所忌

神農本草經疏卷之十八

神農本草經疏卷之十九

禽部三品

總五十六種今疏其要者四種

雞

烏骨雞  
屎白

雞冠血  
雞子

胙  
胙裏黃皮

肝  
胞出卵殼  
雀卵  
附 雄雀屎

天鼠屎

白鴿

諸雞

疏○按雞為陽禽屬木而外應乎風故在卦

本草

疏卷十九

綠君亭

爲巽其色雖有丹白黃烏其種復有烏骨之  
異總之性熱補陽起陰兼有風火之義惟烏  
骨者別是一種獨得水木之精故主陰虛發  
熱蓐勞崩中等證也

簡誤

雞性熱動風凡熱病初愈癰疽未潰素有風  
病人咸忌之弘景云小兒五歲以下食雞生  
蛇蟲雞肉不可合葫芥李食不可合犬肝犬

腎並令人洩痢同兔食成痢同魚汁食成心  
痕同鯉魚食成癰瘡同獺肉食成遁尸同生  
葱食成蟲痔同糯米食生蛇蟲年久老鷄腦  
有大毒食之能發疔中其毒發疔者以玉樞  
丹丸可解

○烏骨鷄味甘平無毒主補虛勞羸弱消渴中  
惡鬼擊心腹痛益產婦治女人崩中帶下一  
切虛損諸疾

疏○烏骨鷄得水木之精氣其性屬陰能走  
肝腎血分補血益陰則虛勞羸弱可除陰回  
熱去則津液自生渴自止矣陰平陽秘表裏  
固密邪惡之氣不得入心腹和而痛自止鬼  
亦不能犯矣益陰則衝任帶三脉俱旺故能  
除崩中帶下一切虛損諸疾也古方烏骨鷄  
丸治婦人百病者以其有補虛益陰入血分  
之功也

主治參互

古方烏骨鷄丸治婦人產後蓐勞及陰虛等  
證方中半夏人參乃立方者之誤宜去之  
用骨一具煨存性同紅藥子白及白歛冰片  
雄黃朱砂乳香沒藥醋蜜調傅一切癰疽腫  
毒神効 治中惡心腹痛欲死但殺白烏骨  
鷄乘熱薄心卽瘥如鬼擊卒死用其熱血塗  
心下亦妙

○鷄冠血主乳難用三年老雄者取其陽氣充溢也凡風中血脉則口角僻喎冠血鹹而走血透肌肉故以之治中風口喎不正塗頰上効丹雄鷄爲陽禽冠血乃諸陽之所聚故能治中惡客忤邪氣高武痘疹正宗云雞冠血和酒服發痘最佳雞屬巽屬風頂血至清至高故也

主治參互

皆効方對口毒瘡熱鷄冠血頻塗之取散青囊襍纂中蜈蚣毒舌脹出口是也雄雞冠血浸舌并咽之勝金方諸蟲入耳鷄冠血滴入卽出

簡誤

痘瘡須分寒熱鷄血性溫天行瘡子虛寒者得之固可資其起發倘因血熱而乾枯焦黑者誤用之能更轉劇世人類用雞血桑蠹蟲



發痘而不分寒熱誤也

○肝主起陰氣

疏○肝本經主起陰氣性溫可知味甘微苦入足厥陰少陰經今人用以治小兒疳積眼目不明者取其導引入肝氣類相感之用也

主治參互

同蕪荑使君子胡黃連青黛五穀蟲穀精草蘆會治小兒疳熱目生障翳 千金方陰痿

不起用雄雞肝三具兔絲子一升爲末雀卵和丸小豆大每五六十九酒下日二服

○屎白微寒主消渴傷寒寒熱破石淋及轉筋

利小便止遺溺滅癥瘕雄鷄屎片有白臘月收之白鷄鳥骨者更

良素問作雞矢

疏○雞屎白微寒乃腸胃所出之物故復能走腸胃治病素問云心腹滿且食不能暮食名爲鼓脹治之以雞矢醴一劑知二劑已王

太僕註云本草雞矢並不治蠱脹但能利小便蓋蠱脹皆生于溼熱溼熱脹滿則小便不利雞尿能通利下泄則溼熱從小便而出蠱脹自愈故曰治溼不利小便非其治也本經主石淋利小便止遺溺者正此意耳轉筋者血熱也傷寒寒熱及消渴者熱在陽明也癥瘕者血熱壅滯肌肉也寒能總除諸熱故主之也日華子炒服治中風失音痰迷陳藏器

和黑豆炒酒浸服治賊風風痺蓋風為陽邪因熱而生雞屎寒能除熱雞本與風木之氣相通取其治本從類之義也

主治參互

普濟方雞矢醴治鼓脹且食不能暮食用臘月乾雞矢白半斤袋盛以酒醱一斗漬七日溫服三盃日三或為末服二錢亦得 積善堂經驗方治一切肚腹四肢腫脹不拘鼓脹

氣脹溼脹水脹等用乾雞矢一升炒黃以酒醅三碗煮一碗濾汁飲之少頃腹中氣大轉動利下卽自脚下皮皺消也未盡隔日再作

○雞子主除熱火瘡癩瘵卵白微寒療目熱赤痛除心下復熱止煩滿欬逆小兒下洩婦人產難胞衣不出醃漬之一宿療黃疸破大煩熱

疏○雞子稟生化最初之氣如混沌未分之

形故卵白象天其氣清其性微寒卵黃象地其氣濁其性微溫卵則兼清濁而爲體其味甘氣平無毒凡癩瘵皆火熱爲病雞子之甘能緩火之標平卽兼涼能除熱故主癩瘵及火瘡并治傷寒少陰咽痛神効

主治參互

醫方集成年深哮喘雞子略敲損浸尿缸中三四日煑食能去風痰 又方用頭生雞卵

七枚童便浸七日取出煮熟每日食一枚永  
不出痘 仲景苦酒湯治少陰病咽中傷生  
瘡痛不能語言聲不出者用半夏十四枚碎  
鷄子一枚去黃內入半夏苦酒令滿置刀環  
中安火上令三沸去滓少少含嚥之不瘥更  
作此方有神効 普濟方咽塞生瘡乾嘔頭  
痛食不下法同上無半夏 經驗秘方湯火  
燒灼雞子清和酒調洗勤洗止痛生肌 普

濟方塗面駐顏雞子一枚開孔去黃留白入  
金華臙脂及桑朮少許紙封與雞抱之俟別  
卵抱出以塗面洗之不落半年尚紅也 仲  
景方治少陰病得之二三日以上心中煩不  
得臥者用黃連黃芩芍藥阿膠雞子黃先煎  
三物成去滓膠烱盡小冷雞子黃攪勻溫服  
劉禹錫傳信方亂髮雞子膏治孩子熱瘡  
効見髮髮條下

○抱出卵殼研末磨障翳取其蛻脫之義也蘇頌又主傷寒勞復熬令黃黑爲末熱湯和一合服取汗出卽愈炒研細傅下疳亦妙卵中白皮主久欬氣結得麻黃紫苑和服之立止○臍脰裏黃皮微寒主洩利小便利遺溺除熱止煩

疏○此卽肫內黃皮一名雞內金是也肫是雞之脾乃消化水穀之所其氣通達大腸膀

胱二經有熱則洩痢遺溺得微寒之氣則熱除而洩痢遺溺自愈矣煩因熱而生熱去故煩自止也今世又以之治諸疳瘡多効

### 主治參互

醫林集要小便淋瀝痛不可忍雞肫內黃皮五錢陰乾燒存性作一服白湯下立愈 子母秘錄鵝口白瘡雞肫內黃皮爲末乳服半錢并可傅之 經驗方走馬牙疳雞肫內黃

皮不落水者五枚焙存性枯礬一錢研細搽并治陰頭疳蝕

雀卵味酸溫無毒主下氣男子陰痿不起強之令熱多精有子

疏○雀屬陽其氣溫味酸其性滌故能入下焦陰分能補煖兩腎夫人身兩腎左爲腎右爲命門左屬水爲陰右屬火爲陽天非此火不能生物人非此火不能有生又云陽生則

陰長可見命門真陽之氣乃人身生化之本也故命門衰敗則陰痿精寒絕化育之道雀卵性溫補煖命門之陽氣則陰自熱而強精自足而有子也溫主通行性又走下故主下氣也弘景云術家和天雄服之令莖大不衰孟詵云和天雄兔絲子末爲丸空心酒下五丸治男子陰痿女子帶下便溺不利除疝瘕以其有溫煖命門之功也肉味甘溫功用不

及卵

○雄雀屎療目痛決癰癩女子帶下溺不利除  
疝瘕一名白丁香一頭尖者是雄兩頭圓者是雌凡用研細甘草水浸一宿焙乾用  
疏○雀屎本經無氣味察其所主應是辛苦  
溫之物性善消散故外用療目痛決癰癩內  
服治帶下溺不利疝瘕也蘇恭以首生男子  
乳研雀屎成泥點目中弩肉赤脉貫瞳子者  
卽消神効蓋取其辛散拔出火毒之義也

主治參互

子母秘錄小兒中風口噤乳不下雀屎丸如  
麻子大服二丸卽愈 梅師方諸癰癩已成  
膿不肯決懼鍼者塗雀屎瘡頭卽易決 普  
濟方喉痺乳蛾白丁香二十箇以沙糖和作  
三丸每以一丸綿裏含嚥卽時遂愈甚者不  
過二丸極有奇効

簡誤

雀肉及卵陰虛火盛者忌之不可合李食妊婦食雀肉飲酒令子多滯凡服木人忌之雀屎療目痛非風熱外邪者不宜用女子帶下溺不利屬腎虛有火者並忌之古方同天雄服此藥性極熱有大毒非陰臟及真陽虛憊者慎勿輕餌

天鼠屎味辛寒無毒主面癰腫皮膚洗洗時痛腹中血氣破寒熱積聚除驚悸去面黥一名夜明沙

疏○天鼠夜出喜食蚊蚋故其屎中淘出細沙皆未化蚊蚋眼也所以今人主明目治目盲障翳取其氣類相從也其味辛寒乃入足厥陰經藥本經所主諸證總屬是經所發取其辛能散內外結滯寒能除血熱氣壅故也然主療雖多性有專屬明目之外餘皆可略  
主治參互

聖惠方青盲障翳夜明沙一兩栢葉炙一兩



爲末牛膽汁和丸梧子大每夜臥時竹葉湯  
下二十九丸 又方五瘡不止夜明沙末每冷  
茶服一錢立効并治胎前瘡除目疾外他用  
甚稀故不立簡誤

白鴿味鹹平無毒肉主辟諸藥毒及人馬久患  
疥又云煖無毒調精益氣治惡瘡疥并風瘙白  
癩癰瘍風

疏○白鴿稟木金之氣故其味鹹氣平無毒  
腎藏精腎納氣肺主皮毛鹹入腎故能調精  
益氣平則兼辛入肺故能主惡瘡疥及白癩  
癰瘍風凡毒藥之性多熱鴿得金水之氣故  
又能辟諸藥毒也其屎名左盤龍亦能主人  
馬疥瘡

主治參互

食鑿心鏡治消渴飲水不知足用白花鴿切  
作小片以土蘇煎含之嚙汁 瀟江方預辟

痘毒用白鴿卵一對入竹筒封置廁中半月  
取出以卵白和辰砂三錢丸菘豆大每服三  
十丸豆子飲送下毒從大小便出也 保命  
棗破傷中風病傳入裏用左盤龍白殭蠶各  
炒半錢雄黃一錢爲末蒸餅丸梧子大每服  
十五丸溫酒下取效 聖惠方頭痒生瘡白  
鴿屎五合醋煮三沸杵傳之日三上 又方  
頭瘡白禿鴿糞研末先以醋米泔洗淨敷之

簡誤

鴿本經雖云調精益氣其用止長於去風解  
毒然而未必益人故孟詵云食多減藥力今  
世勞怯人多畜養及煮食之殊未當也

神農本草經疏卷之二十

蟲魚部上品

總五十種今疏其要者十三種

石蜜

蜜蠟

牡蠣

龜甲

真珠

瑇瑁

桑螵蛸

石決明

文蛤

蠶魚

鯽魚

鱣

鯉魚膽

附肉鱗

石蜜味甘平無毒微溫主心腹邪氣諸驚癇瘧  
安五藏諸不足益氣補中止痛解毒除衆病和  
百藥養脾氣除心煩食飲不下止腸澼肌中疼  
痛口瘡明耳目久服強志輕身不饑不老延年  
神仙

瘧作瘧

疏○石蜜蜂採百花釀成故本經味甘氣平  
別錄微溫無毒得草木羣英之精華合露氣  
以釀成故其氣清和其味純甘施之精神氣

血虛實寒熱陰陽內外諸病罔不相宜經曰  
裏不足者以甘補之甘爲土化土爲萬物之  
母石蜜具天地間至甘之味故能安五藏諸  
不足及益氣補中除衆病也心經有熱則爲  
諸驚癇瘧得甘緩之氣則心火降煩熱除諸  
驚癇瘧平矣諸痛癢瘡瘍皆屬心火故又能  
止肌中疼痛及口瘡也甘主解毒故能和百  
藥甘主入脾故能養脾氣脾氣得所養而飲

食自下腸澀止矣五臟足氣血充則耳目聰明不饑不老輕身強志延年神仙所自來矣

主治參互

同蘆根汁梨汁人乳牛羊乳童便治噎膈大便燥結用此潤之有痰加竹瀝 煉熟和諸丸藥及膏子主潤五藏益血脈調脾胃通三焦塗火灼瘡能緩痛 仲景方蜜導煎治陽明病自汗小便反利大便鞭者用蜜二合銅

器中微火熬之候凝如飴狀至可丸乘熱捻作挺令頭銳大如指長寸半許候冷納穀道中少頃卽通也一法加皂角細末二分攪勻尤速 產書產後口渴用熟蜜不計多少熟水調服卽止 全幼心鑑痘疹作癢難忍抓成瘡及痂欲落不落百花香主之用上等石蜜不拘多少湯和時時以翎刷之効 肘後方天行虜瘡頭面及身須臾周匝狀如火瘡

皆戴白漿隨決隨生不卽癢數日必死差後  
瘡癥黯色一歲方滅此惡毒之氣深入也用  
蜜入升麻煎過數數拭之

簡誤

石蜜雖稱補五藏益脾胃然而生者性寒滑  
能作泄大腸氣虛完穀不化者不宜用嘔家  
酒家不宜用中滿蠱脹不宜用溼熱脚氣不  
宜用生者有小毒尤不宜食青赤酸者食之

令人心煩不可與生葱同食害人若與萵苣  
同食令人利下食蜜飽後不可食鮓令人暴  
亡

蜜蠟味甘微溫無毒主下痢膿血補中續絕傷  
金瘡益氣不饑耐老 白蠟療久洩澼後重見  
白膿補絕傷利小兒久服輕身不饑

疏○蠟石蜜之凝結於底者也蜜性緩質柔  
故主潤臟腑經絡蠟性澇質堅故能療久痢

洩澀後重下膿血也甘能益血補中溫能通行經脉故主續絕傷及金瘡也中得補則氣自益故久服能不饑輕身耐老也男子女人大小內外皆可施而別錄獨云利小兒者非也

主治參互

得象牙末等能去漏管長肉見象牙條下得膩粉真珠末黃檗末龍腦香鉛丹蛙竹屑

葱白猪脊髓治陰蝕惡瘡 同孩兒茶鉛丹胡粉水龍骨粉霜龍骨黃檗猪膽汁炙猪脂作膏治內外腫瘡久不愈 金匱方調氣飲治赤白痢少腹痛不可忍後重或面青手足俱變者用黃蠟三錢阿膠三錢同溶化入黃連末五錢攪勻分三次熱服神効 千金方膠蠟湯治熱痢及婦人產後下痢用蠟二碁子大阿膠二錢當歸二錢半黃連三錢黃檗

一錢陳廩米半升水三升煮至一升去米入藥煎至一鍾溫服神効

簡誤

火熱暴痢不宜用

牡蠣味鹹平微寒無毒主傷寒寒熱溫瘧洒洒驚恚怒氣除拘緩鼠瘦女子帶下赤白除雷熱在關節榮衛虛熱去來不定煩滿止汗心痛氣結止渴除老血滯大小腸止大小便療洩精喉

痺咳嗽心脇下痞熱久服強骨節殺邪鬼延年

貝母爲之使得甘草半膝遠志蛇牀子良惡麻黃細辛吳茱萸

疏○牡蠣得海氣結成故其味鹹平氣微寒無毒氣薄味厚陰也降也入足少陰厥陰少陽經其主傷寒寒熱溫瘧洒洒驚恚怒氣留熱在關節去來不定煩滿氣結心痛心脇下痞熱等證皆肝膽二經爲病二經冬受寒邪則爲傷寒寒熱夏傷於暑則爲溫瘧洒洒邪



伏不出則熱在關節去來不定二經邪鬱不散則心脇下痞熱邪熱甚則驚恚怒氣煩滿氣結心痛此藥味鹹氣寒入二經而除寒熱邪氣則榮衛通拘緩和而諸證無不瘳矣少陰有熱則女子爲帶下赤白男子爲洩精解少陰之熱而能斂潛精氣故主之也鹹屬水屬陰而潤下善除一切火熱爲病故又能止汗止渴及鼠瘦喉痺咳嗽也老血者宿血也

鹹走血而軟堅所以主之其性收斂故能潛大小腸止大小便利也腎主骨入腎益精則骨節自強邪本因虛而入肝腎足則鬼邪自去人以腎爲根本根本固則年自延矣更能止心脾氣痛消疝瘕積塊癭瘤結核脇下堅滿等證皆寒能除熱鹹能軟堅之功也

主治參互

同生地黃黃耆龍眼五味子酸棗仁麥門冬

白芍藥伏神黃檗當歸治心腎虛盜汗 同  
黃檗五味子地黃山茱萸枸杞子車前子沙  
苑蒺藜蓮鬚杜仲治夢遺泄精加牛膝則兼  
治赤白濁 同地黃黃檗阿膠木耳炒黑香  
附白芍藥地榆麥門冬續斷青蒿鼈甲蒲黃  
止婦人崩中下血及赤白帶下 仲景方同  
龍骨入柴胡桂枝各湯內取其收斂浮越之  
陽氣固脫而鎮驚更能除胸脇中痞硬一藏

器方同麻黃根蛇牀子爲粉去陰汗 本事  
方虛勞盜汗牡蠣粉麻黃根黃耆等分爲末  
每服二錢水煎服 仲景金匱玉函方傷寒  
傳成百合病如寒無寒如熱無熱欲臥不臥  
欲行不行欲食不食口苦小便赤色得藥則  
吐變成渴疾久不瘥者用牡蠣煨二兩栝樓  
根二兩爲細末每服方寸匕用米飲調下日  
三服 古今錄驗方水病囊腫牡蠣粉二兩

乾姜炮一兩研細冷水調稠掃上須臾囊熱如火乾則再上小便利卽愈一方用葱汁白麵同調小兒不用乾姜 經驗方男女瘰癧用牡蠣粉四兩玄參末三兩甘草一兩麵糊丸梧子大每三十九酒下日三服服盡除根不拘已破未破皆効 普濟方月水不止牡蠣煨研細米醋搜成團再煨研末以米醋調艾葉末熬膏丸梧子大每用醋湯下四五十

丸

簡誤

凡病虛而多熱者宜用虛而有寒者忌之腎虛無火精寒自出者非宜

龜甲味鹹甘平有毒主漏下赤白破癥瘕痰癧五痔陰蝕溼痺四肢重弱小兒顛不合頭瘡難燥女子陰瘡驚恚氣心腹痛不可久立骨中寒熱傷寒勞復或肌體寒熱欲死以作湯良久服

輕身不饑益氣資智亦使人能食勿令中溼中溼卽有毒

疏○介蟲三百六十而龜爲之長稟金水之氣故味鹹而甘氣平其性神靈能變化凡入藥勿令中溼中溼則遂其變化之性而成癥瘕於腹中故言有毒也氣味俱陰入足少陰經方家多入補心藥用以心藏神而龜性有神借其氣以相通且得水火旣濟之義實非

補心之正藥也其主骨中寒熱及傷寒勞復肌體寒熱欲死痲瘡者皆陰虛而邪熱爲病經曰傷於溼者下先受之溼痺四肢重弱亦腎陰虛而邪氣易犯腎主骨腎虛則小兒顛門不合腎爲五臟陰中之陰陰虛則火熱偏至而爲驚恚氣心腹痛此藥補腎家之真陰則火氣自降而寒熱邪氣俱除矣益陰除熱軟堅故主漏下赤白癥瘕五痔陰蝕陰瘡及

小兒頭瘡也經曰邪熱不殺穀熱去故令人能食能食則脾胃得所養而能思思作睿故資智久服益氣輕身不饑者除熱益陰之功也

主治參互

丹溪方補陰丸用龜下甲酒炙熟地黃蒸曬各六兩黃檗知母各四兩爲末以猪脊髓和九梧子大每百九空心溫酒下 摘玄方治

產三五日不下垂死及短小女子交骨不開者用乾龜殼一箇酥炙頭髮一握燒灰川芎當歸各一兩爲末和勻每服七錢水煎服如人行五里許再一服生胎死胎俱下

簡誤

按龜鼈二甲本經所主大畧相似今人有喜用鼈甲惡用龜甲者有喜用龜甲惡用鼈甲者皆一偏之見也二者咸至陰之物鼈甲走

肝益腎以除熱龜甲通心入腎以滋陰第鼈甲無毒可多用龜甲非千年自死者則有毒故方書所用曰敗龜板者取其長年則得陰氣多故有益陰之功用耳若今新剖之甲斷乎有毒不宜頻使用者不可不詳辨也妊婦不宜用病人虛而無熱者不宜用凡入藥須研極細不爾留滯腸胃能變癥瘕也

真珠寒無毒主手足皮膚逆臚鎮心綿裹塞耳主聾傳面令人潤澤好顏色粉點目中主膚腎障膜

疏○珠稟太陰之精氣而結故中秋無月則蚌無胎其體光明其性堅硬大小無定要以新完未經鎖綴者爲上味甘微鹹氣寒無毒入手少陰足厥陰經心虛有熱則神氣浮越肝虛有熱則目生膚腎障膜除二經之熱故能鎮心去目中障腎也耳聾本屬腎虛有熱

所以主之逆臚者臚脹也胸腹脹滿氣逆以及於手足皮膚皆腫也經云諸溼腫滿屬脾土又云諸腹脹大皆屬於熱此因脾虛有熱兼有積滯所致真珠味甘亦能益脾氣寒能除熱體堅能磨積消滯故主手足皮膚逆臚也古人未發斯義所以方書叙論不詳亦爲闕略也珠藏於澤則川自媚况塗面寧不令人潤澤好顏色乎凡小兒驚熱風癇爲必須

### 之藥

#### 主治參互

同丹砂牛黃犀角天竺黃茯神遠志釣藤鈎  
琥珀金箔治小兒驚癇風熱大人失志癲狂  
等證 同爐甘石龍腦香白鵬砂空青人爪  
點目能去腎障 同鍾乳石象牙末牛黃冰  
片白殭蠶紅鉛天靈蓋蛙竹屑樺皮灰沒藥  
明礬治廣瘡結毒及陰蝕瘡有奇効 同人

中白黃檗青黛鵬砂和冰片少許治口疳加入雞內金膩粉治下疳 格古論灰塵迷目用大珠挹之則消 千金方婦人難產或胞衣不下真珠末一兩酒服立出 聖惠方肝虛目暗真珠末一兩白蜜二合鯉魚膽二枚和合銅器煎至減半新綿濾過瓶盛頻點取 瘡 痘瘡發疔毒方見穀部豌豆下

簡誤

真珠體最堅硬研如飛麵方堪服食不細能傷人臟腑病不由火熱者勿用

瑇瑁寒無毒主解嶺南百藥毒 一名玳瑁

疏○瑇瑁龜類也得水中至陰之氣故氣寒無毒而解一切熱毒其性最靈凡遇飲食有毒則必自搖動然須用生者乃靈死者則不能矣嶺南人善以諸毒藥造成蠱人中之則昏憤悶亂九竅流血而死惟用活瑇瑁刺其



血飲或生者磨濃汁服之可解日華子主破  
癥結消癰腫止驚癇陳士良主心風解煩熱  
行氣血利大小腸以其性稟純陰氣味至寒  
故治如是等病也又能解痘毒神効

主治參互

楊氏產乳方解一切蠱毒生玳瑁磨濃汁服  
一蓋即消 靈苑方預解痘毒遇時行痘癩  
服此未發內消已發稀少用生玳瑁生犀角

各磨濃汁一合和勻溫服半合日三最良  
聞人規痘癩論痘癩黑陷乃心熱血凝也法  
同上加入猪心血少許紫草汁五匙和勻溫  
服 鴻飛集迎風目淚乃肝腎虛熱也用生  
玳瑁羚羊角各一兩石燕一雙爲末每一錢  
薄荷湯下日二服

簡誤

痘瘡虛寒不起發者不宜服

桑螵蛸味鹹甘平無毒主傷中疝瘕陰痿益精  
生子女子血閉腰痛通五淋利小便水道又療  
男子虛損五臟氣微夢寐失精遺溺久服益氣  
養神二月三月採蒸之當火炙不爾令人洩

疏○桑螵蛸桑樹上螳螂子也稟秋金之陰  
氣兼得桑木之津液本經味鹹氣平別錄甘  
無毒氣薄味厚陰也入足少陰太陽經人以  
腎爲根本男子腎經虛損則五臟氣微或陰

痿夢寐失精遺溺鹹味屬水內合於腎腎得  
之而陰氣生長故能愈諸疾及益精生子也  
腎與膀胱爲表裏腎得所養則膀胱自固氣  
化則能出故利水道通五淋也女子屬陰肝  
腎用事疝瘕血閉腰痛皆二經爲病鹹能益  
陰入血軟堅是以主之甘能補中故主傷中  
益氣腎足則水自上升克與心交故能養神  
也

主治參互

外臺秘要虛勞盜汗遺精白濁桑螵蛸炙白  
 龍骨等分為細末每服二錢空心鹽湯下  
 寇宗奭方桑螵蛸散治男子房勞小便日數  
 十次如稠米泔心神恍惚瘦瘁食減其藥安  
 神魂定心志治健忘補心氣止小便數用桑  
 螵蛸遠志龍骨菖蒲人參茯神當歸龜甲各  
 如法製各一兩為末臥時人參湯調下二錢

千金翼婦人遺尿桑螵蛸酒炒為末白湯  
 服二錢兼治胎前產後遺尿不禁

簡誤

桑螵蛸氣味雖鹹平走腎利水道然得秋時  
 收斂之氣凡失精遺溺火氣太盛者宜少少  
 用之

石決明味鹹平無毒主目障腎痛青盲久服益  
 精輕身凡用以麵裹煨熟磨去粗皮搗細如飛  
 麵方堪入藥一名千里光得龍骨療洩

精畏旋  
覆花

疏○石決明得水中之陰氣以生故其味鹹  
氣應寒無毒乃足厥陰經藥也足厥陰開竅  
於目目得血而能視血虛有熱則青盲赤痛  
障瞖生焉鹹寒入血除熱所以能主諸目疾  
也鹹寒又能入腎補陰故久服益精輕身也  
研細水飛主點外障翳

主治參互

得甘菊花生地黃木賊草穀精草羚羊角人  
爪蟬蛻空青蜜蒙花決明子夜明沙治青盲  
障瞖 明目集驗方羞明怕日用千里光甘  
菊花甘草各二錢水煎冷服 鴻飛集痘後  
目瞖用石決明火煨研谷精草各等分爲細  
末以豬肝蘸食 目疾外他用甚稀故無簡  
誤

文蛤味鹹平無毒主惡瘡蝕五痔欬逆胸痺腰

痛脇急鼠瘦大孔出血崩中漏下

疏○文蛤卽花蛤大小背上有班文得陰水之氣故其味鹹氣平無毒經曰硬則氣堅鹹以軟之文蛤之鹹能消散上下結氣故主欬逆胸痺腰痛脇急也惡瘡蝕五痔鼠瘦大孔出血崩中漏下皆血熱爲病鹹平入血除熱故主之也更能止煩渴化痰利小便

主治參互

仲景方傷寒在陽當以汗解反以冷水噴之或灌之其熱被却不得去更益煩熱皮上粟起欲飲水反不渴者文蛤散上之文蛤五兩爲末每服方寸匕沸湯下甚効 千金翼疔蝕口鼻數日欲盡文蛤燒灰以臘猪脂和塗之

簡誤

病屬邪熱痰結者宜之氣虛有寒者不得用

蠡魚味甘寒無毒主溼痺面目浮腫下大水療五痔有瘡者不可食令人癩白

疏○蠡魚稟北方玄水之精得中央陰土之氣故其色黑味甘氣寒無毒乃益脾除水之要藥也土虛則水泛濫土堅則水自清凡治浮腫之藥或專於利水或專於補脾其性各自爲用惟蠡魚色黑象水能從其類以導橫流之勢味甘上化能補其不足以遂敦阜之

性補瀉兼施故主下大水及溼痺面目浮腫有神効也五痔因溼熱所生水去則溼氣自除今世俗小兒痘後咸食之然而早食多食能令皮膚癩痕皆黑本草獨云有瘡者食之令人癩白非也孟詵主下大小便壅塞氣作鱸與脚氣風氣人食良蘇頌主妊娠有水氣竝取其除溼下水益脾之功也

主治參互

同白朮茯苓橘皮姜皮煮食下水腫大効  
與蒜作鱠食能去溼下水食醫心鏡治十種  
水氣垂死蠶魚一斤重者煮汁和冬瓜葱白  
作羹食 靈苑方喉痺將死者以蠶魚膽點  
入少許卽差病深者水調灌之諸魚膽皆苦  
惟此膽甘可食爲異耳

簡誤

蠶魚其功專於去溼下水他用無所長且多

食能發痼疾不可不知也

鯽魚合蓴作羹主胃弱不下食作鱠主久赤白  
痢燒灰塗諸瘡或取猪脂煎用又主腸癰

疏○鯽魚稟土氣以生故其味甘其氣溫無  
毒是以能入胃治胃弱不下食入大腸治赤  
白久痢腸癰脾胃主肌肉甘溫能益脾生肌  
故主諸瘡久不瘥也藏器主虛羸大明主溫  
中下氣孟詵云調中益五臟表其益脾和胃

之功也

主治參互

百一選方腸風下血用活鯽魚一大尾去腸  
留鱗入五倍子末填滿泥固煨存性爲末酒  
服一錢一方入白礬末二錢外以櫻包更以  
紙裹煨存性研末每二錢米飲下 經驗方  
膈氣吐食用大鯽魚去腸留鱗切大蒜片填  
滿腹紙包十重泥固曬半乾炭火煨熟單取

肉用和平胃散一兩杵九梧子大密藏每服  
三十九米飲下

簡誤

鯽魚調胃實腸與病無礙諸魚之中惟此可  
常食但不宜與沙糖同食生疔蟲同芥菜食  
成腫疾同猪肝雞肉雉肉鹿肉食生癰疽同  
麥門冬食害人

鯽味甘大溫無毒主補中益血療瀝唇



疏○鱣魚得土中之陽氣以生故其味甘氣大溫甘溫具足所以能補中益血甘溫能通經脉療風邪故又主藩唇及今人用之以治口眼喎斜也

主治參互

與黃耆同食能益氣力 治火丹赤腫生鱣

血塗之効

簡誤

性熱而補凡病屬虛熱者不宜食時行病後食之多復過食動風氣兼令人霍亂  
鯉魚膽味苦寒無毒主目熱赤痛青盲明目久服強悍益志氣

疏○凡膽皆苦寒走厥陰故鯉魚膽亦主明目及目熱赤痛青盲也肝為將軍之官腎為作強之官二經有熱則虛怯志氣衰苦寒除二經之熱故久服強悍益志氣也

○鯉魚肉味甘主欬逆上氣黃疸止渴生者主水腫脚滿下氣

疏○鯉魚稟陰極之氣故其鱗三十六陰極則陽復故素問言魚熱中其氣味雖甘平然多食能令人發風熱也甘可以緩故主欬逆上氣止渴陰中有陽能從其類以導之故能利小便使黃疸水腫脚氣俱消也河間云鯉之治水因其氣以相感者是矣

主治參互

外臺秘要治水腫用大鯉一尾赤小豆一升水二斗煮可二升餘濾去滓頓服盡當下利利盡卽瘥并治妊娠水腫有神効

○鱗主產婦腹痛燒灰酒服亦治血氣雜諸藥用之

疏○魚鱗得水中之陽氣而鱈魚鱗則又稟陰極生陽之數性能入血散滯入血者陰之

用也散滯者陽之用也故主婦人產後腹痛及血氣不和等證

主治參互

和劑局方烏金散治產後血迷血暈敗血不止淋瀝不斷臍腹疼痛及崩中下血過多不止鯉魚鱗燒血竭百草霜亂髮灰松墨煨酢淬延胡索當歸赤芍藥等分爲末每二錢溫酒下 外臺秘要古今錄療魚鰓骨橫喉中

六七日不出取鯉魚鱗皮燒作屑以水服之卽出未出再服

簡誤

六陰已極陽氣初生故能發熱動風風熱病者不宜食天行病後下痢及有宿癥者俱不可食不宜合犬肉葵菜食服天門冬硃砂人不可食凡炙鯉魚不可使烟入目損目光三日內必驗也前和劑局方烏金散方內有肉

桂當歸延胡索赤芍藥皆行血之藥而其所以  
主病內開載崩中下血過多不止用之則大  
誤矣慎之慎之

神農本草經疏卷之二十五

神農本草經疏卷之二十一

蟲魚部中品

總五十六種今疏其要者一十七種

蝟皮

露蜂房

鼈甲

蟹

蟬蛻

烏賊魚骨

原蠶蛾

蠶沙附

蠶退

白殭蠶

鰻鱺魚

蛞蝓

蝟牛并入

蜚蠊

麀蟲

青魚膽

石首魚

鱸魚

蝟皮味苦平無毒主五痔陰蝕下血赤白五色  
血汗不止陰腫痛引腰背酒煮殺之又療腹痛  
疝積亦燒為灰酒服之

得酒良畏桔  
梗麥門冬

疏○蝟鼠類屬水其皮毛戟刺如鍼屬金故  
味苦平平即兼辛大腸屬金以類相從故能  
治大腸溼熱血熱為病及五痔陰蝕下血赤  
白五色血汗不止也陰腫痛引腰背腹痛疝

積皆下焦溼熱邪氣留結所致辛以散之苦  
以泄之故主之也肉味甘平能開胃氣止反  
胃亦主痔瘻腸風

主治參互

同象牙末等治通腸漏見象牙條下 衍義  
五痔下血用蝟皮穿山甲等分燒存性入肉  
豆蔻一半空心米飲下一錢妙 楊氏家藏  
方腸風下血蝟皮一枚木賊草半兩炒黑為

末每二錢熱酒調下

簡誤

凡食其肉當去骨誤食令人瘦劣諸節漸小也

露蜂房味苦鹹平有毒主驚癇瘈瘲寒熱邪氣癩疾鬼精蠱毒腸痔火熬之良又療蜂毒毒腫疏○蜂性有毒螫人則痛極以其得火氣之甚也故蜂房味苦氣平性亦有毒別錄言鹹

當作辛鹹辛散苦泄鹹可軟堅故主驚癇瘈瘲寒熱邪氣癩疾鬼精蠱毒腸痔等證也療蜂毒毒腫者取其氣類相從以毒攻毒之義也蘇恭以亂髮蛇皮三物合燒灰酒服方寸匕治惡疽附骨癰根在臟腑歷節腫出丁腫惡脉諸毒大明煎水漱齒止風蟲疼痛洗乳癰蜂疔惡瘡皆取其攻毒散邪殺蠱之功耳

主治參互

子母秘錄臍風溼瘡久不瘥者蜂房燒末傳  
之効 袖珍方風蟲牙痛蜂房一枚鹽寶孔  
內燒過研末擦之鹽湯漱去一方同細辛煎  
水漱之 又方喉痺腫痛露蜂房灰白殭蠶  
等分爲末吹入喉內或用乳香湯服半錢  
濟衆方女人妬乳乳癰汁不出內結成腫名  
妬乳用蜂房燒灰研末每服二錢水一盞煎  
六分去滓溫服 經驗方治漏痔蜂房燒存

性研細摻之乾則菜油調傅

簡誤

蜂房主驚癇瘵癢及諸癰疽惡毒正取其攻  
散邪惡以毒攻毒之意若病屬氣血虛無外  
邪者與夫癰疽潰後元氣之竭者皆不宜服  
鼈甲味鹹平無毒主心腹癥瘕堅積寒熱去痞  
息肉陰蝕痔惡肉療溫瘧血瘕疔痛小兒腸下  
堅 肉味甘主傷中益氣補不足 惡馨石



疏○鼈甲全稟天地至陰之氣故其味鹹平  
無毒潤下作鹹象水剛矣本乎地者親下益  
陰何疑甲主消散者以其味兼乎平平亦辛  
也鹹能軟堅辛能走散故本經主癥瘕堅積  
寒熱去痞疾息肉陰蝕痔核惡肉別錄療溫  
瘧者以瘧必暑邪為病類多陰虛木衰之人  
乃為暑所深中邪入陰分故出併於陽而熱  
甚入併於陰而寒甚元氣虛羸則邪陷而中

焦不治甚則結為瘧母甲能益陰除熱而消  
散故為治瘧之要藥亦是退勞熱在骨及陰  
虛往來寒熱之上品血癥腰痛小兒脇下堅  
皆陰分血病宜其悉主之矣勞復女勞復為  
必須之藥勞瘦骨蒸非此不除產後陰脫資  
之尤急

主治參互

仲景鼈甲煎丸治瘧母之要藥 得牛膝當

歸佐以橘皮何首烏知母麥門冬治久瘧  
 同知母石膏麥門冬貝母竹葉治溫瘧熱甚  
 渴甚無肺熱病者加人參若瘧發熱甚渴甚  
 又寒甚汗多發時指甲黯狀若欲死并加桂  
 枝有神去桂枝治瘧瘧良 得青蒿麥門冬  
 五味子地黃枸杞牛膝治骨蒸勞熱甚則加  
 銀柴胡地骨皮胡黃連 肉桂傷中益氣補  
 不足腹中結熱婦人漏下陰虛羸瘦性冷補

一切陰虛人宜常食之

簡誤

鱉甲妊娠禁用凡陰虛胃弱陰虛泄瀉產後  
 泄瀉產後飲食不消不思食及嘔惡等證咸  
 忌之

蟹味鹹寒有毒主胸中邪氣熱結痛喘僻面腫  
 敗漆燒之致鼠解結散血愈漆瘡 養筋益氣  
 爪主破胞墮胎

疏○蟹稟水氣以生故其味鹹氣寒本經雖云有毒然今人多食之卒無害其有毒者大抵形質怪異如後文所載諸種始有大毒耳外骨內肉陰包陽也入足陽明足厥陰經經曰熱淫于內治以鹹寒故主胸中邪氣熱結痛也喎僻者厥陰風熱也面腫者陽明熱壅也解二經之熱則筋得養而氣自益喎僻面腫俱除矣鹹走血而軟堅故能解結散血漆

得蟹則化爲水燒之可集鼠于庭此物性之相感相制莫能究其義也愈漆瘡者以其能解漆毒故也爪性迅利故能破胞墮胎也

### 主治參互

日華子產後肚痛血不下者以酒食之筋骨折傷者生搗炒罾之 陳藏器續斷絕筋骨去殼同黃搗爛微炒納入瘡上筋卽連也 寇宗奭小兒解顱不合以蟹螯同白及末搗

塗以合爲度 唐瑤經驗方骨節離脫生蟹  
搗爛以熱酒傾入連飲數碗 查塗半日內  
骨肉谷谷有聲卽好 董炳驗方中鱒魚毒  
食蟹卽解 胡洽方治孕婦僵仆胎上捨心  
有蟹爪湯 千金方神造湯治子死腹中或  
雙胎一死一生服之令死者出生者安神驗  
用蟹爪一升甘草二尺東流水一斗以葦薪  
煮至二升濾去滓入真阿膠三兩令烱頓服

或分二服若人困不能服者灌入卽活

### 簡誤

蟹性冷能散血熱爲病故跌撲損傷血熱瘀  
滯者宜之若血因寒凝結與夫脾胃寒滑腹  
痛喜熱惡寒之人咸不宜食有獨螯獨目兩  
目相向六足四足腹下有毛腹中有骨頭背  
有星點足斑目赤者竝有毒 可食能害人  
被其毒者冬瓜汁紫蘓蒜豉蘆根汁皆可解

之不可與柿及荆芥食發霍亂動風木香汁  
可解

蟬殼味鹹甘寒無毒主小兒痢女人生子不出

灰服之主久痢

一名枯蟬一名金牛兒凡用洗去泥并去翅足漿水煮晒乾用

疏○蟬稟水土之餘氣化而成形其飛鳴又  
得風露之清氣故能入肝祛風散熱如藥性  
論主小兒壯熱驚癇是矣其主婦人生子不  
下者取其蛻脫之義治久痢者以其有甘寒

之功也其鳴清響能發音聲其性善蛻能脫  
翳障其體輕浮能發瘡癬其味甘寒能除風  
熱故陳藏器主啞病寇宗奭主目昏障翳小  
兒瘡癬出不快及今人治頭風眩暈皮膚風  
熱痘癩作痒疔腫毒瘡大人失音小兒噤風  
天疔驚哭夜啼等證皆以其有如上諸功能  
也

主治參互

同羚羊角蜜蒙花白蒺藜草决明木賊草穀  
精草甘菊花夜明沙生地黃蓮女貞實治  
目盲障翳 同丹砂茯神真珠牛黃蠶蠶天  
竺黃釣藤鈎犀角琥珀全蝎治小兒風熱急  
驚癇病 同犀角生地黃紫草麥門冬連翹  
金銀花治痘瘡血熱出不快 同石膏鼠黏  
子赤檉木薄荷玄參甘草葛根栝樓根麥門  
冬治大人小兒痧癘 普濟方治小兒夜啼

不止狀若鬼祟以蟬蛻下半截爲末每一字  
釣藤湯調下或入辰砂少許亦可并治天中  
驚啼 全幼心鑑痘瘡作癢蟬蛻三七枚炙  
甘草各一錢水煎服 錢氏方痘後目翳蟬  
蛻爲末每一錢羊肝煎湯下日二服 和劑  
局方蟬花散治肝經蘊熱風毒之氣內搏上  
攻眼目赤腫腎膜疼痛昏濇 外障翳咸治  
之用蟬蛻穀精草刺蒺藜甘菊花防風草决

明蜜蒙花甘草羌活黃芩蔓荊子川芎木賊  
草荊芥等分爲末每二錢茶調食後臨臥  
各一服

簡談

痘疹虛寒證不得服

烏賊魚骨味鹹微溫無毒主女子漏下赤白經  
汁血閉陰蝕腫痛寒熱癥瘕無子驚氣入腹腹  
痛環臍陰中寒腫令人有子又止瘡多膿汁不

燥一名海螵蛸一名墨魚

盧若論血枯舉太素云此得之年少時大脫血而成又舉子死腹中穢物不消又舉犯月水入房精與積血相射入於任脉留於胞中古人謂之積元豐中雄州陳邦濟收一方治積精及惡血淹留胞冷絕娠驗者甚多其意與內經相近烏賊魚骨本治漏下經汁不斷商茹

疏○烏賊魚骨稟水中之陽氣以生故其味鹹氣微溫無毒入足厥陰少陰經厥陰爲藏血之臟女人以血爲主虛則漏下赤白或經汁血閉寒熱癥瘕少陰爲藏精之臟主隱曲之地虛而有溼則陰蝕腫痛虛而寒客之則陰中寒腫男子腎虛則精竭血女子子肝傷則血枯無孕鹹溫入肝腎通血脉而祛寒溼

本草經疏卷二十一

綠君亭

去淹留惡血古人  
用此皆本草法

則諸證除精血足令人有子也其主驚氣入  
腹腹痛環臍者蓋肝屬木主怒驚入肝膽則  
榮氣不和故腹痛環臍也入肝膽舒榮氣故  
亦主之溫能燥溼故又主瘡多膿汁也按素  
問云有病胸脇支滿者妨于食病至則先開  
腥臊臭出清液先唾血四肢清目眩時時前  
後血病名曰血枯得之年少時有所大脫血  
或醉入房中氣竭肝傷故月事衰少不來治

之以四烏鯁骨一慮茹爲末丸以雀卵大如  
小豆每服五丸飲以鮑魚汁所以利腸中及  
傷肝也觀此則其入厥陰血分爲女人崩漏  
下血之要藥可知矣

主治參互

聖惠方赤白目翳用烏鯁骨一兩去皮爲末  
入片腦少許點之 澹寮方心耳出膿海螵  
蛸半錢麝香一字爲末以綿杖絞淨吹入



聖惠方小兒臍瘡出血及膿海螵蛸乾臙脂  
爲末油調搽之 聖濟總錄鰓在喉烏賊  
魚骨橘紅焙等分爲末寒食麩和錫丸芡子  
大每一丸含化 簡便單方舌腫出血不止  
烏賊骨蒲黃各等分炒爲末塗之

簡談

其氣味鹹溫血病多熱者勿用

原蠶蛾雄者有小毒主益精氣強陰道交接不

倦亦止精

疏○原蠶蛾乃是晚蠶第一番出者其子再  
復出者爲二蠶此一蠶之種其蛾性最淫出  
繭便媾味鹹氣溫熱故能強陰益精令交接  
不倦也日華子主壯陽事止泄精尿血暖水  
臟蓋取其性淫助陽鹹溫入腎之功耳

主治參互

千金方丈夫陰痿不起未連蠶蛾二升去頭

趨足炒爲末蜜丸梧子大每夜服一九可御  
十女以菖蒲酒止之 聖濟錄玉枕生瘡  
生枕骨上如癰破後如筋頭用原蠶蛾炒石  
葦等分爲末乾貼瘡

簡誤

少年陰痿由于失志者不宜用陰虛有火者  
咸忌之

○蠶屎溫無毒主腸鳴熱中消渴風痺癰瘰原

蠶屎

疏○原蠶沙卽晚蠶所出屎也其味辛甘氣  
溫無毒腸鳴者水火相觸也甘以和之消渴  
者中氣燥熱也辛以潤之蠶屬火其性燥燥  
能勝溼去風故其沙主療風溼之病如陳藏  
器以之炒黃袋盛浸酒去風緩諸節不隨皮  
膚頑痺腹內宿冷瘕血腰脚疼炒熱熨偏  
風筋骨癱緩手足不隨等證

主治參互

寇氏法治諸風冷用醇酒三斗拌蠶沙五斗  
甑蒸于煖室中鋪油單上令患風冷氣痺及  
近感癱風人就以患處一邊臥沙上厚蓋取  
汗若虛人須防大熱昏悶令露頭面如未全  
愈間日再作 聖惠方風癢癭癩作痒成瘡  
用蠶沙一升水五斗煮取二斗去滓洗滌避  
風 儒門事親婦人血崩蠶沙為末酒服三

五錢

簡誤

癱緩筋骨不隨由于血虛不能榮養經絡而  
無風溼外邪侵犯者不宜服

蠶退主血風病益婦人一名馬明退

近世醫家多用初出

蠶子設在紙上者東方諸醫用老蠶眠起所  
蛻皮功用雖相近當以蛻皮為正用之微炒

疏○蠶退如蟬蛻蛇蛻之類因其本質以  
為用蠶退得蠶氣之餘故能治血風病血熱

則生風婦人以血為主故尤益婦人也近世以之療痘疹去目中翳障其法猶蟬蛻也

主治參互

集驗方走馬牙疳用蠶退紙灰入麝香少許貼之并治口瘡 又方治纏喉風蠶蛻紙燒存性蜜丸芡實大含化嚥津 蠶已出蛾取退煨存性為末服之能排膿穿毒瘡口

簡誤

婦人血虛無風溼者不宜用

白僵蠶味鹹辛平無毒主小兒驚癇夜啼去三蟲滅黑黥令人面色好男子陰瘍作瘡病女子崩中赤白產後餘痛滅諸瘡癩痕

疏○蠶屬陽而僵者又兼金木之化本經味鹹別錄辛平無毒然詳其用應是辛勝鹹劣氣微溫之藥也氣味俱薄浮巧升陽也入足厥陰手太陰少陽經厥陰為風木之位主藏

血小兒驚癇夜啼女子崩中赤白風熱乘肝  
臟也產後餘痛風寒入血分也辛能祛散風  
寒溫能通行血脉故主如上諸證也肺主皮  
毛而風邪客之則面色不光潤辛溫入肺去  
皮膚諸風故能滅黑黥及諸瘡癩痕令人面  
色好也男子陰瘍風溼浸淫也辛平能散風  
熱兼能燥溼是以主之三蟲亦溼熱所化故  
又能去三蟲也藥性論治口噤發汗日華子

主中風失音一切風疰小兒客忤男子陰痒  
痛女子帶下蘇頌治風喉痺欲絕元素主皮  
膚諸風如蟲行皆取其性屬陽風熱爲陽邪  
能入皮膚經絡發散諸邪熱氣也

主治參互

同丹砂牛黃膽星全蝎麝香釣藤鈎犀角金  
箔天竺黃蟬蛻治小兒急驚客忤 仁存方  
開關散治急喉風痺用白僵蠶炒白礬半生

半燒等分爲末每以一錢用竹瀝加姜汁調灌得吐頑痰立効小兒加薄荷一方用白梅和丸綿裹含之 聖惠方小兒撮口噤風面黃赤氣喘啼聲不出由胎氣挾熱流毒心脾故令舌強唇青撮口發噤用白殭蠶二枚去嘴畧炒爲末蜜調傅唇中甚効 普濟方治大人頭風及小兒驚風並用大蒜七箇先燒紅地以蒜逐箇于地上磨成膏却以殭蠶一

兩去頭足安蒜上碗覆一夜勿令泄氣只取殭蠶研水每用啼鼻口內含水有効 又方治腹內龜病詩云人間龜病不堪言肚裏生成硬似磚自灰殭蠶白馬溺不過時刻軟如綿 藥性論滅諸瘡癩痕白殭蠶衣魚鷹屎白等分傅之 聖惠方癩瘡風瘡疼痛白殭蠶焙研酒服一錢立瘥 小兒宮氣方小兒口瘡通白者白殭蠶炒爲末蜜和傅之効兼

治風疔蝕瘡

簡誤

疆蠶性辛溫辛能散其功長于祛風化痰散  
有餘之邪凡中風口噤小兒驚癇夜啼由於  
心虛神魂不寧血虛經絡勁急所致而無外  
邪爲病者忌之女子崩中產後餘痛非風寒  
客入者亦不宜用今世治小兒驚風不問虛  
實一概混施誤甚誤甚

鰻鱺魚味甘有毒主五痔瘡瘦殺諸蟲

疏○鰻鱺魚稟土中之陰氣故其味甘其氣  
寒其形類蛇常與水蛇同穴故其性有小毒  
甘寒而善能殺蟲故骨蒸勞瘵及五痔瘡瘦  
人常食之有大益也燒烟辟蚊熏屋舍竹木  
斷蛙蟲置骨于衣箱中斷蠹其殺諸蟲之驗  
可證矣腹下有黑斑背上有白點者毒甚不  
可食重三四斤及水行昂頭者不可食妊娠

食之令胎有疾脾胃薄弱易泄者勿食

蛞蝓味鹹寒無毒主賊風喎僻筋及脫肛驚

癰瘰縮

蝸牛味鹹寒主賊風喎僻踈跌大腸下脫肛筋

急及驚癰蛞蝓蝸牛本經分二條今按其氣味相同主療無別惟形質稍異故併為

一蝸牛負殼蛞蝓無殼耳

疏○蛞蝓蝸牛稟陰溼之氣而生故味鹹氣

寒無毒經曰清靜則肉腠閉拒雖大風苛毒

弗能害也如陰血虧竭陽氣躁擾則腠理不

密賊風乘虛而入風主搖動中于經絡故喎

僻瘰縮軼筋筋急所自來矣又風為陽邪筋

脉得之皆燥急鹹寒能益陰潤燥軟堅則筋

脉舒緩經絡通達而諸證除矣驚癰者風熱

也脫肛者大腸熱也踈跌者血脉傷必發熱

也鹹寒總除諸熱所以主之矣蛞蝓性畏二物

不敢過其所行之路觸其身即死故人取以



治蜈蚣毒

主治參互

聖惠方治大腸因熱脫肛用蝸牛一兩燒灰  
猪脂和傅立縮 濟生方痔瘡腫痛用蝸牛  
一枚入麝香少許以碗盛次日取水塗之丹  
溪方用蝸牛浸油塗之或燒灰傅亦可 集  
驗方發背初起活蝸牛二百箇以新汲水一  
盞瓶內封一宿取涎水入真蛤粉旋調掃傅

瘡上日十餘度 大全良方痔熱腫痛用大  
蛞蝓一箇研泥入片腦一字燕脂坯子半錢  
同傅之

簡誤

其氣大寒非真有風熱者不宜用小兒薄弱  
多泄者不宜用

蜚蝨味苦微寒有毒主逐瘀血下血積堅痞  
癥瘕寒熱通利血脉及九竅女子月水不通積

聚除賊血在胸腹五臟者及喉痺結塞一名

疏○蜚蠊其用大略與廣蟲相似而此則若

勝若能泄結性善齧牛馬諸畜血味應有鹹

鹹能走血完素云蠶飲血而用以治血故主

積聚癥瘕一切血結為病如經所言也若寒

又能泄三焦火邪迫血上壅閉塞咽喉故主

喉痺結塞也今人以其有毒多不用然仲景

抵當湯丸大黃廣蟲丸中咸入之以其散臟

腑宿血結積有神効也凡毒藥之治病如刑

罰之治盜賊不如是則不足以祛邪反正書

曰若藥不瞑眩厥疾不瘳正此謂也其與病

相乖不宜用者詳著簡誤中

主治參互

入大黃廣蟲丸治虛勞羸瘦內有乾血肌膚

甲錯兩目黯黑 入抵當湯治太陽病身黃

脉沉結少腹鞭小便自利其人如狂者 備

急方撲墜瘀血蚘蟲二十枚牡丹皮一兩爲末酒服方寸匕血化爲水也

簡誤

傷寒發黃脉沉結少腹鞭如小便不利者爲無血證非畜血也不宜用瘀血未審的者不宜用女子月水不通由于脾胃薄弱肝血枯竭而非血結閉塞者不宜用孕婦腹中有癥瘕積聚不宜用凡病氣血虛甚形質瘦損者

忌之

麤蟲味鹹寒有毒主心腹寒熱洗洗血積癥瘕破堅下血閉生子大良一名地鼈

疏○麤蟲生於下溼土壤之中故其味鹹氣寒得幽暗之氣故其性有小毒以刀斷之中有白汁如漿湊接卽連復能行走故今人以之治跌撲損傷續筋骨有奇効乃足厥陰經藥也夫血者身中之真陰也灌溉百骸周流

經絡者也血若凝滯則經絡不通陰陽之用  
互乖而寒熱洗洗生焉鹹寒能入血軟堅故  
主心腹血積癥瘕血閉諸證血和而榮衛通  
暢寒熱自除經脈調勻月事時至而令婦人  
生子也又治瘧母爲必用之藥

主治參互

同自然銅血竭乳香沒藥五銖錢黃荊子麻  
皮灰狗頭骨治跌撲損傷神効 仲景方大

黃塵蟲丸治產婦腹痛有乾血用塵蟲二十  
枚去足槌仁二十枚大黃二兩爲末煉蜜杵  
和分爲四丸每以一九酒一升煮取二合溫  
服當下血也 仲景鱉甲煎丸治久瘧成癖

董炳集驗方治跌撲閃挫用土鱉陰乾一  
箇臨時旋研入乳香沒藥自然銅龍骨各等  
分麝香少許爲末每服三分入土鱉末以酒  
調下須先整定骨乃服否則接挫也可代

杖

簡誤

無瘀血停畱者不宜用

青魚膽主目暗滴汁目中并塗惡瘡

疏○青魚膽色青象木木氣通于肝肝開竅於目故能治目暗味苦氣寒能涼血熱故又主塗惡瘡也

主治參互

龔氏易簡方治赤目障翳用黃連熬膏入大青魚膽汁和就再入片腦少許瓶收密封每日點之甚妙 龍木論一切障翳魚膽丸用青魚膽鯉魚膽羊膽牛膽各半兩熊膽二錢龍腦香少許石決明一兩為末蜜丸梧子大每空心茶下十九 萬氏家抄乳蛾喉痺用膽礬盛青魚膽中陰乾每用少許吹喉取吐簡誤

目病非風熱盛而由于血虛昏暗者不宜用  
服木人不可食青魚肉

石首魚味甘無毒頭中有石如碁子主下石淋  
磨石服之亦燒爲灰末服和葷菜作羹開胃益  
氣候乾食之名爲鮫炙食之主消瓜成水亦主  
卒腹脹食不消暴下痢

疏○石首魚得海中水土之氣故其味甘氣  
平無毒胃屬土甘爲土化故能開胃胃氣開

則飲食增五臟皆得所養而氣自益矣乾鮫  
其性疎利故能入腸胃寬中消食止痢頭中  
石堅重下走故主下石淋也凡泄痢腹痛與  
夫腸胃諸疾取忌油膩魚腥惟白鮫不忌蓋  
鮫飲鹹水而性平不熱且無脂膩不惟少熱  
中之患更有消食理脾實腸胃之功也  
鱸魚平補五臟益筋骨和腸胃治水氣多食宜  
人

疏○鱸魚秋月方美其得水中之清氣者乎  
味甘淡氣平雖有小毒不至為病乃與脾胃  
相宜之物也腎主骨肝主筋滋味屬陰總歸  
於臟益二臟之陰氣故能益筋骨脾胃有病  
則五臟無所滋養而積漸流於虛弱脾弱則  
水氣泛濫益脾胃則諸證自除矣

神農本草經疏卷之二十一

疏○鱸魚秋月方美其得水中之清氣者乎  
味甘淡氣平雖有小毒不至為病乃與脾胃  
相宜之物也腎主骨肝主筋滋味屬陰總歸  
於臟益二臟之陰氣故能益筋骨脾胃有病  
則五臟無所滋養而積漸流於虛弱脾弱則  
水氣泛濫益脾胃則諸證自除矣

神農本草經疏卷之二十一

神農本草經疏卷之二十二

蟲魚部下品

總八十一種今疏其要者十六種

蝦蟆

蟾酥

牡鼠糞

蛤蜊

粉附

蚘殼附

蚘蛇膽

蛇蛻

白頸蚯蚓

蜈蚣

蛤蚧

水蛭

斑貓

田中螺汁

白花蛇

烏蛇附

蜚螂



五靈脂

蝎

鮫鯉甲

蝦蟇味辛寒有毒主邪氣破癥堅血癰腫陰瘡服之不患熱病療陰蝕疽癘惡瘡獠犬傷瘡能合玉石一名蟾蜍

疏○蝦蟇蟾蜍本是二物經云一名蟾蜍者蓋古人通稱蟾爲蝦蟇耳經文雖名蝦蟇其用實則蟾蜍也今世所用者皆蟾蜍而非蝦蟇其功益可見矣稟土金之精氣上應月魄

性亦靈異其味辛氣寒毒在眉稜皮汁中其主癰腫陰瘡陰蝕疽癘惡瘡獠犬傷瘡者皆熱毒氣傷肌肉也辛寒能散熱解毒其性急速以毒攻毒則毒易解毒解則肌肉和諸證去矣凡癰疫邪氣得汗則解其味大辛性善發汗辛主散毒寒主除熱故能使邪氣散而不留邪去則胃氣安而熱病退矣破癥堅血者亦以其辛寒能散血熱壅滯也陶隱居云

其肪塗玉則刻之如蠟故云能合玉石近世  
治小兒疳疾多用以其走陽明而能消積滯  
也

主治參互

全嬰方五疳保童丸治五疳八痢面黃肌瘦  
好食泥土不思乳食用大乾蟾蜍一枚燒存  
性皂角去皮弦一錢燒存性蛤粉水飛三錢  
麝香一分糊丸粟米大空心米飲下三四十

丸日二服 鄭氏小兒方走馬牙疳侵蝕口  
鼻乾蚶蚶黃泥裏固煨過黃連各二錢半青  
黛一錢入麝香少許和研傅之 錦囊秘覽  
附骨壞瘡久不瘥膿汁不已或骨從瘡孔中  
出用大蝦蟆一箇亂髮一雞子大猪油四兩  
入二物煎枯去滓待凝如膏先以桑根皮烏  
頭煎湯洗拭乾煨龍骨末糝四邊以前膏貼  
之 醫林集要發背腫毒初起勢重者以活

蟾一箇破開連肚乘熱合瘡上不久必臭不可聞再易三四次卽愈 袖珍方治風犬傷卽用蟾蜍後足搗爛水調服之先於頂心拔去血髮三兩根則小便內見沫也

○蟾酥甄權云端午日取眉脂以朱砂麝香爲丸如麻子大治小兒疳瘦每日一丸如腦疳以乳汁調滴鼻中日華子云眉酥治蚰牙和牛酥摩傅腰眼并陰囊治腰腎冷并助陽氣

蘇頌云主蚰牙及小兒疳瘦觀諸家所主但言其有消積殺蟲溫煖通行之功然其味辛甘氣溫善能發散一切風火抑鬱大熱癰腫之候爲拔疔散毒之神藥第性有毒不宜多用入發汗散毒藥中服者尤不可多

### 主治參互

同鐵繡桑礪麝香牛黃冰片用金鍼鍼入疔根抹入前藥其疔根卽爛出 疔疔丸同硃

砂水片牛黃明礬白殭蠶麝香黃蠟溶化作  
丸麻子大用葱頭白酒吞下取汗不過二三  
小丸 青囊雜纂拔取疔黃蟾酥以麵丸梧  
子大每用一丸安舌下卽黃出也 危氏方  
拔取疔毒蟾酥以白麵黃丹搜作劑每丸麥  
粒大挑破納入仍以水澄膏貼之 保命集  
一切瘡毒蟾酥一錢白麵二錢硃砂少許井  
水調成小錠子如麥大每用一錠葱湯服汗

出卽愈如瘡勢緊急用三四錠 萬氏家抄  
凡癰疽發背無名腫毒初起者急取蟾酥三  
五分廣膠一塊米醋一二碗入銚內火化開  
用筆蘸乘熱令人不住手周圍潤之以散爲  
度

### 簡誤

蟾雖有毒與病無害其眉酥有大毒不宜多  
服諸家咸云治小兒疳瘦恐非正治不宜漫

嘗也卽用亦煨過者予親見一人因齒痛以蟾酥納牙根誤吞入頭目俱脹大而斃卽陶注云其皮汁甚有毒犬嚙之口皆腫之驗也惟疔腫服之者取其以毒攻毒之義然其劑亦甚小不能爲害耳外治殊有神効若欲內服勿過三釐慎毋單使必與牛黃明礬乳香沒藥之類同用乃可如瘡已潰欲其生肌長肉之際得之作痛異常不可不知也

牡鼠糞微寒無毒主小兒癩疾大腹時行勞復

兩頭尖者是牡鼠屎

疏○牡鼠糞本經諸家不言味但云微寒無毒然詳其所自應是苦鹹之物蓋鼠屬水而凡糞必苦者也入足陽明足厥陰經其主小兒癩疾大腹及時行勞復者皆熱邪在陽明也苦寒能除是經之熱所以主之古方治男子陰易腹痛婦人吹乳乳癰皆取其除熱軟

堅泄結走肝入胃之功耳

主治參互

同白芷山茨菇山豆根連翹金銀花蒲公英  
 夏枯草貝母橘葉栝樓根紫花地丁牛旁子  
 治乳癰乳岩有效 外臺秘要傷寒勞復用  
 雄鼠屎二十枚豉五合水二升煮一升頓服  
 活人書加梔子葱白 南陽活人書男子陰  
 易及勞復猥鼠屎湯用猥鼠屎兩頭尖者十

四枚韭白根一大把水二盞煎一盞溫服得  
 黏汗為効未汗再服 集要方婦人吹奶鼠  
 屎七粒紅棗七枚去核包屎燒存性入麝香  
 少許溫酒調服并治乳癰初起 普濟方大  
 小便秘雄鼠屎末傅臍中立効 除傷寒勞  
 復陰易及乳癰乳岩外他用甚稀故不著簡  
 誤

蛤蜊冷無毒潤五藏止消渴開胃解酒毒主老

癖能爲寒熱者及婦人血塊食之

疏○蛤蜊稟水中之陰氣以生其味鹹氣冷無毒入足陽明經五臟皆屬陰得水氣之陰者其性滋潤而助津液故能潤五臟止消渴開胃也鹹能入血軟堅故主婦人血塊及老癖爲寒熱也煮食更能醒酒

○蛤粉丹溪云味鹹寒無毒主熱痰溼痰老痰頑痰疝氣白濁帶下同香附末姜汁調服主

### 心痛

疏○此卽蛤殼煨成粉者其味鹹氣寒無毒爲諸痰證之要藥蓋痰未有不山火氣上炎煎熬津液而成鹹能軟堅潤下得之則火自降痰結自消矣疝氣白濁帶下皆腎經爲病也腎屬水鹹爲水化氣類相從故能入腎以除其所苦也心痛者心虛而熱邪客之也五臟苦欲補瀉云心欲軟急食鹹以軟之此之

謂也更有消浮腫利小便散癭核腫毒婦人  
血塊湯火傷瘡等用

### 主治參互

普濟方氣虛水腫用大蒜十箇搗如泥入蛤  
粉丸梧子大每食前白湯下二十九服盡小  
便下數桶而愈 潔古方治白濁遺精真珠  
粉丸用蛤粉煨一斤黃檗蜜炙一斤爲末水  
跌爲丸梧子大每服一百丸空心溫酒下日

二次蓋蛤粉味鹹而能補腎陰黃檗苦而降  
心火堅腎故也

### 簡誤

肉氣味雖冷乃與丹石人相反食之令腹結  
痛殼粉善消痰積血塊然脾胃虛寒者宜少  
用或加益脾胃藥同用爲宜

蠟溫主心腹冷氣腰脊冷風利五藏健胃令人  
能食又云溫中消食起陽益血色 殼燒過以



米醋三度淬後埋令壞醋膏丸治一切血氣冷氣癥癖

疏○蚘得水中之陽氣故其味甘氣溫性亦無毒經曰裏不足者以甘補之又曰形不足者溫之以氣甘溫能益氣而補中則五臟安胃氣健心腹腰脊風冷俱瘳矣胃健則食自消臟煖則陽自起氣充則血自華也鼓味鹹走血而奠堅故能治血氣冷氣癥癖丹溪用

以消血塊化痰積以此也今世糟其肉爲作酒之物罕有入藥者殼惟消癥癖之外無他用故並不著主治及簡誤

蚘蛇膽味甘苦寒有小毒主心腹蠱痛下部蠱瘡目腫痛

疏○蚘蛇稟火土之氣其膽爲甲乙風木之化故其味苦中有甘氣寒有小毒氣薄味厚陰也降也入手少陰足厥陰陽明經心腹蠱

痛者蟲在內攻嚙也下部蠱瘡者蟲在外侵蝕也溼熱則生蟲苦寒能燥溼殺蟲故內外施之皆得也肝開竅於目肝熱則目腫痛入肝泄熱則腫痛除矣今人受杖時用此噙化可得不死其功能護心止痛使惡血不上薄心有神力也

主治參互

同血竭乳香沒藥狗頭骨灰麈蟲天靈蓋象

牙末麻皮灰丹砂作丸臨杖服一丸護心止痛多杖無害 聖惠方小兒急疔瘡水調蚘蛇膽傅之 醫方摘要痔瘡腫痛蚘蛇膽研香油調塗立効 眞膽絕難得狹長通黑皮膜極薄舐之甜苦剔取粟許着淨水中浮游水上回旋行走者爲眞其徑沉者非也勿多着亦沉散也今世惟爲受杖人所需餘甚稀使故不著簡誤

蛇蛻音稅味鹹甘平無毒主小兒百二十種驚癇  
瘈瘲癩疾寒熱腸痔蟲毒蛇癩弄舌搖頭大人  
五邪言語僻越惡瘡嘔欬明目火熬之良

疏○蛇蛻蛇之餘性猶存不以氣味為用者  
故蛇之性上竄而主風蛻之用入肝而辟惡  
其性一也小兒驚癇瘈瘲癩疾寒熱蛇癩弄  
舌搖頭大人五邪言語僻越皆肝經為病邪  
惡侵犯也蛇蛻走竄能引諸藥入肝散邪故

主如上等證善能殺蟲故主腸痔蟲毒惡瘡  
邪去木平故止嘔欬明目今人亦用以催生  
去翳膜者取其善脫之義也

主治參互

肘後方治小兒頭面瘡蛇蛻燒灰臘猪脂和  
傅之并治小兒月蝕 周蜜齊東塾語云小  
兒痘後障翳蛇蛻一條燒焙天花粉五錢為  
末以羊肝破開夾藥縛定米泔水煮食屢試

輒効真奇方也 濟生秘覽治橫生逆生須  
 臠不救用蛇蛻一具蟬蛻十四箇髮一握並  
 燒存性分二服酒下仍以小鍼刺兒足心擦  
 鹽少許即順并能下胞衣 產乳方婦人吹  
 乳蛇皮一尺七寸燒末酒服 千金方諸漏  
 有膿蛇蛻灰傅之即蟲出 直指方魚臍瘡  
 出水四畔浮漿用蛇蛻燒存性雞子清和傅  
 醫方摘要耳忽大痛如有蟲在內奔走或

血水流出或乾痛不可忍者蛇蛻皮燒存性  
 研細鷲翎吹入立愈

簡誤

小兒驚癇癩疾非外邪客忤而由於肝心虛  
 者不効

白頸蚯蚓味鹹寒大寒無毒主蛇痕去三蟲伏  
 尸鬼疰蠱毒殺長蟲仍自化作水療傷寒伏熱  
 狂謬大腹黃疸一名土龍 畏葱鹽

疏○蚯蚓得土中陰水之氣故其味鹹寒無毒大寒能祛熱邪除大熱故主伏尸鬼疰及療傷寒伏熱狂謬鹹主下走利小便故治大腹黃疸諸蟲瘕咸屬溼熱所成得鹹寒之氣則瘕自消蟲自去而蠱毒之熱亦解矣昔一道人治熱病發狂用白頸蚯蚓十數條同荆芥穗搗汁與飲之得臭汗而解其爲治傷寒伏熱狂謬之明驗也

主治參互

肘後方傷寒熱結六七日狂亂見鬼欲走以大白頸蚯蚓半斤去泥用人溺煮汁飲或生絞汁亦可 斗門方小便不通因溼而得者用蚯蚓搗爛浸水濾取濃汁半碗服立通 勝金方耳卒聾閉蚯蚓入鹽安葱管內化水點之立効 保命集療癰潰爛流串者用荆芥根下段煎湯溫洗良久看瘡破紫黑處以

針刺去血再洗三四次用韭菜地上蚯蚓一  
把五更時收取炭火上燒紅爲末每一匙入  
乳香沒藥輕粉各半錢穿山甲九片炙爲末  
麻油調傅之神効

簡誤

蚯蚓氣大寒能除有餘邪熱故傷寒非陽明  
實熱狂躁者不宜用溫病無壯熱及脾胃素  
弱者不宜用黃疸緣大勞腹脹屬脾腎虛尸

疰因陰虛成勞瘵者咸在所忌性復有小毒  
被其毒者以鹽水解之

蜈蚣味辛溫有毒主鬼疰蠱毒噉諸蛇蟲魚毒  
殺鬼物老精溫瘧去三蟲療心腹寒熱結聚墮  
胎去惡血赤頭足者良

一名螂蚘  
一名天龍

疏○蜈蚣稟火金之氣以生故其味辛氣溫  
有毒乃屬陽之毒蟲足厥陰經藥也善能制  
蛇見大蛇便緣上噉其腦淮南子云騰蛇游

霧而殆於蝘蛆正指此也故本經主噉諸蛇  
蟲魚毒及去三蟲蠱毒也性復走竄辟邪所  
以能療鬼疰溫瘧殺鬼物老精辛主散結溫  
主通行故又治心腹寒熱結聚墮胎去惡血  
也今世又以之治小兒驚癇風搐臍風口噤  
與夫瘰癧便毒痔漏等證皆用之

主治參互

金頭蜈蚣得牛角鰓象牙末猪懸蹄刺蠟皮

蛙竹屑能去通腸漏管 直指方瘰瘡一名

蛇瘴蠻烟瘴雨之鄉多毒蛇氣人有不伏水  
土風氣而感觸之者數月以還必發蛇瘴惟

赤足蜈蚣最能伏蛇爲上藥白芷次之 聖

濟總錄云嶺南外蛇瘴一名瑣喉瘴項大腫

痛連喉用赤足蜈蚣一二節研細水下卽愈

奇効良方天蛇頭瘡生手指頭上用蜈蚣

一條燒烟熏一二次卽愈或爲末猪膽汁調

塗之 濟生秘覽使毒初起蜈蚣一條瓦土  
焙存性爲末酒調服 圖經治初生小兒口  
噤不開不能乳者用赤足蜈蚣去足炙研末  
以猪乳二合調半錢分三四服溫灌之効

簡誤

蜈蚣性有毒善走竄小兒慢驚風口噤不言  
大人溫瘧非烟嵐瘴氣所發心腹積聚非蟲  
結蛇瘕便毒成膿將潰咸在所忌性畏蜚蠊

不敢過其所行之路能嚙人痛甚以蜚蠊搗  
塗之痛立止蜈蚣能制龍蛇而反畏蜚蠊  
蛛卽莊子所謂物畏其天陰符經所謂禽之  
制在氣也凡使勿用干足蟲真相似但蜈蚣  
腰中一段無脚所以能掬而彈遠爲異又云  
頭上有白肉面并嘴尖可別若誤用并把着  
腥臭氣入頂能殺人也

蛤蚧味鹹平有小毒主久肺勞傳尸殺鬼物邪



氣療欬嗽下淋瀝水道生巖南山谷及城牆  
或大樹間身長四五寸尾與身等形如大守宮  
一雌一雄常自呼其名曰蛤蚧最護惜其尾或  
見人欲取之多自嚙斷其尾人卽不取之凡採  
之者須存其尾則用之力全故也

疏○蛤蚧得金水之氣故其味鹹氣平有小  
毒入手太陰足少陰經其主久肺勞傳尸鬼  
物邪氣欬嗽淋瀝者皆肺腎爲病勞極則肺

腎虛而生熱故外邪易侵內證兼發也蛤蚧  
屬陰能補水之上源則肺腎皆得所養而勞  
熱咳嗽自除邪物鬼氣自去矣肺朝百脉通  
調水道下輸膀胱肺氣清故淋瀝水道自通  
也又顧玠海槎錄云廣西橫州甚多蛤蚧牝  
牡上下相呼累日情洽乃交兩相抱負自墮  
於地人往捕之亦不知覺以手分劈雖死不  
開乃用熟稿草細纏蒸過曝乾售之煉爲房

中之藥甚効尋常捕者不論雌雄但可為雜藥用

主治參互

寇氏衍義治久嗽不愈肺積虛熱成癰欬出膿血曉夕不止喉中氣塞胸膈噎痛用蛤蚧阿膠鹿角膠犀角羚羊角各二錢半用河水三升銀石器內文火熬至半升濾汁時時仰臥細呷日一服

簡誤

咳嗽由風寒外邪者不宜用雷公曰其毒在眼須去眼及甲上尾上腹上肉毛以酒浸透隔兩重紙緩焙令乾以甕器成懸屋東角上一夜用之力可十倍勿傷尾

水蛭味鹹苦平微寒有毒主逐惡血瘀血月閉破血瘕積聚無子利水道又墮胎

俗名馬蟻

疏○水蛭生於溪澗陰溼之處其味鹹苦氣

平有大毒其用與蝨蟲相似故仲景方中往往與之並施鹹入血走血苦泄結鹹苦並行故治婦人惡血瘀血月閉血癥積聚因而無子者血畜膀胱則水道不通血散而膀胱得氣化之職水道不求其利而自利矣墮胎者以其有毒善破血也

主治參互

入抵當湯治傷寒畜血下焦因而發狂 人

大黃虜虫丸兼治虛勞骨蒸咳嗽內有乾血皮膚甲錯 入鼈甲煎丸消瘧母已上皆仲景方 古今錄驗方墜跌打擊內傷神効水 蛭一兩燒令烟出爲末入麝香一兩每酒服一錢當下畜血未止再服其効如神

簡誤

水蛭蝨蟲皆破逐瘀血血瘀發病之惡藥而水蛭入腹煨之若尚存性尚能變爲水蛭嚙

人腸臟非細故也破瘀消血之藥儘多正足  
選用奚必用此難制之物戒之可也如犯之  
以黃泥作丸吞之必入泥而出

斑猫味辛寒有毒主寒熱鬼疰蠱毒鼠瘻疥癬  
惡瘡疽蝕死肌破石癰血積傷人肌墮胎馬刀為之

使畏巴豆丹  
參空青甘草

疏○斑猫稟火金相合之氣故其味辛氣寒  
扁鵲云有大毒近人肌肉則潰爛毒可知矣

入手陽明手太陽經性能傷肌肉蝕死肌故  
主鼠瘻疽瘡疥癬辛寒能走散下泄故主破  
石癰血積及墮胎也至於鬼疰蠱毒必非極  
辛大毒之藥所能療此本經之誤甄權主療  
癰通利水道以其能追逐腸胃垢膩復能破  
結走下竅也

主治參互

治瘰癧用肥皂二斤去核每肥皂一莢入斑

猫四枚線縛蒸取出去斑猫并肥皂皮筋得  
淨肉十兩入貝母二兩栝樓根玄參甘草薄  
荷葉各一兩五錢共爲末以肥皂搗如泥爲  
丸梧子大每服一錢白湯吞服後腹疼勿慮  
此藥力追毒之故 治癩犬咬方用斑猫七  
箇去頭足并翅洒洗和溼糯米銅杓內炒米  
熟爲度隨將二物研成細末加六一散三兩  
分作七服每清晨一服白湯調下本人頭頂

心必有紅髮二三根要不時尋覓拔去 經  
驗方內消瘰癧不拘大人小兒用斑猫一兩  
去頭足翅以粟米一升同炒米焦去米入薄  
荷四兩爲末烏雞子清丸如菉豆大空心臘  
茶下三丸加至五丸却每日減一丸減至一  
丸後復日增一丸以消爲度

簡誤

斑猫性有大毒能潰爛人肌肉惟瘰癧癩犬

咬或可如法暫施此物若煨之存性猶能嚙人腸胃發泡潰爛致死卽前二證亦不若用米同炒取氣而勿用質爲穩餘證必不可餌切戒切戒

田中螺汁大寒主目熱赤痛止渴

疏○田螺產於水田中稟水土之陰氣故其汁大寒味應甘性無毒陶隱居以真珠黃連末內入良久取汁點目痛神効以其寒能除

熱也解一切有餘之熱故能止渴及醒酒

### 主治參互

丹溪方治噤口痢疾川活大田螺二枚搗爛入麝香三分作餅烘熱貼臍間半日熱氣下行卽思食矣甚効 又方治小便不通腹脹如鼓用田螺一枚鹽半七生搗傅臍下一寸三分卽通 經驗方大腸脫肛墜下三五寸者用大田螺二三枚將淨水養去泥用雞爪

黃連研細末入靨內待化成水以濃茶洗淨  
肛門將雞翎蘸水刷之以軟帛托上自然不  
再發也 乾坤生意痔漏疼痛用田螺一箇  
入龍腦一分在內取冰搽之効

簡誤

目病非關風熱者不宜用

白花蛇味甘鹹溫有毒主中風溼痺不仁筋脉  
拘急口面喎斜半身不遂骨節疼痛大風疥癩

及暴風瘙癢脚弱不能久立一名寒鼻蛇白花

者良

出蘄州龍頭虎口黑質白花日  
開如生尾有雙甲真蘄產也

疏○白花蛇生於土穴陰霾之處稟幽暗毒  
厲之氣故其味雖甘鹹性則有大毒也經曰  
風者百病之長善行而數變蛇性走竄亦善  
行而無處不到故能引諸風藥至病所自腑  
臟而達皮毛也凡癘風疥癬喎僻拘急偏痺  
不仁因風所生之證無不藉其力以獲瘥本

經著其功能信非虛矣

主治參互

同苦參何首烏葳靈仙鼈蝨胡麻天門冬百  
部稀莖漆葉刺疾藜治癘風并遍身頑痺疥  
癬 醫壘元戎驅風膏治風癱癘風遍身疥  
癬用白花蛇肉四兩酒潤炙乾天麻七錢半  
薄荷荆芥各二錢半爲末好酒二升蜜四合  
石器熬成膏每服一盞溫湯服日三服急於

暖處出汗十日効

瑞竹堂經驗方白花蛇

酒治諸風癘癬用白花蛇一條酒潤去皮骨  
取肉絹袋盛之蒸糯米一斗安麴於缸底置  
蛇於麴上以飯安蛇上用物密蓋三七日取  
酒以蛇曬乾爲末每服三五分溫酒下仍以  
濁酒并糟作餅食之尤佳 潔古白花蛇散  
治大風病白花蛇烏梢蛇各取淨肉二錢酒  
炙雄黃二錢大黃五錢爲末每服二錢白湯



下三日一服

○烏蛇卽烏梢蛇氣味所主經白花蛇同第性善無毒耳修事亦同不復載色黑如漆尾細有劍脊者良

簡誤

白花蛇性走竄有毒癘風疥癬頑痺等證誠爲要藥然而中風口而喎斜半身不遂定緣陰虛血少內熱而發與得之風溼者殊科非所宜也醫師宜辨之頭尾并骨俱有大毒須

盡去之

蠅蝦味鹹寒有毒主小兒驚癇瘈瘲腹脹寒熱大人癩疾狂易音羊手足端寒支滿貢脉

疏○蠅蝦稟陰溼之氣以生故其味鹹氣寒有毒入足厥陰手足陽明經小兒驚癇瘈瘲腹脹寒熱大人癩疾狂易皆肝胃大腸三經風熱壅盛所致鹹寒除三經之邪熱則諸證自瘳別錄主手足端寒支滿者以脾胃主四

肢而治中焦脾氣結滯則血液不能通行灌  
漑於手足胃家熱壅及大腸結實則中焦不  
治而氣逆支滿行三與之壅滯則所苦減除  
矣鹹能軟堅入腎故又主奔豚也古今方書  
以之治一切痔瘻及疔腫疽瘡出箭鏃之用

主治參互

本事方推車散治大小便經月不通欲死者  
用推車客七箇男川頭女川身蜈蚣七箇男

用身女用頭新瓦焙研末用虎目樹南向皮  
煎汁調服只一服立通 一方大腸脫肛蠅  
蝦燒存性爲末入冰片研勻摻上托之卽入  
唐氏方腸漏出水用蠅蝦一枚陰乾入水  
片少許爲細末紙撚蘸末入孔內漸漸生肉  
藥自退出卽愈 劉涓子方附骨疽瘡蠅蝦  
七枚同大麥搗傅 廣利方無名惡瘡忽得  
不識者用蠅蝦杵汁塗之 劉禹錫纂柳州

救三死方云元和十一年得下瘡凡十四日  
益篤善藥傅之莫救長慶賈方伯教用蠅  
心一夕百苦皆已明年正月食羊肉又大作  
再用如神驗其用蠅心在腹下度取之其  
肉稍白是也貼瘡半日許再易血盡根出卽  
愈蠅畏羊肉故食之卽發其法蓋出葛洪  
肘後方 楊氏家藏方箭鏃入骨不可移者  
用巴豆微炒同蠅心搗塗斯須痛定必微癢

忍之待極癢不可忍乃撼動拔之立出凡諸  
瘡皆可療也 搗爲丸塞下部引痔蟲出盡  
永差

簡誤

蠅有毒外用易臻厥功內服非虛人所宜  
非不得已勿輕試

五靈脂味甘溫無毒主療心腹冷氣小兒五疳  
辟疫治腸風通利氣脉女子月閉出北地此是

寒號蟲糞也

疏○寒號蟲畏寒喜煖故其糞亦溫味甘而無毒氣味俱厚陰中之陰降也入足厥陰手少陰經性專行血故主女子血閉味甘而溫故療心腹冷氣及通利氣脈也其主小兒五疳者以其亦能消化水穀治腸風者取其行腸胃之瘀滯也凡心胃血氣刺痛婦人產後少腹兒枕塊諸痛及痰挾血成窠囊血凝齒

痛諸證所必須之藥

主治參互

同澤蘭牛膝益母草延胡索牡丹皮紅花赤芍藥山查生地黃治產後惡露不盡腹中作疼加桃仁其効更速勿過劑 同番降香紅麴川通草紅花延胡索韭菜童便治胃脘瘀血作痛 同木香烏藥治周身血氣刺痛 和濟局方失笑散治男女老小 心癆腹痛少

腹痛并少腹痛氣諸藥不効能行能止婦人妊娠心痛及產後心痛少腹痛血氣痛尤妙用五靈脂蒲黃等分研末先以醋二盃調未熬成膏入水一盞煎至七分連藥熱服未止再服一方以酒代醋一方以醋糊丸童便酒服 楊氏產乳方紫金丸治產後惡露不快腰痛少腹如刺時作寒熱頭痛不思飲食又治久有瘀血月水不調黃瘦不食亦療心

痛功與失笑同以五靈脂水淘淨炒末一兩以好米醋調稀慢火熬膏入真蒲黃末和丸龍眼大每服一丸以水與童便各半盞煎至七八分溫服少頃再服惡露卽下血塊經閉者酒磨服之 圖經產後血暈不知人事用五靈脂二兩半生半炒爲末每服一錢白水調下如口噤者斡開灌之入喉卽愈 丹溪方產後腹痛五靈脂香附桃仁等分研末醋

糊丸服一百丸白朮牛膝陳皮湯下 事林  
廣記卒暴心痛五靈脂炒一錢半乾姜炮三分爲末熱酒服立愈 產寶方胎衣不下惡  
血衝心用五靈脂半生半炒研末每服二錢  
溫酒下 百一選方痰血凝結紫芝丸用五  
靈脂水飛半夏湯泡等分爲末姜汁浸蒸餅  
丸梧子大每米飲下二十九 夏子益奇疾  
方血潰怪病凡人眼中白珠渾黑視物殊常

毛髮堅直如鐵條能飲食而不語如醉名曰  
血潰以五靈脂爲末湯服二錢卽愈

簡誤

五靈脂其功長於破血行血故凡瘀血停滯  
作痛產後血暈惡血衝心少腹兒枕痛留血  
經閉瘀血心胃間作痛血滯經脈氣不得行  
攻刺疼痛等證在所必用然而血虛腹痛血  
虛經閉產婦去血過多發暈心虛有火作痛

病屬血虛無瘀滯者皆所當已

蝎味甘辛有毒療諸風癱瘓及中風半身不遂口眼喎斜語澇手足抽掣形緊小者良

疏○蝎稟火金之氣以生本經味甘辛有毒然察其用應是辛多甘少氣溫入足厥陰經諸風掉眩屬肝木風客是經非辛溫走散之性則不能祛風逐邪兼引諸風藥入達病所也故大人真中風小兒急驚風皆須用之

主治參互

全幼心鑑小兒臍風宣風散治小兒初生斷臍後傷風唇青口撮出白沫不乳用全蝎二十一箇無灰酒塗炙爲末入麝香少許每用金銀煎湯調半字服之 經驗方大人風涎用蝎一箇頭尾全者以薄荷四葉裹定火上炙焦同研爲末作一服白湯下小兒驚風分四服如前服 得胡桃同煨吐 研黃耆金銀

花湯下治橫痃不收口

簡誤

蝎風藥也似中風及小兒慢脾風病屬於虛法咸忌之

鮫鯉甲微寒主五邪驚啼悲傷燒之作灰以酒或水和方寸七療蟻瘦

疏○鮫鯉甲穿山穴居其性善走味辛平氣微寒有毒入足厥陰兼入手足陽明經邪魅

着人則驚啼悲傷不已辛主散則邪魅去驚啼悲傷止矣喜食蟻又能入大腸故療蟻瘦蟻瘦者卽世人所云漏也性走能行瘀血通經絡故又有消癰毒排膿血下乳和傷發痘等用

主治參互

鮫鯉甲俗名穿山甲土炒同乳香沒藥番降香紅麴山查川通草童便治一切內傷胸膈



間疼痛 同當歸白芷金銀花 迂紫花地  
丁夏枯草牛旁子乳香沒藥甘草貝母皂角  
刺治癰腫未潰資爲引導 佐地榆治便毒  
直指方治鼠痔成瘡腫痛用穿山甲尾尖  
處一兩煨存性鼈甲酥炙一兩麝香半錢爲  
末每服一錢空心茶下 又方乳汁不通涌  
泉散用穿山甲炮研末酒服方寸七日二服  
外以油梳梳乳卽通 又方便毒便癰穿山

甲半兩猪苓二錢竝以醋炙研末酒服二錢  
得紫草生犀角生地黃治痘瘡毒盛不得  
起發色帶乾紅枯燥者有功

簡誤

癰疽已潰不宜服痘瘡元氣不足不能起發  
者不宜服

神農本草經疏卷之二十三

果部三品

總五十三種今疏其要者二十種又木部

移入三種

上品藕實藕蓮  
鬚附

橘柚青皮核  
葉附大棗

覆盆子

雞頭實中  
品梅實

木瓜

柿

烏芋

枇杷葉

荔枝子

白蜜



甘蔗

沙糖

下品 杉仁

○杏核仁

梨

胡桃

海松子

橄欖

○龍眼

木部移入

○赤爪木

即山查木部移入

榧實

木部移入

藕實味甘平寒無毒主補中養神益氣力除百疾久服輕身耐老不饑延年

疏○藕實得天地清芳之氣稟土中冲和之味故味甘氣平別錄寒無毒入足太陰陽明

兼入手少陰經土為萬物之母後天之元氣藉此以生化者也母氣既和則血氣生神得所養而疾病無由來矣藕實正稟稼穡之化乃脾家之果故主補中養神益氣力除百疾及久服輕身耐老不饑延年也孟詵主五臟不足傷中益十二經脉血氣大明主止渴去熱安心止痢治腰痛及洩精多食令人喜皆資其補益心脾之功也

主治參互

得川黃連白芍藥白菹豆乾葛升麻紅麴橘  
紅甘草滑石烏梅爲丸治滯下如神 下痢  
飲食不食俗名噤口痢此證大危用鮮蓮肉  
一兩黃連五錢人參五錢水煎濃細細與呷  
服完思食便瘥 同菟絲子五味子山茱萸  
山藥車前子肉豆蔻砂仁橘紅芡實人參補  
骨脂巴戟天治脾腎俱虛五更溏瀉有肺熱

者去人參肉豆蔻 孟詵食療服食不饑石  
蓮肉蒸熟去心爲末煉蜜丸梧子大日服三  
十丸此僊家方也 普濟方白濁遺精石蓮  
肉龍骨益智仁等分爲末每服二錢空心米  
飲下 直指方心虛赤濁蓮子六一湯用石  
蓮肉六兩炙甘草一兩爲末每服一錢燈心  
湯下 丹溪心法久痢噤口石蓮肉炒爲末  
每服二錢陳倉米湯調下便覺思食甚妙

簡誤

藕實脾家果也甘平無毒於諸疾竝無相迕  
第生者食之過多微動冷氣脹人吞蓮子乃  
九月份經霜後采堅黑如石者破房得之墮水  
入泥者良今肆中一種石蓮子狀如榧子其  
味大苦產廣中出樹上木實也不宜入藥

○藕唐本注主熱渴散血生肌久服令人心懽  
藥性論云藕汁味甘能消瘀血不散藕節搗

汁主吐血不止或口鼻出血孟詵云生食之  
主霍亂後虛渴煩悶不能食其產後忌生冷  
物惟藕不同生冷爲能破血故也蒸食甚補  
五臟實下焦陳藏器云消食止洩除煩解酒  
毒及病後熱渴日華子云止霍亂開胃消食  
除煩止悶口乾渴疾止怒令人喜破產後血  
悶搗罾金瘡并傷折止暴痛  
疏○藕稟土氣以生其味甘生寒熱溫入心

脾胃三經生者甘寒能涼血止血除熱清胃  
故主消散瘀血吐血口鼻出血產後血悶昏  
金瘡傷折及止熱渴霍亂煩悶解酒等功熟  
者甘溫能健脾胃益血補心故主補五臟  
實下焦消食止洩生肌及久服令人心懽止  
怒也本生於污泥之中而體至潔白味甚甘  
脆孔竅瓊瓏絲綸內隱療血止渴補益心脾  
真水果中之嘉品也又能解蟹毒

○蓮蕊鬚一名佛座鬚味甘澀氣溫本經不收  
而古方固真補益方中往往用之詳其主治  
乃是足少陰經藥亦能通手少陰經能清心  
入腎固精氣烏鬚髮止吐血療滑泄同黃檗  
砂仁沙苑蒺藜魚膠五味子覆盆子生甘草  
牡蠣作丸治夢遺精滑最良

橘皮味辛溫無毒主胸中癢熱逆氣利水穀下  
氣止嘔欬除膀胱留熱停水五淋利小便主脾

不能消穀氣衝胸中吐逆霍亂止波去寸白久

服去臭下氣通神輕身長年

按橘柚實兩種本經作一條蓋傳誤

也今改正

疏○橘皮花開於夏實成於秋得火氣少金氣多故味辛苦氣溫無毒味薄氣厚降多升少陽中之陰也入手足太陰足陽明經其主胸中痰熱逆氣氣衝胸中嘔欬者以肺主氣氣常則順氣變則逆逆則熱聚於胸中而成

痰痰者假也如痞滿鬱悶之類也辛能散苦能泄溫能通行則逆氣下嘔欬止胸中痰熱消矣脾爲運動磨物之臟氣滯則不能消化水穀爲吐逆霍亂泄瀉等證苦溫能燥脾家之溼使滯氣運行諸證自瘳矣肺爲水之上源源竭則下流不利熱結膀胱肺得所養而津液貫輸氣化運動故膀胱留熱停水五淋皆通也去臭及寸白者辛能散邪苦能殺蟲

也通神輕身長年者利脾肺之極功也

### 主治參互

橘皮留白補脾胃和中去白消痰理肺氣同  
白朮則補脾同甘草則補肺同補氣藥則益  
氣同泄氣藥則破氣同消痰藥則能去痰同  
消食藥則能化食各從其類以爲用也 同  
人參何首烏桂枝當歸薑皮治三日瘧寒多  
得白豆蔻生薑藿香半夏治胃家有寒痰

或偶感寒氣傷冷食嘔吐不止 同人參白

朮白茯苓甘草山藥白豆蔻藿香麥芽山查  
白蘊豆治脾胃虛飲食不化或不欲食食亦  
無味 同蘇子貝母枇杷葉麥門冬桑根白  
皮沙參栝樓根五味子百部治上氣欬嗽能  
消痰下氣 同枳殼烏藥木香草豆蔻檳榔  
治氣實人暴氣壅脹 同蒼朮厚朴甘草爲  
平胃散治胸中脹滿 入二陳易治脾胃溼



痰及寒痰飲 仲景方橘皮湯治男女傷寒并一切雜病嘔噦手足逆冷者用橘皮四兩生薑一兩水二升煎一升徐徐呷之卽止 百一選方霍亂吐瀉但有一點胃氣存者服之卽生廣陳皮去白五錢真藿香五錢水二盞煎一盞時時溫服 食療治脚氣衝心或心下結硬腹中虛冷陳皮一斤和杏仁五兩去皮尖熬少和蜜搗和丸如梧桐子大每

日食前米飲下三十九 普濟方大腸闕塞陳皮連白酒煮焙乾研末每服二錢米飲下 適用方脾寒諸瘧不拘老少孕婦只兩服便止真橘皮去白切生薑自然汁浸過一指銀石器內重湯煮乾焙研末每服三錢用隔年青州棗十箇去核水一盞煎半盞發前服以棗下之 張氏方婦人乳癰未成者卽散已成者卽潰痛極者不痛神驗不可言用真

橘皮湯浸去白曬乾麩炒微黃爲末每服二錢麝香調酒下初發一服見效

簡誤

橘皮味辛氣溫能耗散真氣中氣虛氣不歸元者忌與耗氣藥同用胃虛有火嘔吐不宜與溫熱香燥藥同用陰虛欬嗽生痰不宜與半夏南星等同用瘧非寒甚者亦勿施

○青橘主氣滯下食破積結及膈氣

卽青皮

疏○青皮古方無用者至宋時醫家始用之其色青其味極苦而辛其氣溫而無毒氣味俱厚沉而降陰也入足厥陰少陽若泄辛散性復刻削所以主氣滯下食破結積及膈氣也元素破堅癖散滯氣治左脇肝經積氣亦此意耳

主治參互

青皮同人參鼈甲能消瘧母 同枳殼肉桂

川芎治左脇痛 同人參白朮三稜蓬茂阿  
魏礬紅山查紅麴木香消痞癖氣塊及一切  
肉食堅積

簡誤

青皮性最酷烈削堅破滯是其所長然誤服  
之立損人真氣爲害不淺凡欲施用必與人  
參朮芍藥等補脾藥同用庶免遺患必不可  
單行也肝脾氣虛者概勿施用

○橘核主腰痛膀胱氣腎冷炒去殼酒服良  
按橘核出日華子其味苦溫而下氣所以能  
入腎與膀胱除因寒所生之病也疝氣方中  
多用

○橘葉古今方書不載能散陽明厥陰經滯氣  
婦人妬乳內外吹乳巖乳癰用之皆效以諸  
證皆二經所生之病也

大棗味甘平無毒主心腹邪氣安中養脾助十

二經平胃氣通九竅補少氣少津液身中不足  
大驚四肢重和百藥補中益氣強力除煩悶療  
心下懸腸澀久服輕身延年不饑神仙

疏○大棗純得土之冲氣兼感天之微陽以  
生本經味甘氣平無毒東垣孟詵言溫氣味  
俱厚陽也入足太陰陽明經經曰裏不足者  
以甘補之又曰形不足者溫之以氣甘能補  
中溫能益氣甘溫能補脾胃而生津液則十

二經脉自通九竅利四肢和也正氣足則神  
自安故主心腹邪氣及大驚中得緩則煩悶  
除故療心下懸急及少氣脾得補則氣力强  
腸胃清故主身中不足及腸澀甘能解毒故  
主和百藥脾胃足氣血充後天生氣借此而  
盈溢故久服輕身長年不饑神仙也然亦指  
辟穀修煉者言之非恒人所能耳

主治參互

大棗甘溫能和陰陽調榮衛生津液凡邪在榮衛者辛甘以解之故仲景桂枝湯用薑棗以和榮衛助脾胃生津液令出汗也 仲景治傷寒水飲脇痛咳而乾嘔者有十棗湯取其益土而勝水也 又方發汗後小便利其人臍下悸欲作奔豚者茯苓桂枝甘草大棗湯主之茯苓能伐腎邪桂枝泄奔豚甘草大棗之甘滋助脾土以平腎氣 許叔微本事

方治婦人臟燥悲傷欲哭象若神憑數欠者大棗湯大棗十枚小麥一升甘草二兩每服一兩水煎服之

簡誤

棗雖能補脾胃益氣然而味過於甘中滿者忌之小兒疳病不宜食齒痛及患痰熱者不宜食生者尤不利人多食致寒熱 覆盆子味甘平無毒主益氣輕身令髮不白

疏○覆盆子得木氣而生本經味甘氣平無  
毒甄權微熱宗奭酸甘深得其義入足少陰  
經其主益氣者言益精氣也腎藏精腎納氣  
精氣充足則身自輕髮不白也蘇恭主補虛  
續絕強陰建陽悅澤肌膚安和臟腑甄權主  
男子腎精虛竭陰痿女子食之有子大明主  
安五藏益顏色養精氣長髮強志皆取其益  
腎添精甘酸收斂之義耳

主治參互

同黃檗沙苑蒺藜蓮鬚五味子砂仁魚膠山  
茱萸治夢遺洩精 同車前子五味子菟絲  
子蒺藜子爲五子衍宗丸治男子精氣虧乏  
中年無子 加入巴戟天臘牖臍補骨脂鹿  
茸白膠山茱萸肉蓯蓉治陽虛陰痿臨房不  
舉或精寒精薄

簡誤

十三  
強陽不倒者忌之

雞頭實味甘平無毒主溼痺腰脊膝痛補中除暴疾益精氣強志令耳目聰明久服輕身不饑耐老神仙一名茨

疏○雞頭實稟水土之氣以生故味甘氣平無毒入足太陰少陰補脾胃固精氣之藥也脾主四肢足居於下多爲溼所侵以致腰脊膝痛而成痺脾氣得補則溼自不容畱前證

皆除矣脾主中州益脾故能補中腎藏精與志入腎故主益精強志暴病多屬火得水土之陰者能抑火故主除暴疾也精氣足脾胃健則久服耳目聰明輕身不饑耐老神仙所自來矣

### 主治參互

君山藥白茯苓白朮人參蓮肉薏苡仁白藕  
豆爲補脾胃要藥 一味搗末熬金櫻子煎

和丸服之補下元益人謂之水陸丹 經驗  
方雞頭粥法用雞頭實三合煮熟去殼粳米  
一合煮粥日日空心食能益精氣強志意利  
耳目 永類鈴方四精丸治思慮色欲過度  
損傷精氣小便數遺精用秋石白茯苓芡實  
蓮肉各二兩爲末蒸棗和丸梧子大每服三  
十九空心鹽湯送下

簡誤

芡實生食味澀動風冷氣小兒不宜多食以  
其難消化也

梅實味酸平無毒主下氣除熱煩滿安心肢體  
痛偏枯不仁死肌去青黑痣惡疾上下痢好唾  
口乾

疏○梅實卽今之烏梅也梅得木氣之全故  
其味最酸所謂曲直作酸是也經曰熱傷氣  
邪客於胸中則氣上逆而煩滿心爲之不安



烏梅味酸能斂浮熱能吸氣歸元故主下氣除熱煩滿及安心也下痢者大腸虛脫也好唾口乾者虛火上炎津液不足也酸能斂虛火化津液固腸脫所以主之也其主肢體痛偏枯不仁者蓋因溼氣侵於經絡則筋脉弛縱或疼痛不仁肝主筋酸入肝而養筋肝得所養則骨正筋柔機關通利而前證除矣其主去死肌青黑痣惡肉者白梅之功也白梅

味鹹鹹能軟堅故也又能消痰醒睡止霍亂解酒毒弘景云生梅烏梅白梅功川大約相似第烏梅較良資川更多

主治參互

烏梅同川黃連白芍藥滑石甘草蓮肉白藕豆葛根升麻紅麴橘紅作丸治滯下如神一味作湯代茶飲治火炎頭痛仲景烏梅丸治虻厥虻上入膈故煩須臾復止得食而

嘔又煩者虻聞食卽出故耳用烏梅三百箇  
細辛附子人參桔梗黃檗各六兩當歸蜀椒  
各四兩黃連一斤乾薑十兩搗烏梅肉和丸  
桐子大先食飲服十九日三服 劉涓子鬼  
遺方蝕惡瘡努肉用烏梅肉燒爲灰傅上惡  
肉立盡 聖惠方赤痢腹痛烏梅肉黃連各  
四兩煉蜜丸梧子大每米飲下二十九日三  
服 圖經本草治勞瘧用烏梅十四枚豆豉

二合甘草三寸生薑一塊以童便二升煎去  
一半溫服卽止 治暑氣霍亂白梅一箇和  
仁搗碎入絲瓜葉一葉或菹豆葉再搗爛用  
新汲水調灌下卽解

簡誤

素問云味過於酸肝氣以津又云酸走筋筋  
病無多食酸以肝主筋性喜升發酸味斂束  
是違其性之所喜也梅實過酸不宜多食齒

痛及病當發散者咸忌之

木瓜實味酸溫無毒主溼痺脚氣霍亂大吐下轉筋不止

疏○木瓜實得春生之氣稟曲直之化故其味酸氣溫性無毒氣薄味厚降多於升陽中陰也入足太陰陽明兼入足厥陰經其主溼痺脚氣者以脾主四肢又主肌肉性惡溼而喜燥溼侵肌肉則爲溼痺傷足絡則成脚氣

木瓜溫能通肌肉之滯酸能斂濡滿之溼則脚氣溼痺自除也霍亂大吐下轉筋不止者脾胃病也夏月暑溼飲食之邪傷於脾胃則揮霍撩亂上吐下瀉甚則肝木乘脾而筋爲之轉也酸溫能和脾胃固虛脫兼之入肝而養筋所以能療肝脾所生之病也藏器治脚氣衝心強筋骨下冷氣止嘔逆大明主吐瀉水腫心腹痛好古治腹脹善噫心下煩痞無

非取其去溼和胃滋脾益肺利筋骨調榮衛  
通行收斂有竝行不悖之功也

主治參互

得白菹豆藿香白茯苓橘皮白梅人參白朮  
甘草砂仁香薷治傷暑霍亂吐瀉不止加入  
石斛雞舌香治轉筋 同當歸石斛牛膝續  
斷芍藥橘皮治血虛轉筋 同意苡仁朮茯  
苓五加皮石斛草薢黃檗治溼熱脚氣 同

人參白茯苓麥門冬藿香白豆蔻竹茹枇杷  
葉治胃虛嘔吐 一味末之白湯吞三錢日  
五服治楊梅結毒有效 入六和湯治暑月  
霍亂 聖惠方治霍亂轉筋木瓜一兩酒一  
升煎服不飲酒者煎湯服仍煎湯浸青布裹  
其足 御藥院方四蒸木瓜丸治肝腎脾三  
經氣虛為風寒暑溼相搏流注經絡凡遇時  
令不和七情怫鬱必至發動或腫滿或頑痺

憎寒壯熱嘔吐自汗霍亂吐利用宣州大木  
瓜四箇切蓋剗空聽用一箇入黃耆續斷末  
各半兩於內一箇入蒼朮橘皮末各半兩於  
內一箇入烏藥黃松節末各半兩於內黃松  
節卽茯神心中木也一箇入歲靈仙苦苧藤  
末各半兩於內以原蓋蓋好拴定用酒浸透  
入甌內蒸熟曬乾再浸蒸如此三度搗末以  
榆皮末水和糊丸如梧子大每服五十丸溫

酒鹽湯任下 醫林集要翻花痔瘡木瓜爲  
末以鱣魚身上涎調貼之以紙護住

簡誤

下部腰膝無力由於精血虛真陰不足者不  
宜用傷食脾胃未虛積滯多者不宜用入藥  
忌犯鐵器

柿味甘寒無毒主通鼻耳氣腸澀不足  
疏○柿稟地中之陰氣以生故味甘氣寒無

毒入手足太陰經鼻者肺之竅也耳者腎之竅也金水二臟最忌火熱二臟有火上炎則外竅閉而不通得甘寒之氣俾火熱下行竅自清利矣肺與大腸爲表裏溼熱傷血分則爲腸澀不足甘能益血寒能除熱臟氣清而腑病亦除也 乾柿寒氣稍減能厚腸胃補不足潤肺止渴功同於前 柿霜清心肺間熱生津止渴化痰寧嗽治喉舌口瘡總之其

功長於清肅上焦火邪兼能益脾開胃故三者所主雖不同而其源皆歸於一義也

### 主治參互

柿霜得桑根白皮百部天麥門冬沙參貝母蘇子枇杷葉橘紅栝樓根作丸噙化治肺經有火咳嗽生痰

### 簡誤

柿性寒肺經無火因客風寒作嗽者忌之冷

痢滑洩腸胃虛脫者忌之脾家素有寒積及感寒腹痛感寒嘔吐者皆不得服不宜與蟹同食令人腹痛作瀉

烏芋味苦甘微寒無毒主消渴痺熱溫中益氣

一名勃臍

疏○烏芋稟土金之氣以生本經味苦甘氣微寒無毒然詳其用味應有辛辛能散苦能泄故主痺熱甘寒能除熱而生津故主消渴

熱去則氣自益氣益則中自溫自然之道也孟詵主下丹石消黃疸除胸中實熱氣汪機主療五種膈氣消宿食治誤吞銅物及今人治腹脹下血等證皆取其辛寒消散除熱之功也

主治參互

烏芋去皮填入雄猪肚內線縫砂器煮糜食之勿入鹽治腹滿脹大善毀銅器中煮

之卽焯 誤吞銅物以烏芋合胡桃食一二斤許卽消 一味曬乾爲末服能辟蠱毒 神秘方大便下血勃臍搗汁大半鍾入酒少許溫服三日見效

簡誤

孟詵云烏芋性冷先有冷氣人不可食多食令人患脚氣又孕婦忌之

枇杷葉味苦平無毒主卒嘔不止下氣

疏○枇杷葉稟天地清寒之氣四時不凋其味苦氣平平卽涼也無毒入手太陰足陽明經氣薄味厚陽中之陰降也經曰諸逆衝上皆屬於火火氣上炎則爲卒嘔不止嘔者噦也其聲濁惡而長經曰樹枯者葉落病深者聲噦病者見此是爲危證枇杷葉性涼善下氣氣下則火不上升而胃自安故卒嘔止也其治嘔吐不止婦人產後口乾男子消渴肺



熱咳嗽喘息氣急脚氣上衝皆取其下氣之  
功氣下則火降痰順而嘔者不嘔渴者不渴  
咳者不咳衝逆者不衝逆矣又治婦人發熱  
咳嗽經事先期佐補陰清熱之藥服之可使  
經期正而受孕

主治參互

同生地黃麥門冬白芍藥炙甘草枸杞子桑  
根白皮童便茅根天門冬蘇子五味子栝樓

根治陰虛咳嗽吐血 入噲化丸治肺熱咳  
嗽 同竹茹木瓜蘆根汁石斛麥門冬人參  
白茯苓治胃熱嘔吐加童便人乳竹瀝蘇子  
白芍藥蔗漿治噎膈反胃 同白芍藥生地  
黃青蒿子五味子黃檗阿膠枸杞子杜仲牡  
丹皮鼈甲作丸治婦人經行先期發熱無孕  
同人參白芍藥茯苓竹茹橘紅蘇子麥門  
冬木瓜治妊娠惡阻 同栝樓根天門冬枸

杞子五味子石斛白芍藥黃連甘草蘆根汁  
童便竹葉治消渴 龐安常方溫病發噦因  
飲水多者枇杷葉去毛炙香茅根各半斤水  
四升煎二升稍稍飲之 聖惠方衄血不止  
枇杷葉去毛焙研末茶服一二錢日二服

簡誤

胃寒嘔吐及肺感風寒咳嗽者法竝忌之

荔枝子味甘平無毒止衄益人顏色

疏○荔枝子南方果也感天之陽氣得地之  
甘味本經雖云平而其氣實溫也鮮時味極  
甘美多津液故能止渴甘溫益血助榮氣故  
能益人顏色也多食令人發熱或衄血齒痛  
者以其生於炎方熟於夏月故善助火發熱  
耳入藥甚稀無主治簡誤

○核味甘溫主心痛小腸氣痛癩疔婦人血氣  
刺痛以一枚煨存性研末酒調服蓋其氣四

而通行入肝腎散滯氣辟寒邪所以能療如上諸證也

主治參互

荔枝核同牛膝補骨脂延胡索合歡子茴香木瓜杜仲橘核草薢治疝氣虛熱者加黃檗虛寒者加桂 孫氏方治疝氣癰腫荔枝核炒黑色大茴香炒等分爲末每服一錢溫酒下 又方腎腫如斗荔枝核青橘皮茴香等

分各炒研酒服二錢日三 除疝氣外無他用故不著簡誤

石蜜 乳糖也味甘寒無毒主心腹熱脹口乾渴性冷利

疏○石蜜乃煎甘蔗汁曝之凝如石而體甚輕今之白沙糖也其味甘其氣寒其用在脾故主心腹熱脹甘寒能除熱生津液故止口乾渴及咳嗽生痰也多食亦能害脾以其味

太甘耳

甘蔗味甘平無毒主下氣和中助脾氣利大腸  
疏○甘蔗稟地中之冲氣故味甘氣平無毒  
日華子云冷氣薄味厚陽中之陰降也入手  
足太陰足陽明經甘爲稼穡之化其味先入  
脾故能助脾氣脾主中州故主和中甘寒除  
熱潤燥故主下氣利大腸也大明爲其消痰  
止渴除心胸煩熱解酒毒今人用以治噎膈

反胃嘔吐大便燥結皆取其除熱生津潤燥  
之功耳

主治參互

蔗漿一味單服能潤大便下燥結 同蘆根  
汁梨汁藕汁人乳童便竹瀝和勻時時飲之  
治胃脘乾枯噎食嘔吐 梅師方反胃吐食  
蔗漿七升薑汁半升和勻日日細呷

簡誤

甘蔗世人皆以其性熱不敢多食不知乃是  
甘寒之物能瀉火熱潤枯燥唐王摩詰櫻桃  
詩云飽食不須愁內熱大官還有蔗漿寒可  
爲證矣惟胃寒嘔吐中滿滑洩者忌之

沙糖味甘寒無毒功用與石蜜同而冷利過之  
疏○沙糖蔗汁之清而煎煉至紫黑色者本  
經雖云與石蜜同功然而不逮石蜜多矣既  
經煎煉之久則未免有溼熱之氣故多食損

齒生蟲發疳脹滿令人心痛等害與鯽魚同  
食成疳蟲與葵同食生流澀與筍同食不消  
成癥身重不能行今醫家用作湯下小兒丸  
散殊爲未當

桃核仁味苦甘平無毒主瘀血閉癥邪氣殺  
小蟲止欬逆上氣消心下堅除卒暴擊血破癥  
瘕通月水止痛

疏○桃核仁稟地二之氣兼得天五之氣以

生故其味苦重甘微氣平無毒思邈言辛孟  
詵言溫皆有之矣氣薄味厚陽中之陰降也  
入手足厥陰經大血者陰也有形者也周流  
乎一身者也一有凝滯則爲癥瘕瘀血血閉  
或婦人月水不通或擊撲傷損積血及心下  
宿血堅痛皆從足厥陰受病以其爲藏血之  
臟也苦能泄滯辛能散結甘溫通行而緩肝  
故主如上等證也心下宿血去則氣自下欬

逆自止桃爲五木之精能鎮辟不祥故主邪  
氣味苦而辛故又能殺小蟲也

主治參互

仲景桃仁承氣湯治傷寒溼熱在內小便利  
而大便黑爲畜血用桃仁五十粒桂枝二兩  
大黃四兩朴硝二兩甘草一兩以水七升煮  
取二升半去滓內芒硝更上火微沸空心溫  
服五合日三當微利 入抵當湯治太陽病

六七日表證仍在脉微而沉反不結胸其人如狂者以熱在下焦少腹當硬滿小便自利下血乃愈用桃仁二十粒水蛭三十箇熬蟲三十箇去翅足熬大黃三兩酒浸以水五升煮取三升溫服一升不下再服 同當歸芍藥澤蘭延胡索蘇木五靈脂紅花牛膝生地黃益母草治產後瘀血結塊作痛并治壯盛婦人經閉不通 同當歸麻仁地黃麥門

冬芍藥黃芩肉蓯蓉甘草治大腸血燥便結不通 同番降香川通草山查穿山甲乳香沒藥紅花續斷當歸治上部內傷瘀血作痛 聖濟總錄大便不快裏急後重用桃仁三兩去皮以吳茱萸二兩食鹽一兩同炒熟去二物每嚼桃仁五七粒效兼可預辟瘴癘 刪煩方婦人難產數日不出桃仁一箇劈開用硃砂書一片可字一片出字吞之卽生

用後方婦人陰癢桃仁杵爛綿裹塞之杏仁亦可用

簡誤

桃仁性善破血凡血結血秘血燥瘀血留血畜血血痛血瘀等證用之立通第散而不收瀉而無補過用之及用之不得其當能使血下不止損傷真陰爲害非細故凡經閉不通由於血枯而不由於瘀滯產後腹痛由於血

虛而不由於留血結塊大便不通由於津液不足而不由於血燥閉結法竝忌之

○桃梟味苦微溫主殺百鬼精物療中惡腹痛殺精魅五毒不祥一名桃奴

疏○桃梟是桃實着樹經冬不落者正月采之桃爲五木之精仙木也最能辟邪今道家禁呪鎮魔之術猶有用桃木者本經以桃梟主殺諸精鬼不祥亦此意耳况着於樹上最



久得氣尤全苦溫之性又能通滯散邪者乎  
治血之功與桃仁同

主治參互

桃梟煨存性同櫻皮灰蒲黃朱砂京墨爲末  
臨臥以童便調服三錢小便解色漸淡爲度  
治內傷吐血神效 同番降香辰砂治鬼擊  
吐血 聖惠方伏梁結氣在心下不散桃奴  
三兩爲末空心溫酒下每服二錢

簡誤同桃仁

杏核仁味甘苦溫冷利有毒主欬逆上氣雷鳴  
喉痺下氣產乳金瘡寒心賁豚驚癇心下煩熱  
風氣去來時行頭痛解肌消心下急殺狗毒

疏○杏核仁稟春溫之氣而兼火土之化以  
生故本經味甘氣溫別錄加苦有毒其言冷  
利者以其性潤利下行之故非真冷也氣薄  
味厚陰中微陽降也入手太陰經太陰爲清

肅之臟邪客之則欬逆上氣火炎乘金則爲  
喉痺杏仁潤利而下行苦溫而散滯則欬逆  
上氣喉痺俱除矣其主心下煩熱者邪熱客  
於心肺之分也風氣去來時行頭痛者肺主  
皮毛風邪自外而入也溫能解肌苦能泄熱  
故仲景麻黃湯中用之亦取其有發散之功  
也主產乳金瘡者亦指爲風寒所乘者言之  
消心下急者以其潤利而下氣也心寒賁豚

者心虛而腎邪凌之也驚癇者痰熱盛也雷  
鳴者大腸不和也總之取其下氣消痰溫散  
甘和苦洩潤利之功也

主治參互

同桑根白皮前胡薄荷桔梗蘇子貝母甘草  
五味子橘紅紫苑治風寒入肺欬嗽生痰  
入麻黃湯治太陽病無汗惡寒喘急 千金  
方欬逆上氣以杏仁三升去皮尖炒黃研膏

入蜜一合杵熟每食前含之嚙汁 梅師方  
食狗肉不消心下堅脹口乾發熱妄語杏仁  
一升去皮尖水三升煎減半取汁分三服效

簡誤

杏仁性溫散肺經風寒滯氣殊效第陰虛欬  
嗽肺家有虛熱熱痰者忌之風寒外邪非壅  
逆肺分喘急息促者不得用產乳金瘡無風  
寒擊襲者不得用驚癩喉痺亦非必須之藥

用者詳之雙仁者能殺人本經言有毒蓋指  
此耳

梨味甘微酸寒多食令人寒中金瘡乳婦尤不  
可食

疏○梨成於秋花實皆白其得西方之陰氣  
者乎味甘微酸氣寒無毒入手太陰兼入足  
陽明經別錄著梨止言其害不叙其功陶隱  
居言梨不入藥蓋古人論病多主於風寒外

邪以溫熱爲補藥多桂附凡冷利之物較而不用也不知時運迭降稟受遞殊今時之人火病熱病痰病往往皆是梨能潤肺消痰降火除熱故蘇恭主熱嗽止渴貼湯火傷治客熱中風不語傷寒寒熱解丹石熱氣驚邪利大小便大明主賊風心煩氣喘熱狂孟詵主胸中痞塞熱結等誠不可闕者也本經言多食令人寒中者以其過於冷利也乳婦金瘡

不可食者以血得寒則凝而成瘀爲病也凡人有痛處脉數無力或發渴此癰疽將成之候惟晝夜食梨可轉重爲輕膏粱之家厚味醞酒縱恣無節必多痰火卒中癰疽之病數食梨可變危爲安功難盡述

主治參互

梨汁同霞天膏竹瀝童便治中風痰熱  
同  
人乳蔗漿蘆根汁童便竹瀝治血液衰少漸

成噎膈 普濟方消渴飲水用香水梨或鵝梨雪梨皆可取汁以蜜和熬成膏瓶收不時白湯調服一二匙 崔元亮海上方卒得咳嗽用上好梨去核搗汁一碗入椒四十粒煎一沸去滓納黑飴一大兩消訖細細含嚥立定 食療本草暗風失音搗梨汁一盞飲之日再服 聖惠方小兒風熱昏憒躁悶不能食用消梨三枚切破以水二升煮取汁一升

入粳米一合煮粥食之 治小兒內熱痰壅喉間吐不出或因驚熱生痰或因風熱生痰取梨汁時時與之加牛黃分許神效 圖經赤目弩肉日夜痛者取好梨一顆搗絞汁以黃連切片一錢浸汁內取汁仰臥點之 聖濟總錄反胃轉食藥物不下用大雪梨一箇以丁香十五粒刺入梨內溼紙包四五重煨熟去丁香食之

簡誤

肺寒欬嗽脾家泄瀉腹痛冷積寒痰飲婦人產後小兒痘後胃冷嘔吐及西北真中風證法咸忌之

橄欖味酸甘溫無毒主消酒療鰩鮓毒

疏○橄欖本經味酸甘今嘗之先澀而後甘得土中之陽氣氣溫無毒肺胃家果也能生津液酒後嚼之不消故主消酒甘能解毒故

療鰩鮓毒也馬志云鰩鮓卽河豚也人誤食此魚肝及子必迷悶至死惟橄欖汁煮服之必解其木作槓撥着魚皆浮出故知物有相畏如此不特味甘解毒之義也

主治參互

食諸魚被鯁用橄欖嚼汁嚥之無橄欖時卽覓核研末急流水調服亦效 手抓碎成瘡用橄欖磨濃汁塗之能滅癩痕 直指方腸

風下血橄欖燒存性研末每服二錢陳米飲  
調下 乾坤生意耳足凍瘡橄欖核燒研油  
調塗之

胡桃味甘平無毒食之令人肥健潤肌黑髮取  
瓢燒令黑末斷煙和松脂研傅瘰癧瘡又和胡  
粉爲泥拔白鬚髮以內孔中其毛皆黑多食利  
小便能脫人眉動風故也去五痔外青皮染髭  
疏○胡桃稟火土之氣以生本經雖云甘平

然其氣多熱而性潤益血脈補命門之藥也  
血不充則消瘦肌膚不澤及鬚髮易白益血  
故令人肥健潤肌黑鬚髮也多食利小便者  
以其能入腎固精令水竅常通也傅瘰癧者  
甘熱能解毒散結去五痔取其潤腸除溼之  
功也能脫人眉者熱極則生風風甚則萬物  
搖落之象也青皮性澀故能染髭

主治參互

一味勿去黃皮空腹食之最能固精 同補  
骨脂蒺藜蓮鬚鹿茸麥門冬巴戟天覆盆子  
山茱萸五味子魚膠益命門種子最效 入  
青娥丸能黑鬚髮補右腎方見補骨脂條  
御藥院方胡桃丸益血補髓強筋壯骨延年  
明目悅心潤肌能除百病用胡桃肉四兩搗  
膏入補骨脂杜仲單薺末各四兩杵勻丸梧  
子大每空心溫酒鹽湯任下五十九 普濟

方產後氣喘胡桃肉人參各二錢水一盞煎  
七分頓服 李樓方誤吞銅錢多食胡桃自  
化出也 聖惠方揩齒烏鬚胡桃仁燒過貝  
母各等分爲散日日用之 聖濟總錄血崩  
不止胡桃肉十五枚燒存性研作一服空心  
溫酒調下神效 子和儒門事親便毒初起  
用胡桃七箇燒研酒服不過三服效 楊試  
經驗方魚口便毒端五日午時取樹上青胡



桃筐內陰乾臨時全燒爲末酒服少行一二  
次有膿自大便出無膿卽消二三服平上二  
方應加全蝎穿山甲尤妙 圖經本草壓撲  
損傷胡桃仁搗和溫酒頓服使瘡

簡誤

胡桃前人多言其有害不可食孫思邈云多  
食動痰飲令人惡心吐水蘇頌云性熱不可  
多食馬志云多食動風脫人眉同酒食多令

人咯血汪穎曰多食生痰動腎火然而近世  
醫方用治痰氣喘嗽和傷補命門潤血脉大  
腸及癘風諸病而酒家往往以之佐酒則多  
食吐水咯血脫眉動火之說亦未盡然也但  
性本熱惟虛寒者宜之如肺家有痰熱命門  
火熾陰虛吐衄等證皆不得施

海松子味甘小溫無毒主骨節風頭眩去死肌  
髮白散水氣潤五藏不飢生新羅

疏○海松子氣味香美甘溫甘溫助陽氣而通經則骨節中風水氣及因風頭眩死肌自除矣氣溫屬陽味甘補血血氣充足則五臟自潤髮白不饑所由來矣仙方服食多餌此物故能延年輕身不老也

龍眼味甘平無毒主五藏邪氣安志厭食除蟲去毒久服強魂聰明輕身不老通神明自木部移入疏○龍眼稟稼穡之化故其味甘氣平無毒

入足太陰手少陰經少陰為君主之官藏神而主血甘能益血補心則君主強神明通五藏邪氣俱除矣甘味補脾脾得補則食自寡而飢心得補則火下降而坎離交故能安志肝藏魂主納血心家血滿則肝有所受而魂強甘能解毒故主去毒久服聰明耳目輕身不老總之補益心脾之驗也至於除蟲非其所能畧之可也

主治參互

同生地黃天麥門冬丹參柏子仁遠志蓮實  
 五味子茯神人參能補心保神益氣強志  
 嚴用和濟生方歸脾湯治思慮過度勞傷心  
 脾健忘怔忡虛煩不眠自汗驚悸用龍眼肉  
 酸棗仁炒黃耆炙白朮焙茯神各一兩木香  
 半兩炙甘草二錢半咬明每服五錢薑三片  
 棗一枚水二鍾煎一鍾溫服

赤爪木實味酸冷無毒汁服主水痢沐頭及洗

身上瘡痒

自木部移入即今  
山查一名棠棣

疏○山查稟木氣而生本經云味酸氣冷然  
 觀其能消食積行瘀血則其氣非冷矣入足  
 陽明太陰經二經有積滯則成下痢產後惡  
 露不盡畜於太陰部分則為兒枕痛山查能  
 入脾胃消積滯散宿血故治水痢及產婦腹  
 中塊痛也大抵其功長於化飲食健脾胃行

結氣消瘀血故小兒產婦宜多食之本經誤認爲冷故有洗瘡癢之用

主治參互

同礬紅黃連紅麴消肉積 同紅麴麥芽橘皮白朮肉豆蔻厚朴砂仁能消食健脾 同牛膝生地黃當歸續斷益母草澤蘭牡丹皮蒲黃芍藥治產後兒枕作痛 衛生易簡方偏墜疝氣山查肉茴香炒各一兩爲末糊丸

梧子大每服一百丸空心白湯下

簡誤

山查性能尅化飲食若胃家無食積及脾虛不能運化不思食者多食之反致尅伐脾胃生氣如脾胃虛兼有積滯者當與補藥同施亦不宜過用也物類相感志云煮老雞硬肉入山查數顆卽易爛其消食尅伐之力彰矣 樞實味甘無毒主五痔去三蟲蠱毒鬼疰

木部

疏○樞實稟土氣以生本經味甘無毒然嘗其味多帶微澀詳其用應是有苦氣應微寒氣薄味厚陰也降也入手太陰陽明經五痔三蟲皆大腸溼熱所致苦寒能瀉溼熱則大腸清寧而二證愈矣其主蠱毒鬼疰者以其甘能解毒而苦寒能滌除腸胃邪惡氣耳

主治參互

孟詵食療治寸白蟲日食樞子七顆滿七日

蟲皆化爲水也 簡便方好食茶葉面黃者

每日食樞子七枚以愈爲度



神農本草經疏卷之二十三



國家圖書館, NATIONAL CENTRAL LIBRARY, TAIWAN, R.O.C.

神農本草經疏卷之二十四

米穀部上品

總七種今疏其要者四種

○ 胡麻

麻子

胡麻油

○ 飴糖

胡麻味甘平無毒主傷中虛羸補五內益氣力  
長肌肉填髓腦堅筋骨療金瘡止痛及傷寒溫  
瘧大吐後虛熱羸困久服輕身不老明耳目耐

饑渴延年一名巨勝

疏○胡麻稟天地之冲氣得稼穡之甘味故味甘氣平無毒入足太陰兼入足厥陰少陰氣味和平不寒不熱益脾胃補肝腎之佳穀也弘景云八穀之中惟此爲良仙家作飯餌之斷穀長生故主傷中虛羸補五內益氣力長肌肉堅筋骨填髓腦及傷寒溫瘧大吐後虛熱羸困久服明目耐饑渴輕身不老延

年也金刃傷血則瘀而作痛甘平益血潤燥故療金瘡止痛也甘華子主補中益氣潤養五臟補肺氣止心驚利大小腸逐風溼氣遊風頭風勞氣產後羸困李廷飛云風病人久服則步履端正語言不蹇陳士良生嚼塗小兒頭瘡煎湯浴惡瘡及婦人陰瘡皆取其甘平益血脉補虛羸入肝脾腎之功耳劉河間云麻木穀而治風又云治風先治血血活則



風去胡麻人肝益血故風藥中不可闕也

主治參互

得何首烏茅山蒼朮白茯苓菖蒲桑葉牛膝  
當歸續斷地黃桑上寄生治風溼痺 同甘  
菊花天門冬黃檗生地黃何首烏栢子仁桑  
葉牛膝枸杞子麥門冬作丸治似中風口眼  
喎斜半身不遂久服不輟有神驗 一味丸  
蒸九曝加茅山蒼朮乳蒸曬二次作丸能健

脾燥溼益氣延年 枹朴子服食胡麻法用

上黨胡麻三斗淘淨蒸令氣透日乾以水淘  
去沫再蒸如此九度去殼炒香爲末白蜜或  
棗膏丸彈子大每溫酒化下一丸日三服忌  
毒魚狗肉生菜菹至百日能除一切痼疾一  
年病色光澤不饑二年白髮還黑三年齒落  
更生久服長生不老矣 外臺秘要解下胎  
毒小兒初生嚼生脂麻綿包與兒啞之其毒

自下 簡便方小兒瘰癧脂麻連翹等分爲末頻頻食之 經驗後方蜘蛛及一切蟲咬傷油麻研爛傅之 三因方穀賊尸咽喉中毒痛癢此因誤吞穀芒戟刺癢痛也用脂麻炒研白湯調下 甘平無毒補益爲用仙家服食所須故不著簡誤

麻子味甘平無毒主補中益氣中風汗出逐水利小便破積血復血脉乳婦產後餘疾長髮可

爲沐藥久服肥健不老神仙

疏○麻子卽大麻仁稟上氣以生木經味甘平無毒然其性最滑利甘能補中中得補則氣自益甘能益血血脉復則積血破乳婦產後餘疾皆除矣風併於衛則衛實而榮虛榮者血也陰也經曰陰弱者汗自出麻仁益血補陰使榮衛調和風邪去而汗自止也逐水利小便者滑利下行引水氣從小便而出也

好古云入手足陽明是太陰經陽明病汗多  
及胃熱便難二者皆燥也用之以通潤經口  
脾欲緩急食甘以緩之麻仁之甘以緩脾潤  
燥故仲景脾約丸用之

主治參互

食醫心鏡麻子仁粥治風水腹大腰膺重痛  
不可轉動用冬麻子半升研碎水濾取汁入  
粳米二合煮稀粥下葱椒鹽豉空心食 仲

景方麻子仁丸治脾約大便秘而小便數麻  
子仁二升芍藥半斤厚朴一尺大黃枳實各  
一斤杏仁一升熬研煉蜜丸梧子大每以漿  
水下十九日三服不知再加 本事方產後  
秘塞許學士云產後汗多則大便必秘難於  
用藥惟麻子粥最穩不惟產後可服凡老人  
諸虛風秘皆妙用大麻子仁紫蘇子各二合  
洗淨研細再水研濾取汁一盞分二次煮

粥啜之。夏子益奇疾方截腸恠病大腸頭  
出寸餘痛苦乾則自落又出名爲截腸病若  
腸盡則不治但初覺截時用器盛脂麻油坐  
浸之飲大麻子汁數升卽愈也

簡誤

陳士良云多食損血脈滑精氣痿陽事婦人  
多食卽發帶疾以其滑利下行走而不守也  
胡麻油微寒利大腸胞衣不落生者摩瘡腫生

禿髮

此卽烏指麻油也功用與白麻油相  
同而力更勝人藥當以烏者爲佳

疏○麻油甘寒而滑利故主胞衣不下及利  
大腸生者氣更寒能解毒涼血故摩瘡腫生  
禿髮也藏器主天行熱悶腸內熱結服一合  
取利爲度孟詵主瘡癰殺五黃下三焦熱毒  
氣通大小腸治虵心痛傳一切惡瘡疥癬殺  
一切蟲日華子煎膏生肌長肉止痛消癰腫  
補皮裂皆取其甘寒滑利除溼潤燥涼血解

毒之功也

主治參互

入血餘一味熬膏鉛丹收好能傳一切瘡毒  
排膿止痛 諸熬膏必用真胡麻油以其涼  
血解毒也惟溼氣膏不用 嶺南解蠱法以  
清油多飲取吐効 衛生易簡方解河豚毒  
一時倉卒無藥以清麻油多灌取吐出毒物  
卽効亦能解砒毒 胎產須知婦人難產因

血枯瀉者用清油半兩好蜜一兩同煎數十  
沸溫服胎滑卽下他藥無益以此助血爲効  
直指方癰疽發背初起卽服此使毒氣不  
內攻以麻油一斤銀石器內煎二十餘沸和  
醇醋二碗分五次一日服盡 百一選方腫  
毒初起麻油煎葱黑色起熱通手旋塗自消  
又方丹石毒發發熱者不得食熱物不得  
用火但着厚衣煖臥取清油一匙含嚥 劉

禹錫傳信方蚰蜒入耳用麻油作煎餅枕臥  
須臾自出

簡誤

麻油生者過寒多食發冷疾及脾胃虛寒作  
瀉者不宜食熬熟治飲食甚美但須逐日熬  
用不可過宿若經宿則火性反復能助熱動  
氣也

飴糖味甘微溫主補虛乏止渴去血

疏○飴糖用麥蘖或穀蘖同諸米漬熬煉而  
成故其味甘氣溫無毒入足太陰亦入手太  
陰經甘入脾而米麥皆養脾胃之物故主補  
虛乏仲景建中湯用之是也肺胃有火則發  
渴火上炎迫血妄行則吐血甘能緩火之標  
則火下降而渴自止血自去也思邈又謂其  
有消痰潤肺止嗽治咽痛吐血等功

主治參互

入建中湯治脾虛腹痛 簡便方誤吞稻芒  
白錫頻食効 千金方服藥過劑悶亂者飴  
糖食之

簡誤

飴糖成於溼熱少用雖能補脾潤肺然而過  
用之則動火生痰凡中滿吐逆酒病牙疳咸  
忌之腎病尤不可服

神農本草經疏卷之二十四

神農本草經疏卷之二十五

米穀部中品

總二十三種今疏其要者十一種

生大豆

赤小豆

酒

粳米

蘗米

即穀芽

小麥

大麥

蘗附

麩

神麩附

菡豆

豉

菡豆

生大豆味甘平塗癰腫煮汁飲殺鬼毒止痛逐



水脹除胃中熱痺傷中淋露下瘀血散五藏結  
積內寒殺烏頭毒久服令人身重炒爲屑味甘  
主胃中熱去腫除痺消穀止腹脹惡五參龍膽  
得前胡杏仁

良牡蠣

疏○生大豆蘇頌云有黑白二種黑者入藥  
白者不用其紫小者爲雄入藥尤佳稟土氣  
以生而色黑則象水故味甘氣平無毒平卽  
兼涼爲腎家之穀也甘平能活血解毒祛風

散熱故主塗癰腫止痛殺鬼毒烏頭毒除胃  
中熱痺傷中淋露下瘀血散五藏結積內寒  
消穀也色黑屬水同氣相求故能逐水腫腹  
脹仙方修治未服之可以辟穀度饑然初服  
時似乎身重一年以後便覺輕健也陳藏器  
炒令黑烟未斷及熱投酒中飲之治風痺癰  
緩口噤產後諸風及風痙陰毒腹痛食罷生  
吞半兩去心胃煩熱熱風孟詵主中風腳弱

產後諸疾同甘草煮湯飲去一切熱毒氣及  
風毒脚氣和桑柴灰煮食下水鼓腹脹搗塗  
一切腫毒日華子主調中氣通關脉制金石  
藥毒解牛馬瘟病皆取其活血散風除熱解  
毒下氣利水之功耳

主治參互

同澤蘭益母草蘇木人參牛膝荆芥生地黃  
童便蒲黃治產後血暈悶絕 同蔓荆子土

茯苓金銀花甘菊花玄參川芎天麻芽茶荆  
芥烏梅治偏頭風痛有神 古方紫湯破血  
去風除氣散熱產後兩日尤宜服之用黑豆  
五升清酒一斗將豆炒令烟絕投酒中待酒  
紫赤色去豆量性飲之神驗中風口噤加雞  
屎白二升和炒投之 廣利方脚氣衝心煩  
悶不識人以大豆一升水三升濃煮汁服未  
定再服 扁鵲方三豆子飲能稀豆見菘豆

條內 大豆殼同蜜蒙花穀精草黃連木賊  
草決明子甘菊花金銀花生地黃羚羊角羊  
肝治小兒痘後目翳

簡誤

生大豆岐伯云生溫熟寒藏器云生平炒食  
極熱煑食極寒觀本經及孟詵云生搗塗腫  
毒則生者非溫矣經又云炒爲屑主胃中熱  
則炒者又非極熱矣應是生平炒溫煑寒無

疑忌猪肉小兒以炒豆猪肉同食必壅氣致  
死十有八九十歲以上則無害也服草麻子  
者忌炒豆犯之脹滿致死服厚朴者亦忌之  
最能動氣故也

赤小豆味甘酸平無毒主下水排癰腫膿血寒  
熱熱中消渴止洩利小便吐逆卒澀下脹滿

疏○赤小豆稟秋燥之氣以生本經味甘酸  
氣平無毒然詳其用味應有辛非辛平則不

能排癰腫膿血及療寒熱熱中消渴也凡水腫脹滿洩瀉皆溼氣傷脾所致小豆健脾燥溼故主下水腫脹滿止洩利小便也十劑云燥可去溼赤小豆之屬是矣吐逆者氣逆上升也卒澀者大腸溼熱也甘酸斂逆氣辛平散溼熱故亦主之

主治參互

陳藏器本草赤小豆和桑根白皮煮食去溼

氣痺腫孟詵食療同鯉魚煮食甚治腳氣金匱要略傷寒狐惑病脉數無熱微煩默默但欲臥汗出初得之三四日日赤如鳩眼七八日日四眦黃黑若能食者膿已成也赤豆當歸散主之赤小豆三升浸令芽出當歸三兩爲末漿水服方寸匕日三服甄權藥性熱毒癰腫赤小豆爲末雞子白調塗蘇頌圖經治腳氣以袋盛此豆置足下朝夕展轉

踐踏之遂愈

簡誤

陶弘景云小豆逐津液利小便久服令人枯燥凡水腫脹滿總屬脾虛當雜補脾胃藥中用之病已卽去勿過劑也其治消渴亦借其能逐胃中熱從小便利去若用之過多則津液竭而渴愈甚不可不戒也

酒味苦甘辛大熱有毒主行藥勢殺百邪惡毒

氣

疏○酒品類極多醇醪不一惟米造者入藥用經云酒者熱穀之液其氣悍弘景云大寒凝海惟酒不冰明其性熱獨冠羣物製藥多用之以藉其勢人飲多則體弊神昏是其有毒故也博物志云昔三人冒霧晨行一人飲酒一人飽食一人空腹空腹者死飽食者病飲酒者健此酒勢辟邪惡毒氣之効勝於他

物也藏器主通血脉厚腸胃潤皮膚消憂發  
怒宣言暢意無非取其橫行經絡走散皮膚  
開發宣通之功耳

主治參互

諸藥可造酒者五加皮女貞實仙靈脾薏苡  
仁天門冬麥門冬地黃菖蒲枸杞子人參何  
首烏甘菊花黃精桑椹木蜜仙茅松節栢葉  
竹葉胡麻磁石蠶沙烏白蛇鹿茸羊羔膾肭

臍黑豆之類各視其所生之病擇其所主之  
藥入麴米如常釀酒法釀成飲或袋盛入酒  
內浸數日飲之 肘後方鬼擊諸病卒然着  
入如刀刺狀胃脇腹內切痛不可抑按或吐  
血鼻血下血以醇酒吹兩鼻內良 又方馬  
氣入瘡或馬汗馬毛入瘡皆致腫痛煩熱入  
腹則殺人多飲醇酒至醉卽愈 千金方三  
十年耳聾酒三升漬牡荊子一升七日去滓

任性飲之 梅師方產後血悶清酒一升和  
生地黃汁煎服

簡誤

王好古曰酒能引諸經不止與附子相同味  
之辛者能散苦者能下甘者能居中而緩用  
爲導引可以通行一身之表至極高之分古  
人惟以麥造麴釀黍已爲辛熱有毒今之醞  
者加以烏頭巴豆桂薑之類大毒大熱之藥

以增其氣味豈不傷冲和損精神涸榮衛竭  
天癸而夭夫人壽耶朱震亨云本草止言酒  
熱而有毒不言溼中發熱近於相火醉後振  
寒戰慄可見矣又性喜升氣必隨之痰鬱於  
上溺瀦於下恣飲寒涼其熱內鬱於肺與大  
腸其始也病淺或嘔吐或瘡疥或鼻齖或泄  
利或心脾痛尚可散而去之其久也病深或  
消渴或內疽或肺癰或鼓脹或喉啞或哮喘

或勞瘵或痔漏爲狀不一非具眼未易處也  
扁鵲云過飲腐腸爛胃潰髓蒸筋生痰動火  
亡精耗血傷神損壽孟詵云軟筋骨動氣痢  
醉臥當風則成癥風醉浴冷水成痛痺陳士  
良云凡服丹砂鍾乳諸石藥竝不可長用酒  
下能引石藥氣入四肢滯血化爲癰疽藏器  
云凡飲酒忌甜物同牛肉食令人生蟲合乳  
飲令人氣結諸如此類不可勝載今人有喜

以火逼極熱恣飲爲快不知酒性旣熱又以  
火濟火鮮有不爲害者曾見一人好飲火酒  
不幾年患一惡證吐膿血瘀肉而斃蓋肺爲  
火熱腐爛也酒能合歡解憂禦寒祛疾自上  
古至今循習爲常用之物然而如上等害不  
可不曉惟在樽節度量寒溫適宜不至沉湎  
荒亂斯得酒中之趣者古人終日飲不及亂  
用此道耳震亨又云醇酒冷飲有三益予謂



三益未必然而傷肺生痰動火損胃之害可  
差免矣

粳米味甘苦平無毒主益氣止煩止洩

疏○粳米卽人所常食米感天地冲和之氣  
同造化生育之功爲五穀之長人相賴以爲  
命者也經曰安穀則昌絕穀則亡仲景曰人  
受氣於水穀以養神水穀盡而神去自上古  
聖人樹藝至今不可一日無此也稟土德之

正其味甘而淡其性平而無毒雖專主脾胃  
而五臟生氣血脉精髓因之以充溢周身筋  
骨肌肉皮膚因之而強健本經益氣止煩止  
洩特其餘事耳

主治參互

入白虎湯治作勞人傷寒發熱虛羸少氣氣  
逆上衝欲吐 少陰病下痢膿血或腹滿下  
如魚腦者桃花湯主之粳米一升赤石脂一

斤一半全一半末乾薑一兩以水七升煮米  
令熟去滓溫服七合內赤石脂末方寸七日  
三服若一服愈餘勿服已上仲景法 聖濟  
方小兒初生無皮色赤但有紅筋乃受胎未  
足也用早白米粉撲之肌膚自生 千金方  
嗜食生米成瘕用白米五合雞屎一升同炒  
焦爲末水一升頓服少時吐出瘕如研米汁  
或白沫淡水乃愈也

蘖米味苦無毒主寒中下氣除熱

疏○蘖米卽稻蘖也味甘氣溫無毒具生化  
之性故爲消食健脾胃開胃和中之要藥脾胃  
和則中自溫氣自下熱自除也

主治參互

澹療方啓脾進食穀神丸用穀蘖四兩爲末  
入薑汁鹽少許和作餅焙乾入炙甘草砂仁  
白朮麩炒各一兩爲末白湯點服或丸服

小麥味甘微寒無毒主除熱止燥渴咽乾利小便養肝氣止漏血唾血以作麩溫消穀止痢以作麵溫不能消熱止煩

疏○小麥稟四時中和之氣故其味甘氣微寒無毒入手少陰經少陰有熱則燥渴咽乾解少陰之熱則燥渴咽乾自止心與小腸爲表裏臟氣清腑病亦自除故利小便肝心爲子母之臟子能令母實故主養肝氣甘寒走

二經而能益血涼血故止漏血唾血也麩性溫所以能消穀止痢麩性熱故不能消熱止煩北方霜雪多地氣厚熱性減凡入藥以北來者爲勝浮麥卽水淘浮起者能止自汗盜汗亦以北方者良古方有用寒食麩者寒食日以紙袋盛麩懸風處數十年亦不壞取其熱性去而無毒也

主治參互

奉親書老人五淋身熱腹滿小麥一升通草  
二兩水三升煮一升飲之良 生生編走氣  
作痛用小麥麩拌醞醋炒熱袋盛熨之 麵  
作蒸餅和藥取其易消也

簡誤

小麥寒氣全在皮故麵去皮則熱熱則壅滯  
動氣發渴助溼令人體浮皆其害也凡大人  
脾胃有溼熱及小兒食積疳脹皆不宜服然

北人以之代飯常御而不爲患者此其地勢  
高燥無溼熱熏蒸之毒故麵性亦溫平能厚  
腸胃強氣力補虛助五臟其功不減於稻粟  
耳東南卑溼春多雨水其溼熱之氣鬱於內  
故食之過多每能發病也夏月瘧痢人尤不  
宜食

大麥味鹹溫微寒無毒主消渴除熱益氣調中  
又云令人多熱爲五穀長 蜜爲之使

疏○大麥功用與小麥相似而其性更平涼滑膩故人以之佐粳米同食或歉歲全食之而益氣補中實五臟厚腸胃之功不亞於粳米矣陳士良云補虛劣壯血脈化穀食止洩瀉不動風氣久食令人肥白滑肌膚爲麵無燥熱勝於小麥蘇恭云平胃止渴消食療脹滿其爲效可知本經末云令人多熱與上文及諸說相背必是誤入也

○麥蘖蘇頌云化宿食破冷氣止心腹脹滿日  
華子溫中下氣開胃止霍亂除煩消痰破癥  
結

疏○麥蘖以水漬大麥而成其味鹹氣溫無毒功用與米蘖相同而此消化之力更緊鹹能軟堅溫主通行其發生之氣又能助胃氣上升行陽道而資健運故主開胃補脾消化水穀及一切結積冷氣脹滿如上所言等證

本草經疏卷二十五  
也。好古曰：麥芽神麴二藥，胃氣虛人宜服之。以代戊巳腐熟水穀。豆蔻縮砂烏梅木瓜芍藥五味子爲之使。

主治參互

麥蘖同山查紅麴橘皮草果砂仁厚朴蒼朮消食積。快膈進食麥芽四兩神麴二兩白朮橘皮各一兩爲末蒸餅丸梧子大每八參湯下三五十九。李絳兵部手集產後腹脹

不通轉氣急坐臥不安以麥蘖一合爲末和酒服良。久通轉神驗。婦人經驗方產後青腫乃血水漬也乾漆大麥蘖等分爲末新瓦中鋪漆一層蘖一層重重令滿鹽泥固濟煨赤研末熱酒調服二錢產後諸疾並宜。丹溪方產後回乳產婦無子食乳乳不消令人發熱惡寒用大麥蘖二兩炒爲末每服五錢白湯下甚良。

簡誤

麥蘖能消導米麴諸菓食積無積滯脾胃虛者不宜用又服消腎氣墮胎

麴味甘大暖療藏腑中風氣調中下氣開胃消宿食主霍亂心膈氣痰逆除煩破癥結補虛去冷氣除腸胃中塞不下食令人有顏色六月作者良神麴使無毒能化水穀宿食癥氣健脾煖胃

疏○古人用麴卽造酒之麴其氣味甘溫性專消導行脾胃滯氣散臟腑風冷故主療如諸家所言也神麴乃後人專造以供藥用力倍於酒麴蓋取諸神聚會之日造之又取各藥物以象六神之用故得神名陳久者良入藥炒令香用六畜食米多脹欲死者煮麴汁灌之立消造神麴法用五月五日或六月六日以白麴百斤青蒿自然汁三升赤小豆

未杏仁泥各三升蒼耳自然汁野蓼自然汁  
各三升以配白虎青龍朱雀玄武勾陳騰蛇  
六神用汁和麵豆杏仁作餅麻葉或楮葉包  
罽如造醬黃法待生黃衣曬乾收之

主治參互

神麴開胃健脾消食止泄同山查麥蘖穀蘖  
縮砂陳皮草果藿香白朮乾葛蓮肉等用効  
百一選方療痞滿暑泄麴朮丸用神麴炒

蒼朮泔製炒等分爲末糊丸梧子大每米飲  
下五十九 和劑局方健胃思食治脾胃俱  
虛不能消化水穀胃膈痞悶腹脇膨脹連年  
累月食減嗜臥口無味神麴六兩麥蘖炒三  
兩乾薑炮四兩烏梅肉焙四兩爲末蜜丸梧  
子大每米飲下五十九日三服 摘玄方食  
積心痛陳神麴一塊燒紅淬酒二大碗服之

簡誤



脾陰虛胃火盛者不宜用能落胎孕婦宜少食

菹豆味甘微溫主和中下氣 葉主霍亂吐下不止

疏○菹豆稟土中冲和之氣其味甘氣香性溫平無毒入足太陰陽明經氣分通利三焦升清降濁故專治中宮之病和中下氣消暑除溼而解毒也孟詵主霍亂吐痢不止及嘔

逆久食頭不白日華子云補五臟蘇頌主女子帶下解酒毒河豚魚毒寇宗奭主霍亂轉筋皆取其益脾開胃和中氣除溼熱之功耳葉氣味相同故亦主霍亂花有紫白二色豆有黑白二種入藥惟紫花豆白者良豆黑色及紫色者名鵲豆不入藥亦不益人

主治參互

白菹豆同山藥白茯苓人參蓮肉薏苡仁芡

實爲補脾胃之上藥中焦有溼者加白朮  
同黃連乾葛白芍藥升麻紅麴滑石烏梅橘  
紅甘草蓮肉治滯下如神 同麥門冬五味  
子黃連乾葛能解酒毒 同木瓜石斛橘皮  
藿香茯苓縮砂香薷治霍亂吐瀉轉筋 入  
十味香薷飲能消暑氣健脾 奇効良方血  
崩不止白扁豆花焙乾爲末每服二錢空心  
炒米煑飲入鹽少許調下卽効 治霍亂秘

法用白扁豆葉一葉同白梅一枚并仁研爛  
新汲水調服神効 蘇恭治吐利後轉筋用  
白扁豆葉一把搗入醋少許絞汁服立瘥

簡誤

弘景云患寒熱者不可食蓋指傷寒寒熱外  
邪方熾不可用此補益之物耳如脾胃虛及  
傷食勞倦發寒熱者不忌  
豉味苦寒無毒主傷寒頭痛寒熱瘴氣惡毒煩

躁滿悶虛勞喘吸兩腳疼冷

疏○豉諸豆皆可爲之惟黑豆者入藥有鹽淡二種惟江右淡者治病經云味苦寒無毒然詳其用氣應微溫蓋黑豆性本寒得蒸曬之氣必溫非苦溫則不能發汗開腠理治傷寒頭痛寒熱及瘴氣惡毒也苦以湧吐故能治煩躁滿悶以熱鬱胸中非宣劑無以除之如傷寒短氣煩躁胸中懊懣饑不欲食虛煩

不得眠者用梔子豉湯吐之是也又能下氣調中辟寒故主虛勞喘吸及兩腳疼冷

主治參互

肘後方云傷寒有數種庸人卒不能分別者今取一藥兼療之凡初覺頭痛身熱脈洪一二日以葱豉湯治之用葱白一虎口豉一升綿裹水三升煮一升頓服取汗仲景梔子豉湯治傷寒汗下後虛煩用梔子十四枚香

豉四合綿裹以水四升先煮梔子得二升半  
內豉煮取一升半去滓分二服溫進一服得  
吐止後服 又枳實梔子豉湯治大病瘥後  
勞復用枳實三枚梔子十四枚豉一升以清  
漿水七升空煮取四升內枳實梔子取二升  
下豉更煮五六沸去滓分溫再服令微似汗  
傷寒之邪自外入勞復之邪自內發發汗吐  
下當隨宜施治也治傷寒食早成食復前湯

中加大黃如博碁子大五枚 梅師方辟除  
溫疫豉和白朮浸酒常服之 甄權方傷寒  
暴痢腹痛者豉一升薤白一握切以水三升  
先煮薤內豉更煮湯色黑去豉分二服不瘥  
更服亦治血痢 孟詵治久患盜汗以豉一  
升熬令香清酒三升漬滿三日取汁冷煖任  
服不瘥更作二劑卽止 簡要濟衆方傷寒  
後餘毒攻手足及身體虛腫用豉五合微炒

本草綱目卷之二十一  
以酒一升半同煎五七沸任性飲之 千金  
方蠮螋尿瘡杵豉傅之良 衛生易簡方中  
牛馬毒豉汁和人乳頻服之効 千金方中  
酒成病豉葱白各半升水二升煮一升頓服  
又方服藥過劑悶亂者豉汁飲之 肘後  
方腫從脚起豉汁飲之以滓傅之 弘景云  
春夏之氣不和以豉蒸炒酒漬服之至佳

簡誤

凡傷寒傳入陰經與夫直中三陰者皆不宜  
用熱結胸中煩悶不安者此欲成結胸法當  
下不宜復用汗吐之藥并宜忌之

菉豆味甘寒無毒主丹毒煩熱風癩藥石發動  
熱氣奔弛生研絞汁服亦煮食消腫下氣壓熱  
解石用之勿去皮令人小壅

疏○菉豆稟土中之陰氣故其味甘氣寒無  
毒入足陽明經夫丹石之藥氣悍而性熱多

服則火動上升爲煩熱甚則口鼻出血狂悶  
躁擾甘寒能除熱下氣解毒故主服丹石藥  
人毒發煩熱也陽明客熱則發出風癩以胃  
主肌肉熱極生風故也解陽明之熱則風癩  
自除脹滿者溼熱侵於脾胃也熱氣奔弛者  
溼熱客於腎經也除溼則腫消壓熱則氣下  
益脾胃而腎邪亦自平也孫思邈主寒熱熱  
中止泄痢卒澀利小便脹滿日華子主厚腸

胃作枕明目治頭風頭痛益氣除熱毒風孟  
詵主去浮風益氣力治消渴和五臟安精神  
可常食之功效不可備述

主治參互

扁鵲三豆飲治天行痘瘡服此飲疎解熱  
毒縱出亦少用菉豆赤小豆大豆各一升甘  
草節二兩以水八升煮極熟任意吞豆飲汁  
七日乃止 醫學正傳痘後癰毒初起以三

豆膏治之神効菘豆赤小豆黑豆等分爲末醋調時時掃塗卽薄全幼心鑑小兒丹腫菜豆五錢大黃二錢爲末用生薄荷汁入蜜調塗中砒毒者研汁飲之

簡誤

脾胃虛寒滑泄者忌之

神農本草經疏卷之二十五

神農本草經疏卷之二十六

米穀部下品

總一十八種今疏其要者三種

醋

稻米

醬

醋味酸溫無毒主消癰腫散水氣殺邪毒

一名苦酒

疏○醋惟米造者入藥得溫熱之氣故從木

化其味酸氣溫無毒酸入肝肝主血血逆熱

壅則生癰腫酸能斂壅熱溫能行逆血故主



消癰腫其治產後血暈癥塊血積亦此意耳  
散水氣者水性泛濫得收斂而寧謐也殺邪  
毒者酸苦湧瀉能吐出一切邪氣毒物也日  
華子主下氣除煩婦人心痛血氣并產後及  
傷損金瘡出血迷悶殺一切魚肉菜毒取其  
酸收而又有散瘀解毒之功也故外科傳藥  
中多資用

主治參見

仲景方少陰病脈微細但欲寐咽中傷生瘡  
不能言語聲不出者苦酒湯主之用半夏十  
四枚雞子一枚去黃以苦酒半復着雞子殼  
中置刀環中安火上令三沸去滓少少含嚥  
之不差更作三劑 仲景金匱方黃耆芍藥  
苦酒湯治黃汗汗出沾衣正黃如藥汁因汗  
出時入水中浴水從汗孔入得之用黃耆五  
兩芍藥三兩桂枝三兩以苦酒一斗水七升

相和煮取三升溫服一升當心煩服至六七  
日乃解 衍義云產婦房中常以火炭沃醋  
氣爲佳酸氣能斂血使下也 孟詵食療青  
木香以醋磨汁服止卒心痛 浸黃檗含之  
治口瘡 千金方身體卒腫醋和蚯蚓屎傅  
之 又方舌腫不消以酢和釜底墨厚傅舌  
之上下脫則更傅須臾卽消 又方湯火傷  
灼卽以酸酢淋洗并以酢泥塗之良亦無瘢  
痕喉痺咽痛以醃醋探吐之

簡誤

經曰酸走筋筋病毋多食酸凡筋攣偏痺手  
足屈伸不便皆忌之又曰味過於酸肝氣以  
津脾氣乃絕多食酸則肉皺而脣揭言能助  
肝賊脾凡脾病者亦不宜過食

稻米味苦主溫中令人多熱大便堅  
疏○稻米卽今之糯米也稟土中之陽氣其

味應甘氣應溫無毒造酒必用之者以其性  
近於熱也爲補脾胃益肺氣之穀脾胃得補  
則中自溫大便亦堅實溫能養氣氣充則身  
自多熱大抵脾肺虛寒者宜之爲其能益氣  
溫中也故又有止泄利縮小便收自汗發痘  
瘡等用

主治參互

松篁經驗方久洩食減以糯米一升水浸一

宿瀝乾炒熟磨篩入懷山藥一兩每日清晨  
用半盞入白砂糖二匙胡椒末少許以滾湯  
調食大有滋補久服更能令人精暖有子  
醫方大成顛犬咬傷糯米一合斑貓七枚同  
炒熬黃去之再入七枚再炒黃去之又入七  
枚待米出烟去貓爲末水調服之小便利下  
佳亦可油調外傳 又方虛勞不足糯米入  
猪肚內蒸熟日食

簡誤

糯米孟詵云發風動氣久食令人多睡藏器云久食令人身軟妊婦雜肉食之令子不利蕭炳云擁諸經絡氣使四肢不收發風昏昏陳士良云久食發心悸及癰疽瘡癩中痛合酒食之醉難醒然愚意觀之其爲害未必如此之甚蓋天生五穀以食人皆稟土中冲和之氣可常御而無害者第糯米氣溫性黏滯

惟不利於上焦有痰熱及脾病不能轉運小兒難於尅化者餘皆無害諸家之言不可盡信也

醬味鹹酸冷利主除熱止煩滿殺百藥熱湯及火毒

疏○按醬之品不一惟豆醬陳久者入藥其味鹹酸冷利故主除熱止煩滿及湯火傷毒也能殺一切魚肉菜蔬葷毒本經云殺百藥

毒者誤也聖人不得其醬不食朱子云食肉用醬各有所宜玩一宜字則不宜者必有傷害於人非特悅口而已如食蟹用橙醬或薑醬煮魚用茱萸醬取其能殺毒之義耳又有榆仁醬味辛美殺諸蟲利大小便心腹惡氣蕪荑醬主療相同茱萸醬作法不用麵豆鹽只以河水量茱萸多少稍稍加石灰摻入拌勻甕藏殺一切角腥毒用時洗去石灰搗爛

烹水族入之良

神農本草經疏

十六

卷六



國家圖書館, NATIONAL CENTRAL LIBRARY, TAIWAN, R.O.C.

神農本草經疏卷之二十七

菜部上品

總三十種今疏其要者八種

胡荽

瓜蒂

白冬瓜

白芥

芥

萊菔

苦菜

苜蓿

胡荽味辛溫

一云微寒

微毒消穀治五藏補不足利

大小腸通小腹氣拔四腴熱止頭痛療沙瘰



豆瘡不出作酒飲之立出通心竅

疏○胡荽稟金氣多火氣少故味辛香氣溫  
微毒入足太陰陽明經辛香走竄而入脾故  
主消穀利大小腸通少腹氣脾胃爲邪熱所  
干則頭痛四肢熱辛溫發散二經之邪則頭  
痛四肢熱自拔沙癩痘瘡出不快者外爲風  
寒所侵或穢氣所觸也辛溫祛風寒香竄辟  
穢氣則腠理通暢而痧癩痘瘡皆出矣通心

竅治五臟補不足者總言其辛香內通心脾  
外達腸胃除一切不正之氣則真氣安和斯  
有補益之道耳  
子亦能發痘癩殺魚腥

主治參互

經驗後方癩痘出不快用胡荽二兩切以酒  
二大盞煎沸沃之以物蓋定勿令洩氣候冷  
去滓微微含噴從項背至足令遍勿噴頭面  
子母祕錄肛門脫出胡荽一升切燒烟熏



之卽入 外臺祕要牙齒疼痛胡荽子五升  
水五升煮取一升含嗽

簡誤

胡荽辛香發散氣虛人不宜食癩痘出不快  
非風寒外侵及穢惡之氣觸犯者不宜用孟  
詵云多食損人精神華陀云胡臭口臭墜齒  
脚氣皆不可食今病加甚陳藏器云久食令  
人多忘發腋臭根發痼疾凡服一切補藥及

藥中有白木牡丹者咸忌之

瓜蒂味苦寒有毒主大水身面四肢浮腫下水  
殺蠱毒欬逆上氣及食諸果病在胸腹中皆吐  
下之去鼻中息肉療黃疸

疏○瓜蒂感時令之火熱稟地中之伏陰故  
其味苦氣寒有小毒氣薄味厚浮而升陰多  
於陽酸苦湧泄爲陰故也入手太陰足陽明  
足太陰經其主大水身面四肢浮腫黃疸者

皆脾胃虛水氣溼熱乘虛而客之也苦以湧  
泄使水溼之氣外散故能主之經曰在高者  
因而越之病在胸膈則氣不得歸元而爲欬  
逆上氣吐出胸中之邪則氣自順欬逆止矣  
殺蠱毒者亦取吐出之義去鼻中息肉者以  
其苦寒能除肺家之熱也日華子治腦塞熱  
艷眼昏吐痰好古得麝香細辛治鼻不聞香  
臭及吐風熱痰涎風眩頭痛癩癩喉痺頭面

有溼氣傷寒客水胸中傷食脹滿下部無脉  
等證皆借其宣發湧泄引涎追淚之功耳

主治參互

仲景傷寒論病如桂枝證頭不痛項不強寸  
脉微浮胸中痞鞭氣上衝咽喉不得息者此  
胸中有寒也當吐之宜瓜蒂散用瓜蒂赤小  
豆等分爲散取一錢以香豉一合用熱湯七  
合煮作稀糜去滓取汁和散頓服之不吐少

少加得快吐乃止 溼家病身上疼痛發熱  
面黃而喘頭痛鼻塞而煩其脉大自能飲食  
腹中和無病病在頭中寒溼故鼻塞內藥鼻  
中則愈瓜蒂散主之 太陽中暍身熱疼重  
而脉微弱此因夏月傷冷水水行皮中所致  
宜吐之瓜蒂散 病胸上諸實胸中鬱鬱而  
痛不能食欲使人按之而反有涎唾下利日  
十餘行其脉反微寸口脉微滑此可吐之吐

之則利自止 宿食在上脘者當吐之 病  
人手足厥冷脈乍結以客氣在胸中心下滿  
而煩欲食不能食者當吐之 懊憹煩躁不  
得眠未經汗下者謂之實煩當吐之已上悉  
用瓜蒂散皆仲景法 東垣曰難經云上部  
有脉下部無脉其人當吐不吐者死此飲食  
內傷填塞胸中食傷太陰則風木生發之氣  
伏于下宜瓜蒂散吐之內經所謂木鬱達之

也吐去上焦有形之物則木得舒暢天地交  
而萬物通矣諸血家不可與瓜蒂散 寇  
氏衍義風涎暴作氣塞倒仆用瓜蒂末二錢  
膩粉乙錢七以水半合調灌良久涎自出不  
出含沙糖一塊下咽卽涎出也 千金翼熱  
病發黃瓜蒂爲末以大豆許吹鼻中取出黃  
水乃愈 孟詵食療陰黃黃疸取瓜蒂丁香  
赤小豆各七枚爲末吹豆許鼻中少時黃水

流出隔一日用瘡乃止并治身面浮腫 活  
人書溼家頭痛瓜蒂末一字嚙入鼻中口含  
冷水取出黃水愈 聖惠方鼻中息肉瓜蒂  
末白礬末各半錢綿裹塞之或以豬脂和挺  
子塞之日一換

簡誤

瓜蒂極苦而性上湧能損胃傷血耗氣損神  
凡胸中無寒胃家無食皮中無水頭面無溼

及胃虛氣弱諸凶血諸產后似中風倒仆心  
虛有熱癩癩女勞穀疸元氣尪羸脾虛浮腫  
切勿誤用誤用則爲害非細傷生不淺戒之  
慎之

白冬瓜味甘微寒主除小腹水脹利小便止渴  
疏○白冬瓜內稟陰土之氣外受霜露之侵  
故其味甘氣微寒而性冷利無毒水屬陰瓜  
性亦屬陰氣類相從故能利小便除小腹水

脹也甘寒解胃中之熱故又能止渴也弘景  
止消渴煩悶解毒孟詵益氣耐老除心胸滿  
去頭面熱大眵消熱毒癰腫切片摩癩子蘇  
頌利大小腸壓丹石毒皆得其旨者也

主治參互

孟詵食療積熱消渴白冬瓜去皮每食後嚼  
二三兩五七度良 古今錄驗產後痢渴久  
病津液枯竭四肢浮腫口舌乾燥用冬瓜一

枚黃土泥厚五寸煨熟絞汁飲良亦治傷寒  
痢渴 楊氏家藏方十種水氣浮腫喘滿用  
大冬瓜一枚切蓋去瓢以赤小豆填滿蓋合  
簽定以紙筋泥固濟日乾用糯糠兩大籬入  
瓜在內煨至火盡取出切片同赤豆焙乾爲  
末水糊丸梧子大每服七十九煎冬瓜子湯  
下日三服小便利爲度 冬瓜仁味甘寒能  
開胃醒脾同橘紅石斛竹茹枇杷葉白芍藥

蘆根汁人參白茯苓治胃虛嘔吐 同人參  
茯苓竹瀝白茯苓黃耆甘草白芍藥酸棗仁  
治小兒慢脾風

簡誤

冬瓜性冷利凡臟腑有熱者宜之若虛寒腎  
冷久病滑洩者不得食未經霜者不宜多食  
九月後食之乃佳

白芥味辛溫無毒主冷氣色白甚辛美 子主

射工及疰氣上氣發汗胸膈痰冷面黃

疏○芥稟火金之氣以生而白芥則又得金氣之勝故味辛氣溫無毒辛溫入肺而發散故有溫中除冷發汗辟邪豁痰利氣之功朱震亨云痰在脇下及皮裏膜外非白芥子莫能達古方控涎丹用之正此義爾

主治參互

韓悉醫通云凡老人苦于痰氣喘嗽胸滿懶

食不可妄投燥利之藥反耗真氣因有人求治其親遂制三子養親湯治之隨試隨效用白芥子紫蘇子白萊菔子各微炒研破看所主爲君每劑不過三四錢用絹袋盛入湯煮飲之勿煎大過則味苦辣若大便素實者入蜜一匙冬月加薑一片 蘇恭主疰氣發無常處及射工毒以芥子丸服之或搗末醋和塗之隨手有驗

簡誤

白芥子味極辛氣溫能搜剔內外痰結及胸膈寒痰冷涎壅塞者殊効然而肺經有熱與夫陰火虛炎咳嗽生痰者法在所忌其莖葉煇食動風動氣有瘡瘍痔疾便血者咸忌之芥味辛溫無毒歸鼻主除腎邪氣利九竅明耳目安中久食溫中

疏○芥所稟與白芥同今人以醋椒同芥心

作辣齧食之則腦額酸楚淚涕俱出卽歸鼻利竅明耳目之驗也辛溫能利氣消痰開胃辟寒故主安中及久食溫中也其主除腎邪氣者辛能潤腎溫能煖水臟故也子功用與白芥子相同力稍不逮

主治參互

治肺癰用百年芥菜鹵久窳地中者飲數匙立効其義以芥菜辛溫得鹽水久窳之氣變



爲辛寒辛寒能散痰熱芥菜主通肺氣所以  
治肺癰真良法也

簡誤

與白芥子同其主利九竅明耳目者蓋言辛  
散走竄豁痰引涎暫用一時使邪去而正自  
復非謂其真能利竅明耳目也用者詳之

萊菔音菔根味辛甘溫無毒散服及炮煮服食大  
下氣消穀去痰癖肥健人生搗汁服主消渴試

大有驗

疏○萊菔根稟土金之氣以生本經味辛甘  
氣溫無毒孟詵云性冷大明云平詳其功用  
應是生者味辛性冷熟者味甘溫平故本經  
下氣消穀去痰癖肥健人及溫中補不足寬  
胸膈利大小便化痰消導者煮熟之用也止  
消渴制麵毒行風氣去邪熱氣治肺痿吐血  
肺熱痰嗽下痢者生食之用也大抵入手足

太陰手足陽明經故所主皆脾肺腸胃之病  
子味辛過于根生研汁服吐風痰同醋研  
消腫毒炒熟下氣定喘消食除脹止氣痛以  
其性辛甚故升降之功亦烈于根也朱震亨  
云萊菔子治痰有推牆倒壁之功是矣

主治參互

醫學集成齁喘痰促遇厚味卽發者用荀子  
淘淨蒸熟晒研薑汁浸蒸餅丸菘豆大每服

三十九丸以口津嚥下日三服 治年遠脾泄

百藥不効單煮白菜菔終日啖之不輟必差

簡誤

萊菔根葉皆可食生熟皆宜乃蔬中之至賤  
而能止渴充飢者歉歲農人種之最有利益  
但性專下氣復能耗血故多食則鬚髮早白  
服地黃何首烏者不可食子消痰下氣更速  
凡虛弱人忌之

苦菜味苦寒無毒主五藏邪氣厭也伏穀胃痺腸澀渴熱中疾惡瘡久服安心益氣聰察少臥輕身耐老耐饑寒高氣不老

疏○苦菜與苦苣苦蕒一物而形稍異功用則相同也稟天地之陰氣故其味苦氣寒無毒入心脾胃三經其主五臟邪氣者邪熱客于心也胃痺渴熱中疾者熱在胃也腸澀者熱在大腸也惡瘡者熱瘀傷血肉也苦寒總

除諸熱故主之也熱去則神自清故久服安心益氣聰察少臥也輕身耐老耐飢寒高氣不老者總言其熱退陰生安心益氣之極功也

主治參互

寇宗奭衍義治疔瘡以苦苣搗汁傅之殊驗青苗葉陰乾以備冬月霜用爲末水調傅之唐瑤經驗方對口惡瘡野苦苣搗汁一鍾

入姜汁一匙和酒服以渣傳一二次卽愈  
肘後方中沙虱毒沙虱在水中人澡浴則着  
人身鑽入皮裏初得皮上正赤如小豆黍粟  
摩之痛如刺三日後發寒熱發瘡毒若入骨  
殺人嶺南多此卽以茅葉刮去以苦菜汁塗  
之作

簡誤

脾胃虛寒者忌之

苜蓿味苦平無毒主安中利人可久食

疏○苜蓿草也嫩時可食處處田野中有之  
陝隴人亦有種者木經云苦平無毒主安中  
利人可久食然性頗涼多食動冷氣不益人  
根苦寒主熱病煩滿目黃赤小便黃酒疸搗  
汁一升服令人吐利卽愈其性苦寒大能泄  
溼熱故耳以其葉煎汁多服專治酒疸大効



國家圖書館, NATIONAL CENTRAL LIBRARY, TAIWAN, R.O.C.

神農本草經疏卷之二十八

菜部中品

總一十三種今疏其要者六種移四種入

草部中品

葱白

韭菜

葱白辛平可作湯主傷寒寒熱出汗中風面目  
腫傷寒骨肉痛喉痺不通安胎歸目除肝邪氣  
安中利五藏益目睛殺百藥毒 葱實味辛溫

無毒主明目補中不足 葱根主傷寒頭痛

葱汁平溫主溺血解藜蘆毒

弘景云葱有寒熱白冷青熱傷寒湯

中不用青也

疏○葱稟天之陽氣得地之金味中空象肺其味辛平平即涼也而性無毒氣厚味薄升也陽也入手太陰足厥陰足陽明經辛能發散能解肌能通上下陽氣故外來怫鬱諸證悉皆主之傷寒寒熱邪氣并也中風面目腫

風熱鬱也傷寒骨肉痛邪始中也喉痺不通君相二火上乘于肺也辛涼發散得汗則火自散而喉痺通也肝開竅于目散肝中邪熱故云歸目除肝邪氣邪氣散則正氣通血自和調而有安胎安中利五藏之功矣其曰益目睛殺百藥毒者則是辛潤利竅而兼解散通氣之力也

主治參互

活人書治傷寒頭痛如破連鬚葱白半斤生薑二兩水煎溫服 濟生秘覽時疾頭痛發熱者以連根葱白二十根和米煮粥入醋少許熱食取汗卽解數種傷寒一二日初起不能分別者亦用之取汗 風溼身痛用生葱搗爛入香油數點水煎調川芎鬱金末一錢服取吐 楊氏產乳六月孕動困篤難救者葱白一大握水三升煎一升去滓頓服 深

師方胎動下血病痛捨心用葱白煮濃汁飲之未死卽安已死卽出未効再服一方加川芎 陰毒腹痛厥逆唇青卵縮六脉欲絕者用葱一束去根及青畱白二寸烘熱安臍上以熨斗火熨之葱壞則易良久熱氣透入手足溫有汗卽瘥乃服四逆湯若熨而手足不溫不可治 華陀救卒病方脫陽危證凡人

大吐大泄之後四肢厥冷不省人事或與女



子交後少腹堅痛外腎搐縮冷汗出厥逆須  
臆不救先以葱白炒熱熨臍後以葱白三七  
莖搗爛用酒煮灌之陽氣卽回加人參爲要  
本事方小便閉脹不治殺人葱白三斤剉  
炒帕盛二個更互熨小腹氣透卽通 劉禹  
錫傳信方打撲損見血取葱新折者塘火煨  
熱剥皮其間有涕便將菴損處仍多煨續續  
易熱者立愈 張氏經驗方金瘡折傷出血

用葱白連葉煨熱或鍋烙炒熱搗爛傅之冷  
卽再易神驗

簡誤

病人表虛易汗者勿食病已得汗勿再進  
韭味辛微酸溫無毒歸心安五藏除胃中熱利  
病人可久食

疏○韭稟春初之氣而生兼得金水木之  
性故其味辛微酸氣溫而無毒生則辛而行

血熱則甘而補中益肝散滯導瘀是其性也  
以其微酸故入肝而主血分辛溫能散結凡  
血之凝滯者皆能行之是血中行氣藥也心  
主血專理血分故曰歸心五藏之結滯去則  
氣血條暢而自安矣胃中熱乃胃中有瘀滯  
而發熱也瘀血行熱自除矣病人之氣抑鬱  
者多凡人氣血惟利通和韭性行而能補故  
可久食 韭子味辛甘溫無毒主夢中洩精

溺血蓋韭乃入足厥陰少陰經腎主閉藏肝  
主疎洩素問云足厥陰病則遺尿思想無窮  
入房太甚發爲筋痿及爲白淫韭子入厥陰  
而甘溫補肝及命門之不足故主洩精溺血  
主治參互

有一貧叟病噎膈食入卽吐胸中刺痛或令  
取韭汁入鹽梅鹵汁少許細呷得入漸加忽  
吐稠涎數升而愈此亦仲景治胸痺痛用薤

白皆取辛溫能散胃脘痰飲惡血之義也  
一人臘月飲酒三盃自後食必屈曲下膈硬  
瀉微痛右脉甚瀉關脉沉此汚血在胃脘之  
口氣因鬱而成痰隘塞食道也以韭汁半盞  
細細冷呷盡半斤而愈 食療本草胸痺急  
痛如錐刺不得俛仰自汗出或徹背上不治  
或至死取生韭及根五斤洗搗汁服之瘥  
金匱要略風忤邪惡韭根一把烏梅十四個

吳茱萸炒半升水一斗煮之仍以病人櫛內  
入煮三沸櫛浮者生沉者死煮至三升分三  
服 千金方刺傷中水腫痛煮韭熱搗之

簡誤

韭性辛溫通利雖曰補益然多食能令人神  
昏最爲養性所忌胃氣虛而有熱者勿服韭  
黃未出于土者勿服食之滯氣以其氣尚抑  
鬱未申故也花食之亦動風

料



國家圖書館, NATIONAL CENTRAL LIBRARY, TAIWAN, R.O.C.

六

神農本草經疏卷之二十九

菜部下品

總二十二種今疏其要者四種

葫

馬齒莧

茄子

根附

蕺

葫也味辛溫有毒主散癰腫蠱瘡除風邪殺毒

氣獨子者亦佳歸五藏久食傷人損目明

疏○葫大蒜也稟火金之氣以生故其味辛

氣溫辛溫太甚故其性有毒熏臭異常不宜多食入足陽明太陰厥陰經辛溫能辟惡散邪故主除風邪殺毒氣及外治散癰腫蠱瘡也辛溫走竅無處不到故主歸五藏脾胃之氣最喜芳香熏臭損神耗氣故久食則傷人肝開竅於目目得血而能視辛溫太過則血耗而目損矣總之其功長於通達走竅去寒溼辟邪惡散癰腫化積聚煖脾胃行諸氣故

蘇恭主下氣消穀化肉藏器主風溼破冷氣爛疔瘰伏邪惡宣通溫補日華子主健脾胃治腎氣止霍亂轉筋腹痛除邪祟解溫疫等用也

### 主治參互

外臺秘要關格脹滿大小便不通獨頭蒜燒熟去皮綿裹納下部氣立通 又方治金瘡中風角弓反張取蒜一大升破去心無灰酒

四升煮令極爛并滓服一大升須臾得汗則  
瘥 簡要濟衆治鼻血不止服藥不應用蒜  
一枚去皮細研如泥攤一餅子如錢大厚一  
豆許左鼻血出貼左腳心右鼻血出貼右腳  
心兩鼻俱出皆貼之立瘥血止急以溫水洗  
腳心 外科精要背瘡灸法凡覺背上腫硬  
疼痛以溼紙貼尋瘡頭用大蒜十顆淡豆豉  
半合乳香一錢細研勻隨瘡頭大小用竹片

作圈圈定填藥於內二分厚著艾灸之痛灸  
至痒痒灸至痛以百壯爲率效 永類鈴方  
乾溼霍亂轉筋用大蒜搗塗足心立愈 普  
濟方寒瘧冷痢端午日以獨頭蒜十箇黃丹  
二錢搗丸梧子大每服九丸長流水下妙  
衍義暴下血病用葫五七枚去皮研膏入豆  
豉搗丸梧子大每米飲下五六十九無不愈  
者 華佗行道見車載一人病咽塞食不下

呻吟佗視曰餅店家蒜薤大酢三升飲之當  
自痊果吐大蛇一枚而愈

簡誤

蒜性溫屬火氣味臭烈凡肺胃有熱肝腎有  
火氣虛血弱之人切勿沾唇雖有煖脾胃祛  
寒溼之功亦宜暫用切勿過施過則生痰動  
火傷神散氣損目耗血切戒切戒

馬齒莧主目盲白翳利大小便去寒熱殺諸蟲  
止渴破癥結癰瘡服之長年不白和梳垢封疔  
腫又燒爲灰和多年醋滓先灸疔腫以封之卽  
根出生搗絞汁服當下惡物去白蟲煎爲膏塗  
白禿又主三十六種風結瘡以一釜煮澄清內  
蠟三兩重煎成膏塗瘡上亦服之

疏○馬齒莧稟天之陰寒兼得地中之金氣  
以生故葉節間有水銀以其得金氣多也味  
應辛苦氣寒無毒經云榮氣不從逆於肉裏



乃生癰腫原病式云諸痛痒瘡瘍皆屬心火  
辛寒能涼血散熱故主癥結癰瘡疔腫白禿  
及三十六種風結瘡搗敷則腫散疔根拔絞  
汁服則惡物當下內外施之皆得也辛寒通  
利故寒熱去大小便利也苦能殺蟲寒能除  
熱故主殺諸蟲去寸白止渴辛寒能散肺家  
之熱故主目盲白翳也長年不白總言其涼  
血益血病去身輕之功耳方士多采取用以

其亦有代砂結汞之能也

### 主治參互

崔元亮治赤白下不問老幼孕婦悉可服取  
馬齒莧搗絞汁三大合和雞子白一枚微溫  
頓服之不過再作則愈 又方療多年惡瘡  
百方不瘥或痛熾走不已者竝爛搗馬齒莧  
敷上不過三兩遍即愈 廣利方小兒火丹  
熱如火遠臍即損人馬齒莧搗塗之 崔元

亮方疔瘡腫毒馬齒莧二分石灰三分爲末  
雞子白和傅之

簡誤

馬齒莧辛寒滑利凡脾胃虛寒腸滑作泄者  
勿用煎餌方中不得與鼈甲同入令化作小  
鼈傷人也

茄子味甘寒久冷人不可食損人動氣發瘡  
及痼疾 根及枯莖葉主凍脚瘡可煮作湯漬

之良

疏○茄內稟地中一陰之氣外受南方熱火  
之陽故其花實皆紫本經雖云甘寒必是溼  
中有火使非溼熱則不能動氣發瘡及痼疾  
也溼勝則久冷人多食有損熱勝故能主凍  
脚瘡也孟詵云主寒熱五藏勞大明治溫疾  
傳尸勞氣皆非正治惟腫毒家用之爲當耳

主治參互

靈苑方腸風下血經霜茄連蒂燒存性爲末  
每日空心溫酒服二錢匕 丹溪方治乳頭  
裂用茄子老黃者燒灰傅之 鮮茄蒂鮮何  
首烏等分煮飲治對口瘡有神 茄稈燒灰  
淋汁和入桑礪城等藥諸癰腫疔瘡有效

簡誤

茄觀本經所說止是損人竝無利益後人雖  
有處治之法然終與本經相失凡有痼疾及

虛冷人切不可食近世爲茹菜中常用之物  
尊者當慎之

葢味辛微溫主蠅蝮溺瘡多食令人氣喘俗呼魚腥草

疏○葢生於下濕之地得陰中之陽故其味  
辛氣溫入手太陰經能治痰熱壅肺發爲肺  
癰吐膿血之要藥辛溫主散故能治蠅蝮溺  
瘡肺主氣辛溫能散氣故多食令人氣喘肺

與大腸爲表裏大腸溼熱盛則爲痔瘡得辛  
溫之氣則大腸清寧故又爲痔瘡必須之藥  
主治參互

單用搗汁入年久芥菜瀹飲之治肺癰有神  
救急方痔瘡腫痛魚腥草一握煎湯熏洗  
仍以滓傳卽愈

簡誤

戢止能消肺癰治痔瘡餘非所長况多食令  
人氣喘發虛弱損陽氣發脚氣等害慎之慎  
之

神農本草經疏卷之二十九



國家圖書館, NATIONAL CENTRAL LIBRARY, TAIWAN, R.O.C.

神農本草經疏

神農本草經疏卷之三十

補遺

玉石部

黃土

蚯蚓泥

糞坑底泥

烏爹泥

煙膠

石鹼

銀朱

爐甘石

方諸水

木部

木芙蓉

山茶花

木綿子

國家圖書館, NATIONAL CENTRAL LIBRARY, TAIWAN, R.O.C.

肥皂莢

大風子

樟腦

蛙竹屑

人部

人氣

獸部

黃明膠

霞天膏

狗寶

山獺陰莖

羊脛骨

蟲魚部

鰕魚膽

米穀部

亞麻

粟殼

鬮子粟

阿芙蓉

菜豆粉

豌豆

蠶豆

豇豆

刀豆子

紅麴

○玉石部

黃土味甘平無毒主洩痢冷熱赤白腹中熱毒

本草經疏卷三十

綠君亭

絞結痛下血取入地乾土以水煮三五沸絞去  
滓煖服一二升又解諸藥毒中肉毒合口椒毒  
野菌毒張司空云三尺以上曰糞三尺以下曰土凡用當去上惡物勿令入客水  
疏○土為萬物之母黃乃中央正色在人臟  
腑則脾胃應之故萬物非土不生人身五臟  
六腑非脾胃無以養是以黃土入藥治洩痢  
冷熱赤白腹中熱毒絞結痛者取其補助戊  
巳之功也味甘而氣和故能安和脾胃止下

血及解百毒如經所言也

### 主治參互

小兒秘訣烏沙驚風遍身都黑者急推向下  
將黃土一盃搗末入酢一鍾炒熱包定熨之  
引下至足刺破為妙 氣味和平與物無迕  
故不著簡誤

蚯蚓泥即蚯蚓屎也味甘氣寒無毒赤白久熱  
痢取一升炒烟盡沃汁半升濾淨飲之蓋久痢



乃溼熱甚於腸胃得甘寒之氣則溼熱自除矣  
日華子主小兒陰囊忽虛熱腫痛以生甘草汁  
入輕粉末調塗之以鹽研傅瘡去熱毒及蛇犬  
傷蘇恭主傳狂犬傷出犬毛者神効皆取甘寒  
除熱解毒之力耳

主治參互

外臺秘要一切丹毒水和蚯蚓泥傅之 丹  
溪方時行腮腫栢葉汁調蚯蚓泥塗之 摘

玄方燕窩生瘡韭地蚰蟾屎米汁水和煨過  
入百草霜等分研末香油調塗之 又方治  
下部楊梅結毒韭地上蚯蚓泥硫黃等分研  
勻用泥封固作團煨過取出研細生桐油調  
搽

簡誤

虛寒滑利不宜用

糞坑底泥大寒無毒治發背諸惡瘡陰乾爲末

新水調傅其痛立止聖濟總錄治疔腫糞下土  
蟬蛻全蠍等分搗作錢大餅香油煎滾溫服以  
滓傅瘡四圍疔自出也今人以熱糞盛核桃殼  
內覆疔腫上云疔根卽爛出卽此意也

烏爹泥味苦瀉平無毒主清上膈熱化痰生津  
塗金瘡一切諸瘡生肌定痛止血收溼一名孩

兒茶

出南番瓜哇暹羅諸國今雲南老撾暮雲  
場地方造之云是細茶末入竹筒中堅塞  
兩頭埋烏泥溝中日久取出搗汁熬製而成  
其塊小而潤澤者爲上大而焦枯者次之

疏○烏爹泥本是茶末又得土中之陰氣其  
味苦瀉氣應作寒性無毒其主清上膈熱化  
痰生津者茶之用也得地中之陰氣能涼血  
清熱故主金瘡止血及一切諸瘡生肌定痛  
也若能燥瀉能斂故又主收溼氣

### 主治參互

積德堂方牙疳口瘡孩兒茶朋砂等分爲末  
搽之 纂奇方下疳陰瘡孩兒茶一錢真珠

一分片腦半分爲末傅之 董炳方脫肛氣  
熱孩兒茶二分熊膽五分片腦一分爲末人  
乳調搽肛上熱汁自下而肛收也亦治痔瘡

今人多用外治內服甚少故不著簡誤

煙膠味辛苦氣微溫辛能散風若能燥溼殺蟲  
故主頭瘡白禿疥瘡風癬痒痛流水取焯牛皮  
竈岸煙膏爲末麻油調塗或入輕粉少許此卽

牛皮竈上  
黑土也

石鹼味辛苦瀦氣溫微毒性能除垢膩磨積塊  
過服能損人同石灰桑礪透肌肉潰癰瘰癧去  
瘀肉點痣麤疣贅今人用以澣衣出山東濟寧  
大同諸處彼  
人採蒿蓼之屬開窖浸水漉起曬乾燒灰以原  
水淋汁每百斤入粉麵一二斤則凝定如石連  
汁貨

### 簡誤

鹼乃軟堅消積之物食之使人泄瀉以其陰  
溼之性潤下軟堅透肉故於腸胃非宜作泄

胃薄者忌之

銀朱乃硫黃同汞升鍊而成其性燥烈過服能使人齟爛筋攣其味辛氣溫有毒亦能破積滯散結療癰疥惡瘡殺蟲不宜服食今人多以黃丹礬紅雜之不堪用

主治參互

李樓怪症方火焰丹毒銀朱調雞子清塗之多能鄙事湯火灼傷銀朱研細菜油調敷

應急良方日久頑瘡不收者銀朱一錢地

龍骨

卽年久石灰

五分松香五錢爲末香油一兩

化攤紙上貼之兼能治溼毒膿瘡

爐甘石味甘溫無毒主止血消腫毒生肌明目去翳退赤收溼除爛同龍腦點治目中一切病疏○爐甘石受金氣而結味應甘辛氣溫無毒其性帶澀經曰榮氣不從逆於肉裏乃生癰腫甘溫能通暢血脉則腫痛散血自止肌

肉生也又目得血而能視風熱上壅則目爲赤爛膚腎甘入脾而益血辛溫能散風熱性澀則能粘物故同除腎藥點目翳及治目中一切病也

主治參互

一切目疾真爐甘石半斤用黃連四兩剉碎入銀石器內水二盃煮二伏時去黃連以甘石爲末入龍腦香二錢半研勻罐收每點少

許頻用取効 邵真人方下疳陰瘡爐甘石煨醋淬七次一兩孩兒茶三錢爲末麻油調敷立効

方諸水味甘寒無毒主明目定心去小兒熱煩止渴

方諸大蚌也向月取之得二三合水亦如朝露又名明水得至陰之精華故能明目定心及止渴除煩熱也又爲丹竈家所須

○木部

木芙蓉

稟夏末秋初之氣故其味辛辛屬金化故能  
清肺其氣平平即涼也故能涼血散熱解毒  
兼治一切癰疽腫毒惡瘡排膿止痛小兒疔  
積

主治參互

簡便方癰疽腫毒重陽前取芙蓉葉研末端

午前取蒼耳燒存性研末等分蜜水調塗四圍其毒自不走散名鐵井欄他用甚稀故不著簡誤

### 山茶花

得一陽之氣以生故其花開於冬末春初之時其味甘而微辛氣平而微寒色赤而入血分故主吐血衄血腸風下血並爲木入童溺及酒調服

### 木綿子

得地中之陽氣復感秋金之氣以成其味辛其氣熱其性有毒入肝入腎祛風溼寒溼之藥也惟其辛故能散風邪惟其熱故能除寒溼凡下部有風寒溼邪者宜之然而性熱有毒肝腎虛者不宜用一切陰虛火熾痿弱下體無力者咸忌之

### 肥皂核

生於盛夏六陽之令而成於秋金之月得火  
金之氣故其味辛氣溫有毒凡腸胃有垢膩  
穢惡之氣鬱於中則外生瘰癧惡瘡腫毒泄  
於外則爲腸風下痢膿血此藥專能盪滌垢  
膩宣通穢積腸胃潔淨則諸證自除也

主治參互

秘方治瘰癧用肥皂去核入斑貓在內紮緊  
蒸去斑貓加入貝母天花粉玄參甘草牛旁

子連翹爲丸每服一錢白湯下服後腹疼勿  
慮此藥力追毒之故 獨核仁同猪鬃子金  
銀花皂角刺芭蕉根雪裏紅五加皮上茯苓  
皂莢子白殭蠶木瓜蟬腿白蘚皮治黴瘡久  
虛者加人參黃耆薏苡仁兼治結毒 普濟  
方腸風下血獨子肥皂燒存性一片爲末糊  
丸米飲下 又方治臘梨頭瘡用獨核肥皂  
去核填入沙糖入巴豆二枚紮定鹽泥固煨



存性再入檳榔輕粉六七分研勻香油調搽  
先以湯洗淨拭乾乃搽一宿見效 除瘡毒  
外無他用故不著簡誤

### 大風子

稟火金之氣以生故其味辛苦氣熱有毒辛  
能散風苦能殺蟲燥溼溫熱能通行經絡世  
人用以治大風癘疾及風癬疥癩諸瘡悉此  
意耳然性熱而燥傷血損陰不宜多服用之

外治其功不可備述也

### 樟腦

得純陽之氣其味辛其氣熱初時以水煎成  
後得火則焰熾不息其稟龍火之性者乎氣  
亦香竄能通利關節逐中惡邪氣復能去溼  
殺蟲凡一切疥癬風瘙溼毒瘡瘍等證皆所  
須用

### 蛙竹屑

年久枯竹中蠹屑也竹之餘氣尚存其氣味必甘平無毒甘能解毒平則兼散故可用爲蝕膿長肉之藥也

主治參互

同象牙末真珠白礬等藥能消漏管方見象牙條下 朱氏集驗方耳出臭膿用蛙竹屑臙脂胚子等分麝香少許爲末吹之 普濟方耳膿作痛因水入耳中者蛙竹屑一錢臙

粉一錢麝香五分爲末以綿杖絞淨送藥入耳以綿塞定有惡物放令流出甚者三度必愈 又方溼毒臙瘡蛙竹屑黃檗末等分先以葱椒茶湯洗淨搽之日一次效 外臺秘要湯火灼瘡蛙竹屑末傅之愈

○人部

人氣

主下元虛冷日令童男女以時隔衣進氣臍中及兩腰腎間甚良凡人身體骨節痺痛令人更互呵熨久久經絡通透蓋氣屬陽爲一身之健運卽真火也天非此火不能生物人非此火不能有生故老人虛人與二七以前少陰同寢藉其熏蒸最爲有益下元虛冷火

氣衰也得外入之少火乃所以補其不足骨節疼痺血泣不行也血不自行隨氣而行故能使骨節通暢也近時術士令童女以氣進入鼻竅臍中精門以通三田謂之接補此亦小法不得其道者反以致疾

○獸部

黃明膠味甘平無毒主諸吐血下血血淋妊婦胎動下血風溼走注疼痛打撲傷損湯火灼瘡一切癰疽腫毒活血止痛

即牛皮膠

按本經白膠一名鹿角膠煮鹿角作之阿膠一名傅致膠煮牛皮或驢皮作之其說甚明黃明膠即今水膠乃牛皮所作其色黃明非白膠也亦非阿井水所作甄權以黃明爲鹿

角白膠唐慎微又採黃明諸方附於白膠後  
竝誤矣其氣味與阿膠同故其所主亦與阿  
膠相似以非阿井水及驢皮同造故不能疎  
利下行以其性味皆平補亦宜於血虛有熱  
者若鹿角膠則性味溫補非虛熱者所宜不  
可不詳辨也

主治參互

蘭氏方跌撲損傷真牛皮膠一兩乾冬瓜皮

一兩剉同炒存性研末每服五錢熱酒一鍾  
調服仍飲酒二三盞煖則微汗痛止 本事  
方諸般癰腫黃明膠一兩水半升化開入黃  
丹一兩煮勻以鵝翎掃上瘡口如未成者塗  
其四圍自消 阮氏經驗方背疽初起用黃  
明牛皮膠四兩入酒重湯頓化隨意飲盡不  
能飲者滾白湯飲之服此毒不內攻一方加  
穿山甲四片炒成末其妙無比

霞天膏味甘溫無毒主中風偏廢口眼歪斜痰涎壅塞五藏六府留痰宿飲癖塊手足皮膚中痰核其法用肥嫩雄黃牛肉三四十斤洗極淨水煮成糜濾去滓再熬成膏用

疏○胃屬土爲水穀之海無物不受胃病則水穀不能以時運化羈留而爲痰飲壅塞經絡則爲積痰老痰結痰等證陰虛內熱生痰則爲偏廢口眼歪斜留滯腸胃則爲宿飲癖

塊隨氣上湧則爲喘急迷悶流注肌肉則爲結核王隱君論人之諸疾悉由於痰然而痰之所生總由於脾胃虛不能運化所致惟用霞天膏以治諸痰證者蓋牛土畜也黃土色也肉者胃之味也熬而爲液雖有形而無濁質也以脾胃所主之物治脾胃所生之病故能由腸胃而滲透肌膚毛竅搜剔一切留結也陰虛內熱之人往往多痰此則由於水涸

火熾煎熬津液凝結爲痰膠固難散者亦須  
以此和竹瀝貝母橘紅蘇子栝樓根枸骨葉  
之類消之或以橘皮白茯苓蘇子白豆蔻仁  
半夏蒼朮爲麴治脾胃積痰或以橘皮貝母  
蘇子栝樓根及仁蓬砂爲麴治積熱痰結

### 狗寶

狗寶如牛之有黃也第狗性熱其寶定是苦  
溫之物世人用治噎證以其苦能下泄溫能

通行耳又能主癰疽疔腫同蟾酥腦麝雄黃  
乳香沒藥等用

### 簡誤

狗寶性熱善消噎病由於痰及虛寒而得者  
猶可暫用取效若因血液衰少以致噎膈者  
法所當忌世醫不諳藥理不察病本一槩妄  
投致病增劇戒之戒之又凡有脾胃虛弱羸  
瘦不振之病尤不宜用

山纒陰莖味甘熱無毒主陽虛陰痿精寒  
此物出廣之宜州峽峒及南丹州土人號爲  
插翹其性姪毒山中有此物凡牝獸皆避去  
獼無偶則抱木而枯猺女春時成羣入山以  
采物爲事獼聞婦人氣必躍來抱之刺骨而  
人牢不可脫因扼殺之負歸取其陰一枚值  
金一兩若得抱木死者尤奇貴峒獠甚珍重  
之私貨出界者罪至死木地亦不常有多僞

者試之之法但令婦人摩手極熱取置掌心  
以氣呵之趨然而動者爲真

### 羊脛骨

本經無文綱目載其主虛冷勞及脾弱腎虛  
不能攝精白濁除溼熱健腰脚固牙齒去黔  
黯治誤吞銅鐵金銀等證按名醫別錄云昔  
漢上張成忠女年七八歲誤吞金饋子一隻  
胸膈痛不可忍憂惶無措一銀匠炒末藥三



錢米飲服之次早大便取下叩求其方乃羊脛灰一物蓋羊脛骨灰可以磨鏡羊頭骨灰可以消鐵故能治如是之證談野翁亦有此方乃秘妙神效之法也

主治參互

食鑑擦牙固齒羊脛骨灰一兩升麻一兩黃連五錢爲末入青鹽和勻日用 聖惠方咽喉骨鯁羊脛骨灰米飲下一錢

○蟲魚部

鰕魚膽

此魚最能發溼惟膽能治魚骨鯁及竹木刺誤吞入喉不出或吞入腹腹中作痛隱隱皆效狀如鱸魚者是

○米穀部

亞麻

卽鼈蝨胡麻出兗州威勝軍今陝州亦種之  
其味甘氣溫無毒足厥陰經血分藥也厥陰  
藏血爲風木之臟凡大風瘡癬總厥陰血熱  
所致甘溫益血而通行則血自活風自散癘  
疾疥癩瘡癬俱除矣

主治參互

得漆葉苦參荆芥天門冬生地黃青黛百部  
白花蛇何首烏半枝蓮豨薺葉刺蒺藜甘菊  
花治大麻風 同金銀花連翹草解土茯苓  
何首烏蒼朮木瓜薏苡仁生地黃黃檗治溼  
熱太甚徧身膿窠瘡

粟殼味酸澀微溫無毒

古方治嗽及瀉痢脫肛遺精多用之今人亦  
效尤輒用殊爲未安不知咳嗽惟肺虛無火

或邪盡嗽不止者用此斂其虛耗之氣若肺  
家火熱盛與夫風寒外邪未散者誤用則咳  
愈增而難治瀉痢脫肛由於下久滑脫腸虛  
不禁遺精由於虛寒滑泄者借其酸澀收斂  
之氣以固虛脫如腸胃積滯尚多溼熱方熾  
命門火盛溼熱下流爲遺精者誤用之則邪  
氣無從而泄或腹痛不可當或攻入手足骨  
節腫痛不能動或遍身發腫或嘔吐不下食

或頭面俱腫或精竅閉塞水道不通變證百出而淹延不起矣可不慎哉

罌子粟味甘平無毒主丹石發動不下食和竹瀝煮作粥食之極美

疏○罌粟其花至有千葉者紅白紫黑色有數種一罌內子凡數千萬粒細如葶藶子而色白本經味甘平無毒蘇頌性寒甘寒除熱解毒下氣和中故主丹石發動不下食及圖

經行風氣逐邪熱止反胃去胸中痰滯也

### 阿芙蓉

罌粟花之津液也罌粟結青苞時午後以大鍼刺其外面青皮勿損裏面硬皮或三五處次早津出以竹刀刮取入磁器陰乾用之其氣味與粟殼相同而此則止痢之功尤勝故小兒痘瘡行漿時泄瀉不止用五釐至一分未有不愈他藥莫逮也

綠豆粉甘涼無毒主解諸熱益氣解酒食諸毒  
治發背癰瘡腫及湯火傷灼

疏○菜豆粉所稟氣味與菜豆同故能解諸  
熱及酒食毒湯火傷灼也發背癰疽瘡腫皆  
熱毒所致甘寒解陽明之熱則毒氣不至犯  
胃而嘔惡腸胃清涼而諸腫散矣熱傷氣除  
熱故能益氣也

主治參互

李嗣立外科精要護心散又名內托散乳香  
萬全散凡有疽疾一日至十三日內宜連進  
十餘服方免變證使毒氣出外服之稍遲毒  
氣內攻漸生嘔吐或鼻生瘡菌不食卽危矣  
四五日亦宜間服之用真菜豆粉一兩乳香  
半兩燈心同研和勻以生甘草煎濃湯調下  
一錢時時呷之若毒氣衝心有嘔逆之證大  
宜服此蓋菜豆壓熱下氣消腫解毒乳香消

諸癰腫毒服至一兩則香徹瘡孔中真聖藥也一方有丹砂二錢半 衛生易簡解砒石毒菜豆寒水石等分以藍汁調服三五錢又方夏月癩瘡菜豆粉二兩滑石一兩和勻撲之一方加蛤粉 生生編杖瘡疼痛菜豆粉炒研以雞子白和塗之妙 澹寮方打撲傷損用菜豆粉炒紫色新汲水調傅以杉木皮縛定其效如神

○菜豆皮能解熱毒退目翳直指方通神散治斑痘後目生翳用菜豆皮甘菊花殼精草等分爲末每服一錢以乾柿餅一枚粟米泔一盞同煮乾食柿日三服淺者五七日見效遠者半月見效

簡誤

菜豆粉性涼脾胃虛寒易泄者勿多食

豌豆

卽今之小豌豆也一名胡豆陳藏器云煮食治消渴孫思邈治寒熱熱中吐逆泄瀉及脹滿利小便應是甘平無毒入脾胃清利除熱之物也又能治癰腫痘毒牛都御史秘傳四聖丹治小兒痘中有疔或紫黑而大或黑壞而臭或中有紫線此證十死八九惟此方點之最妙用豌豆四十九粒燒存性頭髮灰三分真珠十四粒研爲末以油燕脂同杵成膏

先以簪挑疔破啞去惡血以少許點之卽時變紅活色 千金外臺洗面澡頭方盛用畢豆麩取其白膩去黠黯令人光澤也

蠶豆

味甘微辛無毒能厚腸胃和臟腑萬表積善堂方言一女子誤吞鍼入腹諸醫不能治一人教令煮蠶豆同葦菜食之鍼自大便同出今人有誤吞金銀物者用之皆效實救急之

良方也

豇豆

味甘鹹平無毒補腎健胃與諸疾無禁可常食之昔盧廉夫教人補腎氣每日空心煮豇豆入鹽少許食之甚效

刀豆子

味甘微溫主溫中下氣止呃逆昔有人病後患呃逆不止聲聞鄰家或令取刀豆子燒存

性爲末白湯調服二錢卽止此卽下氣歸元之驗也

紅麴味甘溫無毒主消食活血健脾燥胃治赤白痢下水穀

疏○紅麴以白粳米雜麴母蒸罨爲之亦奇術也人之水穀入於胃受中焦溼熱熏蒸精氣變化而赤爲血紅麴以白米飯受溼熱鬱蒸而變爲紅皆造化自然之微妙也故紅麴



胃榮血之功有同氣相求之理消

脾胃與神麴相同而活血和傷惟紅麴爲  
故治血痢尤爲要藥

主治參互

得番降香通草鮫鯉甲沒藥治上部內傷胸  
膈作痛或怒傷吐血和童便服有神效 同  
黃連白藕豆蓮肉黃芩白芍藥升麻乾葛烏  
梅甘草滑石橘紅治滯下有神 同續斷番

阜紅花牛膝沒藥乳香

同澤蘭牛膝地黃續斷

蒲黃赤芍藥治產後惡露不盡腹中痛 丹

溪心法溼熱泄痢青六丸用六一散加炒紅

麴五錢爲末蒸餅和丸梧子大每六七十丸

白湯下日三服 摘玄方心腹作痛赤麴香

附乳香等分爲末酒服

身吳